

دار حكاوی الكتب

غلاف: هبة مكارم

www.hakawelkotob.com

# زواج صالونات

محمود زيدان



زواج صالونات

محمود زيدان

حكاوي الكتب للنشر الالكتروني

[www.hakawelkotoob.com](http://www.hakawelkotoob.com)

التصميم الداخلي

فاطمة الزهراء





في أحد الأحياء الشعبية بالقاهرة  
الكبرى، وبالتحديد في حي هادئ نسبيا  
يبتعد كثيرا عن الأماكن العشوائية،  
ويكاد يقترب من الأحياء الراقية،  
يسكنه غالبا ميسوري الحال من الطبقة  
المتوسطة

جلس أفراد الأسرة الأربعة في هذه الشقة  
السكنية الواسعة التي تتوسط أدوار  
المبني القديم المكون من خمسة طوابق  
يحتوي الواحد منها على شقتين متقابلتين  
تفصل بينهما طريقة عرضها متر تقريبا  
وطولها ثلاثة أمتار.

اعتزل الوالد في زاوية المنزل البعيدة  
يتصفح الجريدة في هدوء عقب عودته من



عمله الشاق مديرا للمدرسة الحكومية  
التي تبعد عن المنزل بضعة كيلو مترات.

بينما كانت الأم في الزاوية الأخرى  
تستطلع رأي ابنها الأكبر حول رغبته في  
الزواج من تلك الفتاة التي كان الاثنان  
في زيارة خاصة لأهلها منذ قليل.

نظر الابن الي والدته متحيرا ثم انتفض من  
مقعده فجأة وصاح قائلاً: الله يسامحك  
ياامي انتي السبب..

انتى اللي دبستينى فى الجواز دي  
هتخلينى أعيش طول عمري تعيس  
ياريتنى ما اتجوزت.....



صاحت الأم منيرة في دهشة قائلته:  
اتجوزت ايه يا عادل هو احنا لسه عملنا  
حاجته..

احنا لا كتبنا كتاب ولا لبسناها دبلة

ولا حتي قرينا فاتحة مع أهل العروسة

وبعدين اللي يشوفك وانت لازق في البنت  
هناك وقاعد ترغي وتضحك معاها طول  
اليوم يقول انك بتعرفها من عشر سنين،  
وفضلت تكلمها عن بطولاتك كأنك  
ابو زيد الهلالي .. وفي الرايحة والجاية  
تقول لباباها ياعمي.. ومامتها ياحماتي جاي  
دلوقتي تقولي دبستيني ..





رد عادل قائلًا: امال عايزاني أعمل ايه  
ياأمي بعد ما رحنا هناك وأكلنا وشربنا  
واتغدينا واتعشينا اجي في الآخر اقولهم  
بنتكم وحشة ..

ده انا حتي ابقى قليل الذوق وما عنديش  
دم

صاحت منيرة: يامصبتي السودا.. يابني انت  
هتفضل اهل وعلي نياتك كده لحد  
امتي

وبعدين مالها البنت فيها ايه يتعيب. ماهي  
حلوة وبيضا ومؤدبة ودمها خفيف عايز ايه  
تاني..؟!

أجاب عادل قائلًا: ما انتي عارفت ياأمي  
مواصفات البنت اللي انا كنت عايزها



وقولتلك عليها مليون مرة قبل كدة

وفرحت لما قولتيلى لقيتلك العروسة اللي  
بتحلم بيها، خلّيتيني عملت مشكلتة وسبت  
شغلي في السعودية وجيت عشان اشوفها  
لقيتها حاجة تانية

-حاجة تانية ازاي يافالح؟

ايه اللي كدبت عليك فيه؟ قول كمل  
كلامك

-اسف ياأمي

انا ما قولتش ان انتي كدبتي عليا هي فعلا  
حلوة بنسبة 98% ومش مشكلتة ال 2% أهم  
حاجة الأخلاق ...



وڪمان دمها خفيف ومحترمة وبننت ناس  
بس انتي ما قولتيليش يأمي ان البننت  
قصيرة

-يابني انا بسببك انت جالي السكر  
وضغط الدم، عايز ايه تاني شكلك  
هتموتني ناقصة عمر  
-بعد الشر عنك يأمي

-طيب بص يابني البننت لازم تكون أقصر  
منك.. عشان لو طويلة عنك بعقلة صابع  
هتشوف كيفها عليك.. ومش هتعرف ابدا  
تكلمها، خد القصيرة احسن تقدر تحكم  
وتتحكم فيها ولا تقولك قلت التلاتة  
كام، لكن الطويلة لو ضربتها قلم هترد





عليك باتنين وهتبقى أيامك سودا معاها  
خصوصا لو كانت عصبية

وبعدين ما انت كنت قصير وكانوا  
بيقولولك ياقرعة ويادوب لحقت نفسك  
في الآخر وطولت شوية جاي دلوقتي  
تتفرعن بيهم علي بنات الناس

- أعذريني بأمي اللي انا اعرفه ان البنت  
القصيرة دايم عصبية ونكديت ولسانها  
طويل، ولا ايه رأيك ياوالدي حضرتك  
ساكت ليه

ترك الوالد الصحيفة ثم أعقبها بتهيدة  
طويلة تفصح قليلا عن عدم الرضا ثم  
قال: بص يا بني هقولك حاجة تعالي اقعد  
جمبي الأول انت معاك حق في كل اللي





الصورة اهي كانت زي القمر ماشاء الله بس  
مش أجمل من مامتي طبعا

ضحك الوالد ثم قال: معاك حق يا بني  
خالتك كانت زي القمر بس انت متعلم  
وتقدر بذكائك تغير من مراتك في  
شهرين، وتخليها تعمل ريجيم من اول يوم  
جواز عشان ما تبقاش زي ماممممم...  
قصدي خالتك

نهضت منيرة من مكانها ثم قالت في  
غضب: بقولكم ايه انت وهو انا سايباكم  
من الصبح بتلقحوا عليا كلام وساكتة  
بمزاجي ولو ما لميتش نفسك يا عادل انت  
وخالتك ها... هيكون ليا كلام تاني  
معاكم





واعمل حسابك يابني لو ما وافقتش علي  
البنات دي ماليش دعوة بيك في أي حاجة  
تانية وما تيجيش في يوم تقولي عايز  
اتجوز وابقى خالي خالتك هي اللي  
تجمعلك العروسة ياشاطر، بس انت قومي  
صلي ركعتين وادعي من ربنا انها توافق  
عليك اصلا دي تبقي امها داعية عليها  
اللي هتتجوز واحد متعقد زيك..

-الله يسامحك ياماما

سامع يابابا امي بتقول عليا ايه

-سيبك منها وقولي صحيح انت حسيت

بإيه لما شوفت العروسة أول مرة

أطرق عادل في شرود ثم قال: بص ياوالدي

أول ما شوفتها حسيت ان ابليس داخل



علينا، ولما جات تسلم عليا بصيت في وشها  
وعينيا جات في عينيها جالي هبوط  
وحسيت بحاجة كاتمة علي نفسي،  
مسكت في إيد والدتي، وبصيت ناحية  
الباب عشان اجري راح أبوها حلف بالطلاق  
ما حد ماشي غير لما نتغدي

وعلي ما حضرت مامتها الغدا جات العروسة  
قعدت جمبي بصراحه ارتاحتها أوي  
وبعدها بشوية لقيتها جميلة أوي في عينيا  
مش عارف ازاى كاني بشوف وحدة تانية

ولما اتغدينا عجبني الأكل وحسيت اني  
حبيتها وحببت مامتها ولقيت نفسي بقولها  
تسلم ايدك يا حماتي، هنقرا الفاتحة



امتي ان شاء الله، قالتلي زي ما تحب يابني  
احنا سامعين عنك كل خير بس ادينا  
فرصة نفكر لحد يوم الخميس.

تبسم الوالد قليلا ثم قال: طيب دي حاجة  
كويست برضه واللي خلاك ارتاحتهم  
كده وحببت البنت في نص ساعه يبقي  
اكيد هتحبها أكثر مع الوقت يعني بعد  
الجواز ان شاء الله

وبعدين انت قدامك لحد يوم الخميس  
عشان تفكر، يلا قوم دلوقتي صلي  
ركعتين استخارة، وادعي من ربنا انه  
يقدملك اللي فيه الخير، وان شاء الله ربنا  
مش هيخيب ظنك يابني.. ده اللي قبلنا  
قالوا: "ما خاب من استخار."





.....

علي مقربة منهم وبالتحديد في شارع صغير يعتبره الغرباء ضمن الحي الراقى المجاور، ولكن يعتبره ساكنيه ضمن الحي الشعبي القريب.. وفي منزل خاص مكون من ثلاثة طوابق ملحق به حديقة كبيرة عن يساره، كان رب الأسرة المكونة من أربعة أفراد، العقيد هاشم نور الدين يجري اتصالا هاتفيا بمكتبه للاستفسار حول آخر المستجدات بشأن العمل بعد غيابه اليوم وانشغاله باستقبال الضيف الجديد.

وبينما كانت الأم تهمس في أذن ابنتها ليلى متسائلة عن سر عبوسها عقب مقابلة



العريس الجديد صاح الابن الأصغر قائلاً:  
ياساتر يارب أخيراً مشيوا

هم كانوا ناويين يباتوا عندنا ولا ايه

ردت كريمته في غضب: اسكت يا عمر  
عيب.. ما تتكلمش بالأسلوب ده وقوم  
ذاكر

ولا انت ناسي انك في تالته اعدادي،  
ولازم تعوض المجموع الضعيف اللي جبته  
في التيرم الأول

صاح الابن في ضجر: لا مش ناسي ياماما  
بس من ساعة ما شوفت أخينا ده وانا مش  
طايق حاجته.. وما ليش نفس للمذاكرة  
دلوقتي ..



والمصيبة كمان انه فاكر نفسه شاطر  
أوي ..

ولما جيت اختبره في التاريخ لقيته مش  
فاهم أي حاجة.. ولا عارف حملة فريزر  
كانت سنة كام ...

ولا فاكر الثورة العربية .. ولا حملة  
نابليون.. ولا حتي حريق القاهرة... ده مش  
عارف أي حاجة عن البلد ياماما  
تزرحت الأم قليلا من جوار ابنتها وقالت:  
كفاية انت اللي عارف يافالح ..

واحد متخرج من الكلية ليه خمس  
سنين.. وسافر يشتغل بره عايزه يفكر ايه  
ياأذكي اخواتك.



معاهم حق اصحابك وهم بيقولوا عليك  
انت بقيت تلاجة الايام دي

صاح الابن غاصبا؛ عريس بنتك هو اللي  
تلاجه... وطلع قليل الذوق كمان.. علي  
اخر الزمن ييجي واحد زي ده.. يقول قومه  
يا عمر من جمبي.. انا مش فاضيلك ..

ضحكت كريمة ثم قالت؛ والله الراجل  
معاه حق من اول ما جه.. وانت بترخم  
عليه ..

هو جاي في امتحان يجاوب علي أسئلتك

ولا جاي يقعد مع اختك.. ويتعرف عليها

رد عمر مستنكرا؛ ده اللي ناقص كمان  
واحد زي ده يقعد جمب اختي ويتعرف



عليها.. ده شخص متخلف.. وما عندوش دم..

واللي زيه انقرضوا من زمان

صاحت الأم وقد أوشك صبرها علي النضاد

قائلة: ياواد عيب قوم ذاكر.. وبطل

لماضت..

ما تقولش علي عريس اختك كده

رد الابن في سخرية: بسرعه كدة خليتيه

عريس اختي، يعني البني آدم الغريب ده..

يتجوز القمر العسولت دي ..

صحيح ياناس... الغراب يا وقعت سودا،

جوزوه أحلي يمامة.. تصدقي ياماما انا

صعبان عليا تعبك اللي راح هدر النهاردة

انتي ليكي يومين بتنضفي السجاد ..



وفي الآخر ييجي الأستاذ عادل يمشي عليه  
بالشوز ..

خلاله بقي طين زي وشه... الأفندي مش  
عارف ان الشارع كان وحل النهارده.. بعد  
المطره ما مطرت.. هو العريس ده أعمي ولا  
ايه..؟

الأم في حسرة شديدة .. ما تظلمش الراجل  
يابني.. يمكن مش واخد باله.. وبعدين  
الراجل وشه أبيض زي القمر، مع إن الشخص  
بأدبه وأخلاقه مش بشكله ومنظره

هتف عمر قائلًا: طب ده مش واخد باله  
وكوبايتة العصير اللي شربها للآخر..





وبعدین عمل صوت غریب أوی کدة من  
حنجرته

وفجأة ظهر علي بوقه شنب زي شنب  
النجعاوي... انا لحقت اديله المنديل  
بسرعة عشان كان هيفضحنا قدام عمتي  
النهارده..

ابقي هاتيلك دستة شاليموهات في  
جهازك يا عروسة... عشان جوزك يشرب  
العصير بالشاليموه... وما يفضحكيش  
قدام ضيوفك

صرخت الأم في غضب: يا اواد قولتلک  
اسکت واحترم نفسك عيب تقول  
الکلام ده، انا مش عارفة انت اتعلمت  
الأسلوب امتي وفین.



تجاهل الابن حديث والدته ومضي يواصل  
حديثه مازحاً : لأ وكمان جاي.. لابس  
نظارة سودا.. في يوم ما طلعتاوش شمس..  
فاكر نفسه الأستاذ عبد المعطي مدرس  
الألعاب بتاعنا..

وحاطط القلم في جيب القميص الشمال زي  
مدرسين الإبتدائي ..

ناقص كمان يحط سيجارة في ودانه ويبقي  
زي الواد عرفة النجار.. اللي في اول الشارع.

نظرت الأم الي زوجها وقالت: اسكت  
يا قليل الأدب والدك بيتكلم في  
التليفون، ما تخلينيش اتعصب عليك  
دلوقتي.. انا ماسكت نفسي عنك  
بالعافية



ضحك الابن وراح يلتفت الي والده ثم قال  
بصوت منخفض: حاضر ياماما بس اقولك  
الصراحه كانت معاهم بنت مزة.. زي القمر  
ماشاء الله حلوة أوي ..

هو ليه صحيح البنت دايمما بتبقي احلي من  
مامتها.. حتي بصي في ليلي اختي احلي  
منك اوي ياماما ..

نهضت الام من مكانها وأسرعت ناحيته  
وهي تقول: بس يا اهل يابن الهلته... الحق  
عليها انا اللي ما عرفتش اربيك.

اختفي عمر في غمضة عين، ودخل مسرعا  
الي غرفته



بينما راحت الأم تضرب كفا بكف  
وتحدث نفسها قائلة: الحقوني ياناس..الواد  
جنني.. مفيش حد ياخذ الواد ده.. ويديني  
مكانه اي حاجة استفيد بيها... بدل ماهو  
مخليني متعصبة كده طول الوقت ..

روح يا بني.. الهي يبتليك بوحدة هبلة  
تطلع عينك.. وانت ياييت ليالي تعالي هنا  
لما نشوف اخرتها ايه معاكي  
ضحكت ليالي في رقة وقالت: في ايه ياست  
ماما هو انا عملت حاجة غلط ولا ايه

-لا ما عملتيش حاجة يا استاذة.. انا اللي  
اتجننت.. هتخلوني في الاخر اكله نفسي  
انت ي واخوكي

-عمر يطل برأسه من الباب



الله يكون في عونك يا اختي.. ماما  
جايبالك عريس انتيكا من خان الخليلي  
زغرتي ياليلي... لولوولوولي

صاحت الأم: اقبل الباب يابن العبيطة

-ألا صحيح ياماما ماقولتيليش .. عرفتي  
منين الست دي

-هقولك ياأستاذة.. انا من امتي بخبي  
عليكي حاجة يابختي المنيل

-الأسبوع اللي فات.. وانا بشتري الخضار..  
من عند عمك برعي.. جات أم عادل  
وقالت لبرعي عايزه احسن كرنبه من  
عندك عشان ابني عادل جه امبارح من  
السعودية.. ونفسه ياكل محشي.. من اول  
ماراح السعودية ياعيني وهو محروم منه.



-وبعدين ياماما

-وبعدين يابنتي بعدت عنهم عشان ربنا  
بيقول في القرآن الكريم.. " ولا تجسوا  
".

-بس ياماما انتي كده مش بتتجسسي..  
يعني غصب عنك ، الكلام هو اللي  
بيوصل لحد عندك

-ماهو يابنتي ده غلط برضه.. لو لقيتي  
نفسك وسط اتنين بيتكلموا.. وهم مش  
عارفين انك سامعاهم.. حاولي تبعدي  
عنهم.. وما تسمعيش حاجه.. حتي لو كان  
الموضوع يخصك انتي.

-حاضر ياماما.. وبعدين حصل ايه





-بس يابنتي وبعدها بشوية لقيت عمك

برعي بينده عليا.. وبيقول لأمر عادل ..

الست دي معاها بنت زي القمر ماشاء الله، و

كل شباب الشارع بيحلموا بيها.. والناس

مالهاش سيرة غير عن أدبها، وذوقها،

وأخلاقها، ومافيش حد في يوم اتكلم

عنها بحاجه وحشة.. لا سامح الله.. ومامتها

الحجة كريمته اللي وافقت قدامك دي

كل الناس بتحبها، والصغير والكبير

بتحترمها.. ده غير باباها كمان راجل آخر

ذوق في الدنيا، ومتواضع جدا رغم انه

عقيد مهم أوي في جهاز الشرطة.

-ابتسامه خفيفة من ليلي... ها وبعدين

ياماما



- ما اكذبش عليكى يابنتى انا فى الأول  
اتدايقت من برعى... بس لقيت الست مرة  
وحدة كده سلمت عليا وبوستة من هنا على  
كلمة من هنا.. عجبني أسلوبها المحترم..  
وقدرت تخلىنى احبها

وبعدين قالتلى عايزة اجي اشرب الشاي  
عندك يام ليلي.. وانتى عارفانى يابنتى  
مش بحب اخرج حد.. وما ينفعش اقولها ما  
تيجيش

-ايوة طبعا عارفاكى ياست ماما  
ماانتى أصلا اسمك كريمه.. يام  
الكرم.. يام المصريين

-اتلمى يابت

-حاضر ياماما



-بس بصراحه يابنتي ما كنتش اعرف انها  
هتجيب ابنها معاها... هي ما قالتليش  
حاجه زي دي

البنات (بقت مغرورة من كلام برعي)  
ياريتها ما جابته..

-ليه يابنتي بتقولي عليه كده.. ماله  
الواد

ده حتي باين عليه طيب وابن حلال..  
وكويس وابن ناس.. كفايت مامته اللي  
تتحط علي الجرح يطيب

-هو انا هتجوزه ولا هتجوز مامته.. وبعدين  
جرح ايه اللي يطيب ياماما.. ده انتي لسه  
عارفاها من اسبوع.. لحقتي تحبها اوي  
كده..



يابنتي اللي يحبه ربنا يحب فيه خلقه

في ناس كده اول ما تشوفها تحبها

وناس اول ما تشوفها.. تكرهي الصدفه

اللي جمعتك بيها

وتبقي كل احلامك ساعتها.. انها تختفي

من حياتك

-طيب ياماما حضرتك عايزة حاجه مني ..

انا راичه انام دلوقتي.. عشان عندي

جامعه بكره

-جامعه ايه يابت.. انا بتكلم معاك

تقوليلي جامعه..

-حضرتك ناسية ياماما ان مش باقي غير

شهرين علي الإمتحان.. والدراسة أهم



عندي من اي حاجة تانيته.. هي مستقبلي  
كله... عشان يبقالي كيان.. وقيمة في  
المجتمع

-كيان ايه ومجتمع ايه اللي بتتكلمي  
عنه... بقولك ايه يابنتي سيبك من  
الكلام الفاضي بتاع بنات الفيس بوك  
ده... واسمعيني كويس ..

مستقبلك الحقيقي انك تلاقي الشخص  
اللي يحبك ويحترمك ويعرف قيمتك..  
خدنا ايه احنا من التعليم غير وجع القلب  
والفزلة الفارغة.

ما تبصي لبنت خالتك اهي.. عملت نفسها  
شاطرة وأنزوحته.. وكل ما يتقدم لها عريس  
ترفضه.. قال ايه بتحضر ماجستير



ودكتوراه... وفي الآخر قعدت في البيت  
بتحضر عفارييت... لا حصلت سما ولا  
أرض... ولا نفعست في ماجستير ولا  
دكتوراة ..

ده ساعات بتصعب عليا.. لما تيجي بيني  
وبينها.. تقولي ياريتني كنت سمعت  
كلامك يا خالتو.. واتجوزت احمد جارنا..  
وكنت كملت بعدها دراستي بعد الجواز..  
أكيد كان هيوافق لو بيحبني

-عشان خاطري ياماما انا تعبانة من شغل  
النهاردة وغسيل الصحون والكوبايات ..

سيبيني انام ولا انتي زهقتي مني خلاص..  
وعايزة ترميني لأي حد يتقدملي.. قوليلي  
اروح انتحر احسن.. عشان اريحك مني





-يا بختك المنيل يا كريمه

كنت فاكرك الواد بس اللي اهل ....

طلعت البنت اهل وأنيل منه ...

في حد يرمي ضناه ياهبلت... يابت ده الأم  
مهما كانت بتتخاف مع بنتها.. دايم  
بتعتبرها اختها وسندها في حياتها.. اكر  
من جوزها ذات نفسه

انا بستم عليك وقلبي بيتقطع... وادعي  
عليكي واكره اللي يقول امين...

وكل يوم أشوفك بتكبري قدامي ألاقي  
الحزن بيزيد أوي جوايا... وبقول خلاص  
هيجي اللي ياخدها مني.. ولما اسمع صوت  
حد غريب يخط علي الباب.. بقول ده جاي  
يخطفك من حضني.



وأحس ان قلبي بقي مقبوض ورحي  
بتتسحب مني.. من خوفي انك تسيبيني  
وتبعدي عني

يابنتي ده أصعب احساس علي الأم انها  
تشوف بنتها في حضن حد ثاني ..

علي اخر الزمن حد يحرمني منك.. بعد ما  
كنتي في حضني انا عشرين سنة  
كاملة ..

انتني ما تعرفيش ان انا سبت الضيوف  
النهارد.. قبل ما ياخدوا بالهم من الدموع  
اللي في عيني.. ودخلت اوضتك... وفتحت  
دولابك ومسكت هدومك أخذتها في  
حضني أوي ...



وبصيت في صورتك وانتى صغيرة.. فضلت  
ابكي لحد ما نسيت نفسي ونسيت ان في  
ضيوف بره ..

ما حسيتش بحاجه بعدها.. غير لما لقيت  
باباكي بيرش عليا ميتة... وأخذني في  
حضنه وفضل يعيط، وشوفت الدموع نزلت  
من عينيه هو كمان

وقالي ما كنتش اعرف انك بتحبي ليلي  
أوي قد كده..؟ اللي يشوف خناقاتكم مع  
بعض طول اليوم يقول انك مرات ابوها  
مش مامتها ...

قولتله دي ضايا يعني حتة مني ..

قالي اذا كان قلبك بيتقطع علي فراق  
بنتك.. فأنا كل حتة في جسمي بتتقطع



من خوفي انها تبعد عني... ياريت كان  
ينفع تفضل طول عمرها معانا... وما  
تتجوزش... ولا تحب حد غيرنا وتروح  
وتنسانا بعد كدة.. لكن ما باليد حيلة  
ياكريمت... هي دي سنت الحياة.

\*ليالي تبكي بشدة وترتمي في أحضان  
والدتها

خلاص ياماما انا مش هتجوز.. انا هفضل  
معاكم طول العمر... انا كمان مش هقدر  
ابعد عنكم.. ومفيش حد في الدنيا دي  
هيقدر يحرمني منكم.. قولي للزفت ده  
ليالي مش موافقة علي الجواز



- لا يابنتي ماتقوليش كده احنا برضه  
يهمنا سعادتك وانتى بكرة وبعدده لازم  
تتجوزي ويبقالك بيت وکمان بنت تحبها  
وتخافي عليها اوي زي كده

- لا ياماما انا كمان عمري ما تخيلت اليوم  
اللي تغيبوا فيه عني ...

انتوا حياتي كلها بابا وماما وعمر مستحيل  
أى حد يقدر ياخدني منكم

- يابنتي ماهو انتى بعد كده هتيجي  
تزورينا

- ازورك ازاي..؟

وهو بيقول اننا هنسافر نعيش في  
السعودية ..

انا مش عايزاه ياماما ..







عشان تعرف ان انا مش راضية عليك

اسمعيني كويس ياليلي يابنتي... انسي

موضوع السفر ده

وتعالى ن فكر شوية ..

قوليلي ايه هي العيوب اللي انتي شايفها

في عادل

-بصراحة ياماما..هو فيه عيوب كتير .

كله علي بعضه كده غلط في غلط

ده بيشرب خمره ياماما [?] ...

معقول الست كريمه اللي لسه راجعه من

الحج الشهر اللي فات... تجوز بنتها لواحد

بيشرب خمره ...

-مين اللي قالك بيشرب خمره يابنتي



-انتي ما سمعتيهوش ياماما وهو بيكلم  
صاحبه.. ويقول له فاكر يا عبد الله...  
اكثر حاجة وحشتني في السعوديت.. هي  
الشامبانيا اللي كنا بنشربها عند ابو فهد  
-ابتسامت جميلة من الأم...

ظلمتي الراجل يابنتي.... الشامبانيا دي  
عصير مشهور اوي في السعوديت  
فاكرة الكوكتيل اللي قولتلك اعمليه  
لما جات عندنا خالتك نجوي... وانتي  
شربتي معانا كمان.. وبقيتي كل يوم  
تعملي شوب لوحديك قبل المذاكرة..

-قصدك عصير التفاح والبرتقال ياماما  
-ايوة ياليلي ده اسمه شامبانيا في  
السعوديت...



وبيشربوه في شهر رمضان كمان زي قمر  
الدين عندنا..

-يعني انا طول الوقت بشرب شامبانيا

وانتي سايباني كده عادي ياما

-بقولك عصير كوكتيل يا آخر صبري

ركزي معايا شوية يابنتي

-بصراحة ياما لما سمعته بيقول لصاحبه

كنا بنشرب شامبانيا... خوفت منه اوي...

ابقي انا كدة ظلمته... أحبيبي يا عادل

-حبيبك ....؟! ازاي مش فاهمة؟؟

-عادي ياما دي كلمة بنقولها وخلص

-هي كلمة حبيبي بتقولوها

وخلص...الحب دلوقتي بقي مجرد كلمة..



بتقولوها عادي كدة.. جيل ايه الهباب  
ده... اللي دمر كل الحاجات الجميلة  
بتاعة زمان.. يابنتي ده علي ايامنا الست ما  
كانتش بتقول لجوزها بحبك غير بعد  
كام سنة من الجواز..

-ياماما الزمن اتغير.. احنا دلوقتي في عصر  
السرعة

-فعلا عندك حق يابنتي... احنا في عصر  
السرعة... الحب بييجي بسرعة... وينتهي  
بسرعة كمان

عموما خرينا في موضوعنا دلوقتي... ايه  
الغلط والعيوب اللي انتي شايفها في عادل  
ياليلي



-بصي ياماما... اول حاجتة البيرفيوم اللي

بيستخدمه ريحته وحشه اوي.. ما كنتش

طايقته نفسي وانا قاعدة جمبه.. وكل ما

اجي أقوم الاقي مامته بتقولي... انتي

زهقتي مننا ياليلي ولا ايه.. أقولها لأ وابقى

مضطرة اقعد كمان شوية

-بسيطرة يابنتي ابقى هاتيله انتي بيرفيوم

علي ذوقك

-وشكل القميص كمان ياماما ... في حد

يلبس قميص كاروهات في الزمن ده...

وكمان لابس قميص أخضر علي بنطلون

ازرق... يافضيحتك وسط صحابك ياليلي



-معلش يابنتي ابقى هاتيله انتي اللبس  
علي ذوقك... انتي متعلمة وبالتفاهم  
بينكم هتقدري تغيري من شكله

-انا ممكن اتفاهم معاه في اللبس اه...  
واغير الاستايل بتاعه... لكن الأسلوب  
والتعامل أغيره ازاي ياست ياماما.. انتي ما  
شوفتيش لما جبتله القهوة عمل ايه...

-معاه حق يابنتي هو بيشرب القهوة زيادة  
وانتي جايبهاله سادة.. في حد يعمل كده

-اعمل ايه يعني نسيت احط السكر...  
بتحصل عادي.. هو ليه يعمل كده من اولها  
.. امال بعد الجواز هيعمل ايه

-الراجل ماعملش حاجه.. يادوب قال  
القهوة مفيهاش سكر وسابها مكانها ....





-لا المفروض... لو بيحبني كان شربها

كلها... عشان انا اللي عاملاها

-بيحبك ايه يامجنونتر... انتو لسه

عارفين بعض امبارح

-طب شوفتي لما انتي قولتيله... مالك

يابني بتبص في التليفون باستمرار من وقت

للتاني.. انت عندك معاد مهم ولا ايه

شوفتي وشه بقي عامل ازاي... ده شكله

عصبي ياماما

-عادي يابنتي ممكن يكون حساس زيادة

عن اللزوم

-انا عايزة اعرف ياماما انتي ليه بتدافعي

عنه اوي كدة... ما انا اتقدملي شباب



كثير.... واحسن منه كمان.. وانتني  
كنتي بترفضني... اشمعني ده بالذات اللي  
انتني موافقة عليه.

- اسمعيني يابنتي... لما كنا في الحج...  
الشهر اللي فات... قعدت معانا وحده من  
المرشدات اللي في الحرم ..

شرحتلنا حديث عن الرسول صلي الله عليه  
وسلم قال

"إذا جاءكم من ترضون دينه وخلقه  
فزوجوه إلا تفعلوه تكن فتنة في الأرض  
وفساد كبير "

يعني الرسول " عليه افضل الصلاة والسلام"  
بيقولك لو حد جالك يتقدم لبنتك  
واتأكدتي انه علي دين وخلق يبقي لازم



توافقي... يعني لا حسب ولا مال ولا جمال  
هينفعوكي... الا اذا كان الزوج اخلاقه  
كويست وبيخاف من ربنا

وكم ان في راجل سأل الحسن البصري  
وقاله: خطب ابنتي جماعه فمن أزوجها ؟  
قال ممن يتقي الله ، فإن أحبها أكرمها وإن  
أبغضا لم يظلمها

-بس ياماما عادل مش بدقن ولا لابس  
جلابيت بيضا... عرفتني منين انه متدين..

-بصي ياليلي... اللي بيحافظ علي السنة  
والمظهر الديني دي حاجت كويست...  
لكن مش معني كدة ان اي حد مش  
بدقن، ولا لابس جلابيت بيضا... يبقي  
ماعندوش دين... الدين في الجوهر اكثر



منه في المظهر... ربنا بيقول "يوم لا ينفع  
مال ولا بنون إلا من أتى الله بقلب سليم."

وبيقول كمان "سيماهم في وجوههم من  
أثر السجود" تلاقي وشهم بشوش ومبتسم  
دايما.. ومنور زي القمر في ليلة تمامه...  
وقلبك يرتاحلهم من اول مرة تقابلهم....  
بغض النظر عن اللبس

وكمان انا احترمت عادل اوي... لما لقيته  
بيستأذن من مامته قبل ما يتكلم مع  
باباكي في اي حاجة....

ما شوقتيهوش كمان وهو داخل البيت  
وقبل ما يطلع بيقدم مامته ويقولها اتفضلي  
انتي الأول ياماما....



اللي ياخذ باله من الحاجات دي يابنتي....

يبقي مؤدب ومحترم وابن ناس طيبين

-بصراحة ياماما محتارة.... ومش عارفة

افكر دلوقتي

-صارحيني يابنتي لو في حد في حياتك

قوليلي ..

وانا مش هكون ضد رغبتك ما دام انتي

حاسة انها هتكون سبب سعادتك

-في الحقيقة ياماما انا في حاجة مخياها

عليكي... وكنت خايضة ومكسوفة اني

أقولك ...

-من امتي بتخافي مني ياليلي... ما انتي

دايما بتعتبريني اختك الكبيرة.... وانا

عمري ما فرضت عليكي رأيي في أي حاجه



-اسفتر يا ماما.... اوعدك مش هتكرر

تاني ..

اسمعي يا ست ماما.... الأسبوع اللي فات  
صاحبتي بسمت عرفتني علي شاب قالت انه  
يبقي اخوها.. قعدنا شوية في الكافيه..  
واتكلمنا مع بعض ييجي ساعة كدة..  
ووعدني انه هييجي يتقدملي بعد ما يخلص  
جامعة... وطلب مني اننا نتقابل كل يوم  
في الكافيه عشان نتعرف علي بعض  
اكتر .....

بس انا ما وافقتش طبعاً ...





وكننت مستنيتة لما اخد رأيك... انا  
محتارة بجد ومش عارفة اعمل ايه... هو  
شاب وسيم جدا وسحرني بكلامه

-طيب بصي يابنتي اسمعيني كويس.. في  
نوع من الشباب لما بيدخل الجامعة...  
بينسي طفولته ويدخل في عالم ثاني..  
كله غش وخداع... وكذب علي بنات  
الناس.. عايز يقضي فترة الدراسة ضحك  
ولعب وحب... ولما الموضوع يدخل في  
الجد يقولك اصل ظروف في ما تسمحش  
دلوقتي.. اصل بابا رافض.. اصل ماما عندها  
القلب وهتعمل عمليه قريب... انا يابنتي ما  
دخلتش جامعة بس عارفة كل حاجه  
بتحصل جواها كويس



وبسمع كثير ان شباب الجامعة.. بيتراهنوا  
مع بعض عشان يشوفوا مين فيهم بيعرف  
بنات اكثر.... وكل شهر تلاقى الواحد  
منهم ماشي مع بنت جديدة.. يقولك اصل  
اكتشفت ان القديمة كانت مجرد اعجاب  
مش حب حقيقي... والبنت اللي بتصدق  
الكلام ده تستاهل كل اللي يجرالها.

-يعني ايه رأيك ياماما

-بصي يابنتي انا مش هظلمك ولا  
هظلمه.. خلي صاحبك بسمه تقول  
لأخوها... ان في عريس جاي متقدمك...  
ولو هو عايزك بجد.. ييجي يقابل  
باباكي... ويقري معاه الفاتحة... وقدامه



سنتین تلاته لحد ما یكون نفسه... واحنا  
مش عایزین منه ای حاجه دلوقتی غیر اننا  
نتأكد من أخلاقه کویس... بس  
اوعدینی متکلمیهوش تانی

-حاضر یاما

اقولک حاجت یاما... انا نفسي اتجوز  
واحد زي بابا... انا بحب بابا اوي... ونفسي  
جوزي یكون نسخت منه فی کل  
حاجه... انا ساعات بحسدک علیه یاست  
ماما

-بصي یابنتی.. الراجل اللي انتی شایفاه  
ساکت وهادی... وقاعد یقري فی الجورنال  
ده... طلع عینی لحد ما قدرت اتفاهم معاه..  
ده کان عصبي ویتنرفز من اقل حاجت...



وطول اليوم صوته بيوصل لآخر الشارع....  
والجيران بيتفرجوا علي خناقاتنا مع  
بعض... يادوب بعد الجواز بعشر سنين لولا  
ما فهمنا بعض شوية .

واهو دلوقتي زي ما انتي شايفته... اول ما  
يرجع من الشغل يتغدي و ينام.... وبعدها  
صحي علي نشرة الأخبار ويحل الكلمات  
المتقاطعة لحد ما يتعب من السهر و ينام  
تاني..

انتى عندك عشرين سنة دلوقتي ..  
يعني ما شوقتيهوش زمان وهو عايش في دور  
سي السيد

الوالد... بتقولي ايه يا كريمته... انتوا  
جايبين سيرتي في حاجته...؟؟



-لا مافیش حاجه یاسی هاشم...بنتک بس

بتتظمن علیک.... ما تسیب الجورنال

یاراجل وتخلیک معانا شویته ...

-انا سایبکم لحد ماتخلصوا کلامکم....

و اشوفکم هتتفقوا علی ایه

-واحننا نقدر نتفق علی حاجته قبل ما

نعرف رأیک یا ابو عمر.... انت شایف ایه

یا حج هاشم

-والله یا کریمته انا ما اتعودتش احکم

علی حد من اول مقابله... لکن الواد

شکله طیب ومحترم.... ومتربی... اکثر

حاجه عجبتنی فیه...لما جه عندنا....

کان بیقوم یصلي اول ما یسمع الأذان...



وڪمان لما سألته.... باباك ما جاش  
معاك ليه... قالي اسف ياعمي ما قدرش  
اجيب بابا معايا غير لما اتأكد ان  
حضرتك موافق... عشان ما قبلش ان  
والدي يتعرض لأي موقف محرج لو  
حضرتك رفضت اني اتجوز ليلي...

قومي يابنتي صلي ركعتين  
استخارة... ونامي بدري عشان الجامعة  
بكرة... انا عايزك تجيبي امتياز زي كل  
سنت... وانا ومامتك هنتكلم في الموضوع  
ده... واللي فيه الخير يقدمه ربنا ان شاء  
الله

-أخيرا ينجح عمر في تصليح التليفون

-خدي الموبايل اهو اشتغل ياليلي...





-الوالد.. بس ياواد ياعمر .. قوم ذاكر

واسمع الكلام

-حاضر ياابا... انا اسف ياماما.... تصبحو

علي خير...

في بيت العريس

عادل: صباح الخير ياماما

-صباح النور يا عادل...

مالك يا بني صاحي ليه بدري أوي كدة..؟

من اول ما رجعت من السفر وانت بتصحي

العصر ...

عندك معاد مهم ولا ايه



-أيوة طبعاً ياأمي النهاردة الخميس..

والمفروض اهل العروسة يردوا علينا  
بخصوص جوازي من ليلي... انتي نسيتي  
ولا ايه

-لا ما نسيتش بس انت اللي نسيت  
كلامك عنها.. وقولت انها مش  
عاجباك...عشان البنت قصيرة وهتبقي  
تخينة بعد الزواج زي خالتك.. فاكروا  
لحقت تنسي

-انا فعلاً قولت عليها قصيرة بس ما قولتش  
انها وحشة... اقولك الصراحة ياأمي... انا  
ما نمتش ليلة امبارح... ومستني الصبح



يطلع بفارغ الصبر... عشان اعرف رأيها  
ايه.. ليالي وحشتني اوي بجد ياأمي...

من اول ما رجعنا من هناك.. وصورتها ما  
غابتش عن بالي

كل حاجه فيها وحشتني.. نظرات الخجل  
اللي كانت في عينيها.. وحشني كلامها  
وابتسامتها الرقيقة.. وحشني الحجاب  
البيج والفستان البنفسجي اللي كانت  
لايساهم

وحشتني القهوة السادة اللي جابتهالي مع  
اني شربتھاش ...

ولحد دلوقتي مش ناسي كلامها ولا  
ضحكتها ...



طول الوقت بفكر فيها... وكل ليلة قبل  
ما انام افكر كل حاجة حصلت يوم ما  
قابلتها..

-ايه ده كله يا عادل هو انت طلعت  
رومانسي ولا ايه... مش باين عليك يا بني

-انتى ناسيت يا حجة منيرة ان انا كنت  
بكتب شعر ايام الدراسة.. وكمان اخدت  
المركز الأول في مسابقة الجامعة..

-لا مش ناسيت بس انت يا بني عمرك ما  
قولتلى انك حبيت... ولا حتى معجب  
بواحدة...

-مفيش انسان ما بيحبش ياامي ...

انا فعلا حبيت وحدة زميلتي في الجامعة...  
كانت معايا برضه في كلية الهندسة..



وماكنتش اعرف غير ان اسمها ياسمين  
لكن عمري ما كلمتها ولا صارحتها بحبي  
ليها ...

-ليه يا عادل يابني ماقولتلاهاش وختلتها  
تعرف انك بتحبها

-عشان ساعتها كنت عارف اني مش قد  
الجواز ...

قولت لنفسي استحمل وخليك راجل... ما  
تخليهاش تحبك وتفكر فيك.. وتحلم  
معاك بحياة كلها حب وسعادة.. وفي  
الاخر تسيبها وتكسر قلبها.... وتقتل زهرة  
شبابها... وتموت الفرحه جواها.



كنت بحبها بجد عشان كدة اختارت اني  
اتعذب لوحدي... وهي تعيش حياتها بعيد  
عني من غير كذب وغش وخداع..

وسافرت علي امل اني ارجع الاقيها  
واصارحها بحبي ليها واقابل باباها واطلبها  
منه... لكن جيت متأخر اوي... جيت  
لقيتها اتجوزت ودلوقتي معاها بنت وولد ..

-يااااه يابني.. انت ازاي استحملت ده كله  
لوحدهك حتي مافكرتش في يوم  
تحكي لي

-عشان يامي ظروف في ساعتها ما كانتش  
تسمح بالزواج، ومارضيتش اقولك عشان ما  
اكسرش قلبك وتحسي بالعجز انتي وبابا  
انكم مش قادرين تزوجوني البنت اللي





بحبها.. وكم ان كنت عايز اتزوج  
بمجهودي عشان انا اللي هبقي مسئول عن  
بيتي بعد زواجي

-ياريت يابني كل الشباب بيضكروا زيك  
كدة

أقولك حاجة كمان ياأمي أنا كنت  
بتدايق لما بشوف حد من صحابي بيحب  
بنت ويوعدها بالزواج وفي الآخر يبعد  
عنها وينساها... كنت بحس بنفس الحزن  
اللي بتحس بيه البنت وأكتر، كانت  
بتصعب عليا جدا... عشان كده وعدت  
نفسي اني عمري ما اكسر قلب بنت... ولا  
اكذب عليها، او اخدعها... الظلم كله  
حرام... وظلم الراجل للبنات حرام اكبر



من أي شيء ثاني...وانا وعدت نفسي عمري  
ما هظلم بنت طول حياتي ان شاء الله

-ربنا يكملك بعقلك يا بني.. انت  
كمان معاك اخت صغيرة... وزي ما  
بتخاف عليها... لازم تخاف كمان علي  
بنات الناس  
-حاضر ياامي ...

-طيب انا هجهزلك الفطار دلوقتي... لحد  
ما اهل العروسة يكلمونا

-لا انا مش هاكل ولا اشرب غير لما اعرف  
رأيها... ياريت ياامي تكلمي مامتها وتسألها  
عن رأيها دلوقتي



يا بني اللي خلاك صابر السنين دي كلها  
مش قادر تصبر كام ساعة... اكيد ليلي  
في الجامعة يا عادل

-اقولك حاجه ياامي.. لما الحلم يكون  
بعيد عننا وعارفين انه مستحيل يتحقق..  
بنكون صابرين غصب عننا... عشان  
مفيش بإيدينا حاجه نقدر نعملها.. ساعتها  
بنكون فاقدين الأمل.. وبنحاول طول  
الوقت اننا ننسي اللي حلمنا بيه..

ولما الحلم يكون قريب مننا... وما  
يتحققش بتبقي الصدمة كبيرة اوي...  
بنقول ياريتنا ما حلمنا.. ولا توقعنا ان  
الحلم ده ممكن يتحقق في اي لحظه



انا دلوقتي حاسس ان الحلم قريب مني...  
وممكن يتحقق.... بس خايف من  
الصدمة... هتكون كبيرة اوي عليا  
وممكن تدمرني المرة دي

-بعد الشر عنك يابني يعني جوازك من  
ليالي دلوقتي بقي حلم ونفسك تحققه  
-فعلا ياامي هي دي الحقيقة اللي  
اكتشفتها ليلة امبارح.. لما بقيت سهران  
طول الليل... وقلبي وعقلي مشغولين  
بالعروسة

-ربنا يحققك كل اللي تتمناه يابني...  
انا هكلم مامت ليلي... واشوف رأيهم ايه  
-حاضر ياامي.. انا هرجع أوضتي... ولو ليلي  
وافقت اندهي عليا... ولو رفضت يبقي



خليني في اوضتي عايش علي الأمل... علي  
الأقل لحد اخر اليوم

-طيب يابني ناولني التليفون قبل ما  
تدخل...هتلاقيه قدامك اهو علي  
التليفزيون

-حاضر اتفضلي يامي

-السلام عليكم... ازيك يا حجة  
كريمة... اخبارك ايه... وابو عمر  
وابنك عمر عاملين ايه

-كلنا كويسين وبخير الحمد لله

-والعروسة اخبارها ايه... طمنيني عليها ...

-قصدك ليلي...؟ هي دلوقتي في  
الجامعة... عندها 3 محاضرات النهاردة...



-طيب عادل مستعجل ياستي... وعائز يعرف

ايه رأي العروسة...

-ان شاء الله خير ياام عادل...اول ما ليلي

ترجع من الجامعة... هبقي اكلمك

واقولك رأيها ايه.

-اهو ليلي جات اهي..... انا اسفتر ياام

عادل... مضطرة اقل دلوقتي ...

مالك ياليلي بتعيطي ليه... و راجعة ليه

من الجامعة بدري كده... قوليلي يابنتي

حصل ايه معاك

-انا اسفتر ياماما... تعبانة اوي... مش هقدر

اتكلم في اي حاجة دلوقتي

-انا مش هسيبك غير لما اعرف في ايه...

قوليلي يابنتي.. قلقتيني عليك... حد



كلمك في الجامعة... المعيد اياه طردك  
تاني من المحاضرة.. ولا في حد مات من  
صحابك

-ايوة ياماما واحده صاحبتى ماتت  
النهاردة...

اقرب وحدة ليا ماتت ياماما

-مين دي يابنتي.. قصدك علي سمر  
زميلتك من الاعداديه ولا بسمة  
صاحبتك اللي عرفتها في الجامعة..  
وماتت ازاي وامتي

-بسمة صاحبتى ياماما ماتت النهاردة..  
بعد ما قابلتها في الجامعة..

-ماتت ازاي في الجامعة يابنتي.. ضربت  
شمس ولا ايه





-هي لسه عايشة الكدابته... بس ياريتها  
كانت ماتت قبل ماتعمل فيا كده

-طب اهدي كده وقولي لي هي عملت ايه  
معاكي

-حاضر ياماما فاكرة اخوها اللي قولتلك  
انها عرفتني عليه ...

-ايوة ماله

طلع مش اخوها... الأستاذة شغالة واسططت  
للشباب... وكل اللي عايز يعرف بنت  
يروحلها... ويديها فلوس.. عشان هي تقول  
لصاحبته انه اخوها... ويدخل عليها هو  
بموضوع الجواز... وفي الاخر يسيبها بعد ما  
يزهق منها... والمشكلة كمان انها  
مصاحبة اكثر من نص بنات الجامعة



-يامصيبتي السوداء.. طب وعرفتي ازاي ده

كله عنها يابنتي

-النهاردة بالصدفة قابلت هبة بنت

خالتها... اللي غابت فترة بعد وفاة باباها...

هي مش صاحبتني أوي ... بس قولت اعزيها..

واخد بخاطرها ...

وقفنا مع بعض شوية لحد ما تبدأ

المحاضرة... قولت لها ابن خالتك

متقدمي ...

قالتلي مين ده..؟ هتجوزي مصطفى اللي

عنده 3 سنين ..

قولت لها لأ هو اسمه حسام اخو بسمته ...

قالتلي يابنتي بسمته مش معاها غير أخ

واحد اسمه مصطفى وعنده 3 سنين...



وبيتعالج لحد دلوقتي من شلل الأطفال...  
انتي رابع واحدة تقولي الكلام ده  
النهاردة... هي بسمت رجعت تاني للأسلوب  
الحقير بتاعها ده ...

-بقولها اسلوب ايه... وايه هو اللي كانت  
بتعمله

-قالتلي كل حاجه عنها... كانت بتعمل  
صداقات كتير مع البنات.. واي بنت  
جديدة تدخل الجامعة لازم تكون هي  
اول وحده تعرفها... واي حد من الشباب  
عايز يتعرف علي بنت يروحها هي الأول...  
يديها فلوس وهي تقوم باللازم... مع انها  
مش محتاجه لكده... وباباها الله  
يرحمه... سابلهم فلوس كتير



-لا حول ولا قوة الا بالله، احمدي ربنا

يابنتي انك عرفتها علي حقيقتها

-انا مصدومة بجد ياماما ازاى اكثر وحدة

صاحبتي تعمل فيا كدة... ده احنا بنقعد

مع بعض كل يوم... ومش بقدر اكل ولا

اشرب من غيرها..

-معلش يابنتي... الناس الرخيصة كترت

اوي الزمن ده... والشر موجود من ايام قابيل

وهاييل... ومش هينتهوا ليوم الدين

-المصيبة ياماما اني رحلتها... وقولت لها

انتي عملتي معايا كدة ليه... بتقولي انتي

فاكرة نفسك مين... عايشة في دور ابله

فضيلت.. ومتهاالك انك اشرف بنت في

الجامعة...وانتي أصلا ولا حاجه... مش



عارفت ايه اللي عاجبهم فيكي.. كل  
الشباب نفسهم يتكلموا معاكي... انتي  
احسن مني في ايه.. بلبسك المعضن ده

-عشان كده ضربتها بالقلم وسببتها  
ومشيت... انا كرهت الجامعة.. وكرهت  
اصحابي كلهم... بقيت اشك في كل  
وحده اعرفها... بحس ان كل بنت  
اصاحبها عايزة توقعني في مصيبة.

-لا يابنتي.. اوعي شخص واحد يخليكي  
تكرهي الدنيا كلها... بصي ياليلي لو  
أكلنا تفاحة ولقينا طعمها مر.. مش معني  
كده ان التفاح اللي علي الشجر كله  
وحش.. العيب مش في التفاحة ياليلي..



العيب في الشخص اللي يرويها ويراعيهـاـ..  
ويهتم بيها.

وفي النهاية مفيش في ايدينا غير نقول  
حسبنا الله ونعم الوكيل في كل شخص  
بيكذب ويغش الناس

-انا اسفـتـ يا ماما كان المفروض اصدق  
كلامك من الاول وما اصدقش أي حد  
كده بسهولة

-حصل خير يا بنتي.. الحمد لله انها جات  
علي كده.. بقولك صحيح... الست منيرة  
كلمتني النهاردة وسألـتني عن رأيك في  
الزواج من ابنها عادل..



-بصراحه ياماما.. انا مش عارفة افكر في  
اي حاجة دلوقتي... وبقيت اخاف اخد اي  
قرار عشان ممكن اندم عليه بعدين

-يعني ايه يابنتي نقول للناس ايه  
دلوقتي... لازم نرد عليهم النهاردة

-طب انتي رأيك ايه ياماما

-انا وباباكي اتكلمنا كتير في  
الموضوع ده... وسألنا علي عادل واهله  
كويس... كل الناس بتحبهم  
وتحترمهم... ومفيش حد قال عنهم كلمة  
وحشة لا سامح الله...بس قبل ده كله  
المهم انتي ..

احنا مش هنفرض رأينا عليك... دي  
حياتك يابنتي... وانتي المفروض اللي





تختاري الانسان اللي هتعيشي معاه  
مستقبلك اللي جاي ان شاء الله

-بصراحه ياماما... انا محتارة بجد.. بس  
الحقيقه.. عادل وحشني جدا... وحشني  
كلامه وضحكته... والقمص  
الكاروهات، والطقم الملون بتاعه....  
حتي ريحة البيرفيوم الوحشة بتاعته  
وحشنتني هي كمان..

-يعني نقول للناس ايه ياست ليالي

-اللي تشوفيه ياماما ....

-طيب هرد عليهم واقولهم انك موافقة

-بس بشرط ياماما

-ايه هو



-بعد الزواج مفيش سفر للسعودية

-تمام هقولهم.... ان شاء الله

السلام عليكم

ازيك يام عادل.. اخباركم ايه

تقدروا تشرفونا في اي وقت، ليلي بنتي  
موافقة علي الزواج إن شاء الله، لكن في  
مشكلة صغيرة

-خير يام ليلي.. ربنا ما يجيب مشاكل

-ليلي بنتي رافضة موضوع السفر  
للسعودية.. انتي عارفة يام عادل لما



البنات تكون وحيدة امها يبقى صعب اوي  
انها تبعد عنها ..

عشان مامتها بتبقي بالنسبالها صاحبها  
واختها وكل حاجه في حياتها ..

وانا كمان ماقدرش اتحمل غياب بنتي  
الوحيدة عني بالسنين.. عشان هي زهرة  
عمري.. وفرحت شبابي .. اللي بتخفف عني  
هموم الدنيا كلها .

ليلي بالنسبالي الضحكة اللي من القلب...  
والفرحة الأولى في حياتي.. لما بكون  
زعلانه مع ابو عمر مش بلاقي حد غيرها  
جمبي، هي اللي بتأخذني في حضنها  
كأني بنتها الصغيرة مش بتسيبني غير لما  
تشوف البسمه علي وشي.



وعلي قد ماانا فرحانه انها كبرت وبقت  
عروست.. علي قد ماانا مخنوقه وقلبي  
مكسور علي حالي بعد فراقها... عشان  
كده انا وباباها رافضين انها تتجوز وتسافر  
بعيد عنا...

احنا طبعاً مش من حقنا نتدخل في  
مستقبل ابنك لكن هو ده شرطنا الوحيد  
يا أم عادل

ولو العريس مصمم علي السفر يبقي مضيش  
نصيب.. ويعتبر نفسه مرفوض من دلوقتي.

-طيب انا هتكلم مع عادل.. وهرد  
عليكي كمان ساعة ان شاء الله

-ايه رأيك يا عادل يا بني... انت تقريبا  
سمعت المكالمه كلها... انا قلبي بيتقطع



عليها... لو انا مكانها كنت هعمل كده  
واكثر كمان.

-ياامي ده قرار مش سهل... محتاج ايام  
وشهور عشان افكر فيه... ازاي هقدر احدد  
مصيري ومستقبل حياتي كله في ساعة  
واحدة.. انا كنت محتاج وقت اكثر من  
كده بكتير

-انا عارفة ومتأكدة انك هتأخذ القرار  
الصح... في وقت قليل كمان... عشان  
باباك علمك ازاي تحدد مصيرك  
وتفكر كويس..وعلمك الرجولة وانك  
كمان تحمل نتيجة اختيارك ..

فاكر لما قولنا لك ادخل كلية الطب  
وانت صممت رأيك ودخلت هندسة



الكترونيات.. ساعتها باباك قالى مادام  
هو حبيب الكلية دي اكيد هينجح  
فيها... ولو دخل اى كلية تانية هيبقى  
صعب جدا انه يتأقلم ويحقق اى نجاح مهما  
كان ذكى او متفوق

-اقولك الحقيقة يامى.. زمان وانا صغير  
كنت بحلم بحاجات كتير... كنت بحلم  
انى انجح فى دراستى.. وابقى شخصية مهمة  
فى المجتمع... وأساهم فى تقدم البلد..  
واعمل حاجة مفيدة للناس تفضل عايشه  
حتى بعد وفاتى...والحمد لله حققت اللي  
اقدر عليه ونجحت فى الكلية بتقدير  
امتياز ...

لكن بعد ما تخرجت من الجامعة.. بقى  
كل حلمى انى الاقى شغل.. ويبقالي بيت



واعيش مستور... وما يجيش عليا يوم وامد  
ايدي لحد ...

انا كنت علي وشك اني استسلم واعترف  
بهزيمتي.. واعيش عمري كله مكسور  
وضعيف.. حاولت علي قد ماقدر.. عملت  
مع صحابي مشروع صغير بس فشلنا ...

جزء منا استسلم وفقد الامل انه ينجح..  
ورفض يكمل المشوار... وتاه وسط  
الزحمة... والجزء الثاني فضل متمسك  
بحبل الأمل رغم انه ضعيف... لحد  
ماجاتلي الفرصة اني اسافر السعودية...  
سافرت وتعبت واتبهدلت لحد مالقيت  
وظيفة مناسبة هناك في شركة  
الكترونييات.... ودلوقتي بقي ليا مركز  
كويس واسم كبير كمان





عائزاني اسيب ده كله وارجع تاني هنا  
عشان ادور علي شغل من اول وجديد

-يا عادل يابني كفايت غريته...نفسنا  
تفضل هنا في بلدك وسط اهلك... ده  
اليوم الواحد وانت معانا بكنوز الدنيا  
كلها.. خلاص يابني انا وباباك كبرنا  
وبقي عندنا السكر وضغط الدم... وأميرة  
اختك يادوب عندها 11 سنت.. واحنا  
كلنا مالناش غيرك بعد ربنا... لكن في  
النهاية يابني دي حياتك برضه وانت حر  
فيها

عارفت ياامي.. انا يوم السفر كان  
بالنسبالي أسوأ يوم في حياتي... نمت طول



الليل ابكي وكنت بتقطع من جوايا وانا  
بحضر الشنطرة... حسيت بالخوف لما والدي  
استخبي في اوضته عشان ما قدرش يسلم  
عليا.. كنت حاسس اني يتيم وانا رايح  
مكان بعيد عنكم... ولما اخدتيني في  
حضانك وانا خارج حسيت كأني سايب  
الجنة ورايح السجن بإرادتي.. لكن ده  
كله كان غصب عني مش بإرادتي ..

كنت عارف ان الغربت صعبت عليكم...  
لكن الغربت ياامي اصعب بكتير علي اللي  
مفارق.. مسافر لوحده وسايب قلبه وروحه  
واهله وصحابه وبلده وذكرياته كلها...  
لكن الاختيارات قدامي كانت محدودة  
ماكانش قدامي غير طريق الهزيمة  
والضياع مع اللي ضاعوا.. او طريق الصمود



والمحاولة لآخر يوم في عمري.. الطرق هنا  
كلها متقذلة ياامي.. ونادر اوي اللي بينجح  
من غير المفتاح السحري الواسطة  
والمحسوبة

-طيب يا بني انا هكلم مامت ليلي  
واقولها... عادل متمسك بموضوع السفر و  
رافض يرجع مرة تانية

-لا ما تكلميهاش ياامي ارجوكي... انا  
حببت ليلي بجد.. ومستحيل ابعد عنها..  
مش هاسيبها تضيع مني.. زي ماضاعت اللي  
قبلها

-يا بني انت قابلتها يوم واحد.. لحقت  
تحبها اوي كده



-بصراحة ياامي انا ما كنتش مؤمن بالحب  
من اول نظرة.. لكن لما قابلت ليالي..  
عرفت كويس ان زي ما في وجوه متشابهة  
في كمان أرواح متشابهة.. كثير بنلاقي  
اتنين متشابهين في الشكل.. او السلوك  
او حتي في طريقة التفكير

لكن نادر لما تلاقي اتنين متشابهين في  
الروح والبراءة وطيبة القلب... وانا دلوقتي  
حاسس اني لقيت روعي الثانية اللي  
شبهني.. وهخسر بجد لو سبتها تروح مني

-وبعدين وصلت لإيه يابني حيرتني معاك  
-بصي ياامي انا لو حظيت احلام حياتي  
كلها في كفة... وحلمي اني اتجوز ليالي



في الكفة الثانية هختار ليلى.. انا  
اكتفيت من الدنيا بيها.. وجودها معايا  
هيعوضني عن احلام الدنيا كلها ...

كلامي طنط كريمة وقوليها عادل  
موافق.. ومش مسافر تاني...

الأم في غضب: يعني يا ابني انت هتقعد هنا  
عشان ليلى... واحنا فين من حياتك  
يا استاذ عادل .

-بصراحة ياامي انا أنهيت عملي في  
السعودية رغم انهم كانوا متمسكين بيا  
لاخر يوم.. لكن قولتلهم ان أهلي  
محتاجين اني اكون جمبهم.. وانا كمان  
محتاج لأهلي وما اقدرش ابعد عنهم اكثر  
من كده... يعني انا قررت اني ارجع



واعيش معاكم قبل ماشوف ليلي، وقبل  
ما افكر كمان في موضوع الزواج بس  
كنت عاملها لك مفاجأة.. ايه رأيك بقي  
يا حجة منيرة

-ده أجمل خبر سمعته في حياتي يا بني..  
أخيرا هترجع تعيش معانا بعد سنين  
الغربة دي كلها، كنت بتيجي زي الغريب  
تقعد اسبوع وتمشي، كانوا أصعب خمس  
سنين في حياتي، وفاكراهم زي اسمي  
باليوم والليلة

-بصراحه يأمي الشركة عرضت عليا  
تجيبلي شقة هناك واتجوز فيها.. بس أنا  
مستحيل كان ينفع اتزوج واخد مراتي



واسافر اعيش بره... واسيبكم انتوا هنا  
لوحدكم... انا عارف ان والدي تعب كثير  
اوي الفترة اللي فاتت.. عشان كده انا راجع  
اعوضكم علي قد ما اقدر.. وهحاول اجمع  
صحابي كلهم واعمل المشروع اللي كنت  
بحلم بيه طول فترة غيابي...

وكمان ارجع لروحي اللي انا فارقتها هنا  
من سنين... بس ادعيلي ياامي انجح المرة  
دي... انا مابقيتش قادر اتحمل اي صدمة  
جديدة من ثاني

-ربنا يوفقك.. ويسعد قلبك ياابني... زي  
ما خلتنني فرحانة ومبسوطة اوي دلوقتي...  
انا هكلم مامت ليالي حالا... عشان نروح  
نتفق علي موعد الخطوبة...





ناولني التليفون من جمبك يا عادل

-اتفضلي ياامي.. بس قوليلها جاين بكرة  
ان شاء الله ..

-يا بني اهدي شويت.. خليني اعرف اكلمها  
-ازيك يا حجه كريمته.. يارب تكونوا  
بخير... عادل فكر كويس وموافق  
بخصوص موضوع السفر... وقرر يرجع  
يعيش في بلده وسط اهله وناسه... امتي  
بقي نقدر نيجي نقابل ابو عمر عشان نحدد  
موعد الخطوبة

-تشرفونا في اي وقت يام عادل  
-طيب احنا جاين بكرة ان شاء الله..  
خير البر عاجله



-تنورونا يا حجه م، هتلاقونا في

انتظاركم باذن الله

-مبسوط كده يا استاذ عادل... قوم ارتاح

شوية انت ما نمتش من ليلة امبارح

-حاضر يا امي.. تصبحي علي خير

-تصبحي علي خير ايه يا بني احنا لسه

العصر دلوقتي... ولا هتنام لحد بكرة

كمان

-انا ليا تلات ايام ما نمتش عايز انام

براحتي ما حدش يصحيني

-بص يا بني انا لازم اعرف ايه اللي

حصلك... ماهو يا اما البنت عملتك

سحر... يا اما انت اللي اتجننت... لما نشوف



الست لیلي عملتک ایه عشان یبقي  
حالك بالشکل ده من بعد ما شوفتها

-انا اسف یامي هدخل اوضتي دلوقتي لو  
احتاجتي حاجة ابقی صحنی...

.....

(بعد مرور 18 ساعة)

-اصحی یاعادل.. قوم الساعة 10 یابنی

-سیبینی نایم یامي... انا مش هتعشی

دلوقتي

-تتعشی ایه... الساعة 10 الصبح یاعادل

بیہ... قوم البس وجهز نفسک عشان نروح

للعروسة... باباک من امبارح بیسأل

علیک.. کان فرحان اوی لما عرف انک



مش مسافر تاني...نفس الفرحة اللي

شوفتها علي وشه يوم ولادتك من 30 سنة

عشان كده اخد اجازة من الشغل

النهارة... وراح يعمل تورقة باسم الست

ليالي... عشان فاكر ان هي اللي خلتك

تغير رأيك... واول ما يرجع هيستنانا تحت

البيت عشان نروح كلنا للعروسة

-حاضر ياامي حالا هكون جاهز

-يللا يا عادل باباك اهو وصل، بيرن عليا

دلوقتي

-انا خلاص جهزت ياامي.. توكلنا علي

الله.



عادل مبتسم: ازيك ياواليدي.. وحشتني من  
امبارح ما شوفتكش

-انت اللي وحشتني اكرت يابني... من اول  
ما رجعت من عند ليالي وانت حالك  
متلخبط هي البنت من دلوقتي هتاخدك  
مننا ولا ايه

-مستحيل حد ياخدني منك ولا يشغلني  
عنكم ياواليدي

-يابني انا بهزر معاك ربنا يجعل حياتكم  
كلها حب وسعادة طول العمر ان شاء الله...  
وما تطلعش ست نكديت زي وحدة هنا  
مطلعه عين ابوك



-يافتح ياعليه يارزاق ياكريم... لسه

بنقول ياصبح.. خلي بالك من كلامك

يا عادل وركز في الطريق كويس

-مش انا اللي سايق ياامي.. انتي ناسيت ان

انا مش بعرف اسوق ولا ايه

-عارفت يا ناصح قول حاضر واسكت

-قول حاضر واسكت يا بني خلي المشوار

يعدي علي خير... وقولي بقي البيت فين

-حاضر ياوالدي... البيت مش بعيد أوي...

ادخل اول طريق يمين... وبعد كده تاني

يمين هتلاقي البيت في وشك

-ربنا يجعلنا من اهل اليمين يا بني... ماشاء

الله ياست منيرة خطوتك وسعت اهو

وجيتي لحد هنا كمان.. اشمعني لما



اقولك تعالى نروح نزور الحاجة والدتي  
يهجم عليك العيا من كل ناحية...  
وتطلع فيكي امراض الدنيا كلها

-بقولك ايه يا توفيق نزلني هنا انا مش  
رايحة لحد.. خد ابنك وروح انت وهو..  
انتو الاتنين كفاية علي بعض مش  
هتحتاجوني في أي حاجة معاكم

-ازاي ياامي انا ذنبي ايه... هو انا عملت  
حاجة عشان تقولي كده

الوالد ضاحكا: ياام عادل احنا الاتنين  
مالناش لازمة من غيرك... انتي حياتنا  
كلها... انتي عارفاني دايم كده بحب  
استفرك واهزر معاك من كتر الغلب  
اللي انا فيه.





لكن ما تتصوريش قد ايه انا كل يوم  
بحبك اكر من اللي قبله.. كل مرة  
تستحملي فيها استفزازي بحبك اكر..

ده انا كل يوم بعد صلاة الفجر.. بحمد  
ربنا انك بقيتي من نصيبي.

ولحد دلوقتي بدعي لوالدي الله يرحمه  
انه صمم رأييه وخالاني اتجوزك بعد ما  
كنت رافض اني ابص في وشك لما قالولي  
ان انتي قصيرة... احم احم قوم انزل ياواد  
مامتك وحشتني خليها تيجي تقعد جمبي

-ما احنا خلاص وصلنا يا ح.. ابقى خليها

تقعد جمبك واحنا راجعين ان شاء الله



والد عادل: ماشاء الله هو ده بيت العروسة  
جميل جدا، حلو اللون الموف مع البيج  
منظر كله بهجة وتفاؤل.. لكن هم  
ساكنين في الدور الأول، ولا الثاني، ولا  
التالت؟

عادل: هم ساكنين في الدور الثاني، لكن  
وقت المذاكرة عمر وليالي يطلعوا الدور  
التالت، والدور الأول فاضي الحج هاشم  
عامله مندرة كبيرة للمناسبات العائلية،  
وكممان بيستقبل فيها قرايبه أول كل شهر  
في جلسات وديتة، أو للصلح بين  
المتخاصمين

-بسم الله ماشاء الله، واضح ان الراجل  
شيخ عرب وبيفهم في الأصول كويس،  
عموما هنشوف دلوقتي انزل انت يا عادل مع



## فرکن العربیة

# ایڈک

## الباب.

## الخطوة يمشي ملكا ( ... )

## فتسمر عادل في مكانه من هول



الصدمة... ونظر الي أعلي بحثا عن  
الفاعل.. فلم يجد أحدا.

أدار ظهره بعيدا عن الباب، واتخذ قرارا  
قاطععا بالعودة الي منزله مرة اخري... فسمع  
صوتا أنثويا يقول.. اهلا بيكم يا عادل...  
اتفضلي ادخلي يا طنط منيرة ..

منيرة: في ايه ياليلي يابنتي... هم الجيران  
بتوعكم ما عندهم مش دم ولا ايه.. مش  
يبصوا تحت الأول قبل ما يدلقوا المية...  
عاجبك المنظر ده.

-انا اسفة يا طنط.. بس ما اعرفش مين عمل  
كده... الجيران بتوعنا مسافرين من  
اسبوع.. يمكن الشغالة بتنظف البيت  
عندهم.... اتفضل يا عادل واقف ليه...



(عادل محرج جدا من الطقم المبلول..  
وريحته الوحشة)

-اتفضل فين ياليلي... انا هروح اغير  
هدومي واجي ...

-لأ خليك مش مهم... انا عاجبني  
شكاك كده.... اللي جاين دول اكيد  
عمو توفيق وأميرة.. اتفضلوا... واقضين  
ليه.... بابا وماما في انتظاركم

-في ايه ياعادل يابني... المية دي جات من  
فين... هي السما مطرت فوق دماغك ولا  
ايه

-هي السما بتمطر مية وحشة ياوالدي...  
دول جيران الست ليلي



-عيب يابني ما تقولش كده.. يمكن مش  
واخدين بالهم... وبعدين البنت ذنبها ايه،  
اعذرينا ياليلي يابنتي

-انا اللي اسفرت يا حج اتفضل حضرتك  
وطنط منيرة... ولو الأستاذ عادل مش عايز  
ييجي.. براحتة... انتوا كفايتة علينا

-لا ازاى يابنتي ما ينفعش... ده احنا اصلا  
جايين عشانة... ادخل ياواد يا عادل  
-حاضر ياواليدي

-اتفضلي يا حجه

-----

أبو عادل: السلام عليكم... ازيك يا ابو  
عمر... ازيك يا حجة كريمه



أبو عمر: الحمد لله... اهلا وسهلا بيك يا  
ابو عادل... شرفتنا يا حجه منيرة... ايه  
رايكم تتفضلوا هنا في المندرة ولا نطلع  
فوق أحسن.

منيرة: لا ياريت خرينا هنا ، مش هقدر اطلع  
فوق دلوقتي

مامت ليلي: الف سلامة ليكي يا حجة  
منيرة.. مالك يا عادل يا بني ايه اللي عمل  
فيك كده

-مفيش حاجة ياطنط كريمته اسألي  
بنتك

-هو انتي اللي عملتي كده في الراجل  
ياليلي ...





رجع منهم... او الشغالة بتنظف البيت عندهم

-معلش يا عادل يا بني احمد رينا انها جات  
علي كده.. دي احسن من غيرها... اطلعي  
فوق ياليلي اندهيلي عمر بسرعت

عمر جاي سريع: انا جيت اهو، عايزة حاجه  
مني ياماما

**-تعال ياواد سلم علي الضيوف الأول...  
حاضر ياماما**

-ازیک یاعمو... ازیک یاعمتو....(وبنبرة  
ساخرة) ازیک یاستاذ عالم ادل عامل ایییه  
منورنا واللہ... ایہ الی عمل فیک کده



هاهاها... انت شغال غطاس في مجاري ولا  
ايه

-ابو عمر... عيب يا قليل الأدب يا عديم  
التربية... اطلع فوق وخذ عادل معاك  
خليه يغير هدومه... وهات الطقم لأختك  
تغسله ...

-انا اسف يا بابا مش بحب حد يلبس هدومي  
...

-هدومك أصلا مش هتيجي علي مقاسه...  
روح علي أوضتي خليه يلبس بدلتا من  
بتوعي ولم نفسك يا عمر

-حاضر يا والدي

-يللا يا استاذ عادل اتفضل علي فوق

-طيب يا عمر متشكر.. اتفضل انت الأول



والد عادل: تعالي هنا جمبي ياليلي

يابنتي

-حاضر ياعمي

توفيق: بسم الله ما شاء الله... العروسة زي  
البدر المنور... والله الواد عادل طلع اشطر  
من ابوه.. وعرف يختار اهو...

-الست كريمه... لا ما تقولش كده دي  
مراتك بألف وحده من ليلي... ربنا  
يخليها لك.. انت بس اللي مش عارف  
قيمتها كويس.

-ربنا يخليكي يام عمر... ولا يحرمني من  
ذوقك يا حبيبتي



-ابو عمر... والله يا حج توفيق ستات زمان  
دول نعمت كبيرة بس احنا اللي مش  
حاسين بيها... انا احتارت في بنات اليومين  
دول... لا نافعين في دراسة ولا حتي نافعين  
في شغل البيت.

البنات منهم فاكره نفسها أرشميدس ولا  
أرسطو في زمانه... وهي مش فاهمة حاجه  
في أي حاجه... تيجي تسألها اخر ما تخلص  
مذاكرة، الكتاب ده بيتكلم عن ايه..؟

تقولك مش عارفت... تقولها طب اشرحيلي  
الصفحة اللي كنتي يتذاكريها تقولك  
نسيت... طب اسم المؤلف... تقولك أول  
اسم والباقي مش فاكره..



ومن ناحية الأكل بقي هاتلي وحده منهم  
تعرف تعمل شوية بامية ولا ملوخية زي  
بتوع زمان..

عندك ليالي بنتي أول ما تعمل أكل ما  
تعرفش هي تقصد ايه.. ولا تعرف الأكل  
ناقص ملح ولا الملح زيادة... ولا محتاج ايه  
عشان يبقي كويس... اهو في حاجه غلط  
وخلص... ولما تتزق تعمل شوية مسقعة..  
حاجة سهلة كدة... يادوب شوية حاجات  
تحطهم علي البوتاجاز واهو اسمه أكل..  
وكمات تسمع أصوات مزعجة.. ودخان طالع  
وريحة شياط تحس ان في مخترع جوه  
المطبخ... ولا اينشتاين في زمانه ....



ياراجل ده حتي فنجان القهوة وكوبايت  
الشاي الواد حسونة بتاع القهوة بيعرف  
يعملهم احسن منها.

ابو عادل: والله فعلا معاك حق.. البنات  
دلوقتي عاملين زي الفاكهة اللي في غير  
معادها.. شكلها حلو من بره بس طعمها  
مر... وأول ما تاكلها... تخليك تكره  
الفاكهة واليوم اللي جبتها فيه... بس اهو  
احنا بنجيبها وخلاص عشان ما نحسش ان  
في حاجه ناقصة في البيت... ونبقي  
مطمنين ان عندنا فاكهة



كريمة: يعني شباب اليومين دول هم اللي  
عاجبينكم أوي... الواد منهم اول ما  
يكبر... ويبص في المراية ويلاقي شنبه  
طلع... يتقلب عذريت يبدأ يعلي صوته علي  
باباه ومامته... ويضرب في اخواته البنات...  
ويقعد علي القهوة... ويمسك السيجارة في  
ايده... ويرجع وش الفجر ولا يهمله حد...  
ولا في احترام للأب والأم، ولا حتي  
للأستاذ في المدرستا...

نادر أوي دلوقتي لما تلاقي فيهم راجل بجد  
ويقدر يتحمل المسئولية... واللي زي ده  
تعرفه من اول ما تشوفه... تحس كده انه  
زي الأسد وسط شوية تعالب... أوزي النسر  
وسط الغربان السود





منيرة: والله معاكى حق يا حبيبتي.. تسلم  
دماغك على الكلام الكبير أوي ده...  
ولا احسن دكتور في الجامعة يعرف يقوله

-أبو عمر... جري ايه يا جماعة احنا  
هنتخانىق من اولها ولا ايه.. ماتقومي يابت  
ياليلي تجيبى حاجة للناس تشربها ...

-حاضر يا بابا أصل عمو قالى تعالى اقعدى  
جمبى... انا هجيبلكم الحاجه الساقعه  
فورا دلوقتى... بعد اذنكم

( -توجهت ليلي ناحية المطبخ، ثم حضر  
عادل وعمر)

-عمر .. اتفضل انزل يا عادل مكسوف ليه



-ماشي ياعمر الله يسامحك علي اللي انت

عملته فيا ده

-اسمع كلامي.. وما تخافش بابا هيحبك

أوي لما يشوفك كده

-طيب لما نشوف

السلام عليكم يا جماعة.. اسف جدا علي

التأخير.. اصل عمر اتأخر اوي علي ما

جابلي البدلة دي

-ام عادل.... ايه يابني اللي انت لابسه

ده... كنت فضلت بلبسك المعفن اهو

كان علي الأقل احسن من كده...

عاجبك المنظر ده يام ليلى

-ايه ده ياواد ياعمر... جبتها من فين

البدلة دي



-من هدوم بابا ياماما.. انتي مش عارفه

هدوم جوزك ولا ايه

-لأ عارفاها ياعمر... بس مالقيتش غير

البدلة دي تجيبها له

-هو اللي وافق... اصل انا قولتله لو عايز

بابا يحبك أوي البس البدلة دي... قالي

ماشي موافق

-ابو عادل: ايه اللي انت لابسه ده يابني...

مالقيتش غير دي تلبسها... هي البدلة دي

بتاعتك يا ابو عمر..؟!

-لأ مش بدلتني بس البدلة دي بالذات أغلي

وأعز حاجة عندي في هدومي كلها

-ليه يا حج خير هي بتاعة مين



-البدلة دي بتاعة واحد جارنا غلبان كان  
بيشتغل كومبارس في السينما... وبيعمل  
بيها دور واحد من الصعاليك... كانت  
أغلي حاجة عنده.. ومات وهي في حضنه...  
بس ياخسارة بعد ما مات أولاده اللي كان  
بيشتغل كومبارس وبيتعب عشانهم.. رموها  
في الشارع مع كل حاجته... فخلت عمر  
راح جابها من فوق التراب، ولو كانوا طلبوا  
فيها كنوز الدنيا كلها كنت اشتريتها  
منهم .

انما للأسف دول جاحدين وأغبياء، ومفيش  
في قلوبهم رحمة... باعوا ذكريات ابوهم  
وأغلي حاجة عنده ببلاش...

ياريت نقري الفاتحة بصوت عالي يا جماعة



-عمر... فاتحة الخطوبة بتاعة عادل

وليلى يابابا

-لأ يابني احنا هنقري الفاتحة علي روح

المرحوم الأول

-عادل... هي ايه الحكايتة يا حجه

كريمة.. عايزين تطردونا من بيتكم

بالذوق ولا ايه... ابنك يخليني اعمل دور

صعلوك... والحج يقلب القعدة كلها نكد

في نكد... ده وقت ذكريات حزينه

برضه

ليلى جات.. في ايديها صينيه

اتفضلوا الحاجه الساعه يا جماعة

مين ده اللي واقف عند بابا ياماما.



-ده عادل خطيبك يابنتي... ومش عايزة  
منك ولا كلمه...الحكاية مش ناقصة...  
سيبي الحاجه الساقعة هنا... واطلعي  
اغسلي هدوم عادل بسرعه

(ليالي انفجرت من الضحك... الصينية  
وقعت... الكوبايات اتكسرت... غرقت  
المكان)

-مامتها قربت تتشل... اطلعي يابنت  
المجنونة اغسلي الهدوم زي ما قولتلك  
-حاضر ياماما ( وتواصل الضحك وتخرج  
بسرعه)

-ابو عمر... حقك علينا ياسيدي... خد  
البس العباية دي بتاعتي انا ماتخافش،  
لحد ما ليالي تغسل الهدوم.. نكون احنا



خلصنا كلام في تفاصيل الشبكة والمهر  
ومؤخر الصداق والقايمه

-اتفضل يا حج طلباتك ايه

-حجر معسل وشاي خمسينه... انت بتكلم  
زيون علي قهوة يابني عشان تقول طلباتك  
ايه

-عادل وشه مكشر... امال اقول ايه  
حضرتك

-تقول (ايه المطلوب مني عشان حضرتك  
توافق علي زواجي من بنتك ليلي)

-و دي تفرق في ايه يا حج.. عموما حاضر...  
ايه المطلوب مني عشان حضرتك توافق  
علي زواجي من بنتك ليلي





-بص يابني انا عامل حساب اللحظة دي من  
زمان.. وعاهدت نفسي اني ازوجها للشخص  
اللي يكون عارف قيمتها ومش مهم يكون  
غني او فقير....صعلوك أو أمير...

انا ليلي بنتي ملكة جمال بنات العيلة ....  
كل قرايبنا شايفينها في نظرهم اجمل  
بنت في الشك، والأدب، والذوق،  
والأخلاق ...

واكثر من نص شباب العيلة طلبوا الزواج  
منها لكن انا اللي رفضت... مالمقيتش فيهم  
حد مناسب... منهم اللي فاشل في دراسته...  
ومنها اللي لسه بياخد مصروف من باباه ...



ومنهم اللي فاكر نفسه يقدر يشتريها  
بفلوسه... والباقي مدمنين مخدرات ...

ولحد دلوقتي مش لاقى الراجل اللي  
يستاهلها بجد ويعتبرها كنز ويحافظ  
عليها طول حياته.

عادل: ربنا يكرمك يا حج

ابو عمر: بص يا عادل يا بني انا الفلوس ما  
تفرقش معايا... الحمد لله عندي منها  
كثير... ومش محتاج حاجه من حد  
وكم ان مستعد اتحمل جميع تكاليف  
الزواج... من تجهيز الشقة بكل لوازمها،  
والفرش، والديكور، والمأذون، والفرح لحد  
ان شاء الله ما تدخل بيتك انت  
وعروستك.



لكن طبعاً ما ينفعش أنا اعمل كده  
لسببين

السبب الأول انك لو وافقت علي الوضع ده  
يبقي انت انسان تافه... وهتخليني اغير  
رأيي فيك.. واقولك ما عنديش بنات  
للزواج

عادل: والسبب الثاني

السبب الثاني اني لو عملت كده عيلتي  
كلها تزعل مني ويقولوا اني اديتها لك  
ببلاش.... بعد ما أولادهم كانوا بيتمنوا  
رضاها ...

وكمان مش عايز بنتي تحس انها أقل من  
بنات عمها.. ولا أقل من أي بنت في العيلة  
-يعني ايه المطلوب مني دلوقتي يا حج



-بص يا بني... انا اللي عجبني فيك  
نجاحك في دراستك... واجتهادك انك  
تلاقي شغل.. والصبر علي السفر والغربة....  
وفوق ده كله انك عارف ربنا كويس....  
فأنا معتبرك واحد منا .. وهجوزها لك  
علي أقل مستوي عندنا في العيلة... يعني  
زي منار بنت أخويا حسن اللي تزوجت أشرف  
ابن عمها

-ومنار دي تزوجت ازاي يا حج

-أشرف ما جابهاش غير ربع كيلو ذهب... و  
100 الف جنيه مهر... و 200 الف مؤخر...  
وقايمة بنص مليون جنيه... ده غير بيت 3  
أدوار خاص بيها لوحدها... يرضيك بنتي  
ليلي تبقي أقل من منار مرات أشرف..؟!



-في ايه يا عادل يا بني.. شوية مية للعريس

يا عمر بسررعه يا عمر

-اتكلم يا عادل مالك حصل ايه

عادل بعد ما فاق: مفيش حاجة يا حـجـ

حسيت مرة وحدة اني سقعان والمكان فجأة

بقي ضالمة... ومابقيتش شايف أي حاجة...

والدنيا لفت بيا... بس انا دلوقتي بقيت

كـويس... اتفضل يا عمي كـمل

كلامك... حضرتك كنت بتقول ايه....

اه صحيح افتكـرت... يـلا نمشي يا والدي انا

اسف تعبـتـك معايا

-ابو عادل.. اهـدي يا بني لما الراجـل يخلص

كلامه



-كلام ايه تاني ياوالدي... انا أجيب منين

ربع كيلو ذهب و 300 ألف جنيهه وبيت 3

ادوار وقايمته بنص مليون جنيهه عشان

اتزوج ملكة جمال بنات العيلة.... انا مش

أشرف ياعمي عشان أجيب ده كله...

وكم ان سمعت ان اخو أشرف عايز

يتجوزها...عموما الف مبروك، وربنا يتمم

بخير.. سلام عليكم

هاشم: استني يا عادل واسمع كلام

والدك... انا لسه ما خلصتش كلامي..

اقفل الباب وتعالى اقعد جنبى هنا

-حاضر يا حاج.. اتفضل حضرتك كمل

كلامك



بص يابني... انا لو عايز اجوزها لأي حد  
تاني ما كنتش قابلتك... وممدوح اخو  
اشرف فعلا طلب الزواج من ليلى لكن انا ما  
وافقتش... ومن ساعتها أخويا رافض  
يكلمني... وما حاولش حتي انه يفهم  
اسباب رفضي لابنه ...

ولما تعبت ودخلت المستشفى الشهر اللي  
فات... مالتيتش حد من اخواتي جمبي...  
ومفيش حد منهم حتي اتصل يظمن عليا

وبصراحه يابني... انا كان نفسي اوافق  
علي زواجها من ابن اخويا يمكن ده كان  
هياخيلنا تقرب من بعض اكثر.. لكن  
مروان شخص تافه ومستهتر.... ولما جالي  
هنا يطلب ايد بنتي سألته هتشتغل ايه بعد  
الزواج... رد عليا بكل وقاحة وقال: ايه





اللي يخليني اشتغل ياعمي مادام بابا  
بيصرف علينا ولما يموت هيسيبنا فلوس  
كثير، تكفيينا طول العمر ..

شخص مادي عديم الرجولة... يبغي ازاي  
استأمنه علي بنتي.. واحد زي ده مش  
ممکن يحافظ علي مراته او يخاف عليها...  
وتلاقيه اول ما يزهق منها يرميها في  
الشارع... ويدور علي وحده غيرها

اللي زي ده عمر الفلوس ما تعمل منه  
راجل... وحرام اني اجوزه بنتي حتي لو  
كانت النتيجة اني أخسر اخويا... انا  
مستحيل اضحي ببنتي عشان اكسب رضا  
اخواني او قرايبي



-بصراحة يا حـج انا محتار د لوقتي ومش  
عارف أقولك ايه... لكن سعيد جدا انك  
وافقت علي زواجي من ليالي رغم انك  
رفضت ناس كتير ...

وفي نفس الوقت انا لسه في بدايت  
حياتي... ومش هقدر انفذ اللي حضرتك  
قولت عليه.. وكنت اتمني اجياك في  
الوقت المناسب اللي تكون فيه ظروف  
احسن من كدة... وكان نفسي كمان  
اروح بيتنا مبسوط النهاردة وفرحتي تكمل  
بزواجي من ليالي

-بص يا بني... انا مش متعمد اخرجك  
قدام اهلك... بس ده حقيقي أقل مستوي  
عندنا... ولو كنت وافقت علي اي حد من  
شباب العيلة كان هي جيبها أضعاف اللي انا



طلبته منك.. لأن دي عاداتنا وتقاليدينا  
اللي احنا تربينا عليها ومحدث قدر يغيرها  
من سنين فانت

عادل: لكن ياعمي .....

هاشم يقاطعه: اسمعني كويس يا عادل....  
انا هسالك سؤال واحد دلوقتي...  
وتجاوبني بصراحه

-انت شايف ليلي بنتي تستاهل المهر  
والشبكة اللي طلبتها منك ولا لا... يعني  
لو كانت ظروفك تسمح انك تجيبها ده  
كله هتوافقك ولا تقول ده كثير عليها..  
؟

-بصراحه ياعمي.. انا ما شوفتش ليلي غير  
مرتين... وصعب اني أحكم عليها



د لوقتې... ومش عارف هيبقي ايه أسلوبها  
وتصرفاتها معايا بعد الزواج... انا بسمع ان  
البنات بتكون هادية وطيبة في فترة  
الخطوبة... بس بعد الزواج بتكون حاجة  
تانية... تبقي عصبية ونكديت ومش  
طايفة حد يكلمها... ولا عايزة حد  
يقولها ده صح وده غلط ...

لكن في الحقيقة ياعمي انا حبيت ليلي  
بجد من اول مره اتكلمت معاها... وطول  
الفترة اللي فاتت دايمًا صورتها كانت علي  
بالي... بقيت بشوف ملامحها في كل  
الوجوه حواليا... وبسمع صوتها وضحكها  
طول الوقت... حتي لو قاعد لوحدي في  
اوضتي... حسيت انها بقت روحي



بتصاحبني في كل مكان... ومش قادر  
افارقها ولا عايزها كمان تفارقني ...

وكمان حبيتها اكثر بعد الموقف  
السخيف اللي حصل النهاردة... لما قالتلي  
ادخل يا عادل بهدومك وماترجعش  
بيتكم دلوقتي انا عاجبني شكك  
كده.

وأيا كانت تصرفاتها بعد الزواج انا  
هستحملها وهفضل احبها لحد اخر يوم في  
عمري... ليلي دلوقتي ياعمي بقت اهم  
حاجه عندي واكبر حلم في حياتي  
واتمني اني احققه.

-كويس يا بني طمنت قلبي ...



دلوقتي بقي ركز معايا في الكلام اللي  
هقولهولك يا عادل

بخصوص المهر والشبكة والمقدم  
والمؤخر ده كله ما يهمني... انا مش  
بتاجر بليالي بنتي... ولا عامل عليها مزاد  
واللي يدفع اكر ياخدها ...

ومهما كانت قيمة المهر والشبكة مش  
هتكون سبب في سعادتها... ولا حتي  
هتقدر تعوضها عن الانكسار والندم اذا  
تعرضت للظلم بعد زواجها... وكنوز الدنيا  
كلها ما تساويش عندي دمة وحدة من  
ليالي في حال فشل الزواج لا قدر الله ...



والكلام اللي قولتهولك عن المهر  
والشبكة... ده كان لمجرد العلم بالشئ  
مش اكثر...

لكن انا يابني مش هتعامل معاك بميزان  
العادات والتقاليد.. وكلامي كله معاك  
سواء قبل الزواج او بعده هيكون حسب  
الشرع والدين

عشان انت كمان بعد الزواج تنسي موضوع  
العادات والتقاليد... وتعيش مع بنتي  
بتعاليم القرآن الكريم وأخلاق  
الرسول "صلي الله عليه وسلم" وما تزعلش  
لو لقيتها في يوم بتخالف عاداتكم  
وتقاليدكم اذا كانت غير متوافقة مع  
الدين





مفيش حاجة يابني دمرت المجتمع غير  
تمسكنا بالعوادات والتقاليد علي حساب  
دينا... وبقينا بنخاف من المخلوق اكتر من  
الخالق... ونقول ده عيب وده صح وغلط  
ونسينا كلمة الحلال والحرام

مع ان ربنا بيقول في كتابه العزيز  
"ولو أن أهل القرى آمنوا واتقوا لفتحنا  
عليهم بركات من السماء والأرض ولكن  
كذبوا فأخذناهم بما كانوا يكسبون"

-ويمان عندي ليك نصيحة قالها لي  
جدي الله يرحمه قبل ما يموت... ووصاني  
اني اكتبها في لوحة واعلقها في بيتي،  
واني اكتبها كمان للأولاد بعد زواجهم...



هتلاقيها مودة علي يمينك فوق  
مكتوب فيها

( الحب والمودة من عند الله... وما عند الله  
لا تناله الا بطاعته )

يعني مستحيل يابني أي بيت يبقي فيه  
بركة وحب ومودة الا اذا كانت الأسرة  
كلها متمسكة بتقوي الله عز وجل... لأن  
جميع أفراد العائلة عبارة عن مجموعة من  
الأركان لو فضلت ثابتة كلها هت حافظ  
علي استقرار البيت لكن اذا اختل منهم  
ركن واحد.. وتخلي عن دوره تأكد ان  
السقف مصيره السقوط... والضرر غالبا  
هيبقي علي الجميع.

عادل: فعلا معاك حق يا عمي



هاشم: ودلوقتني يابني نرجع لموضوع المهر  
والشبكة

انا اتكلمت مع إمام المسجد النهاردة...  
فالراجل قال ان مفيش حد معين لقيمة  
الصداق لكن الرسول "صلي الله عليه  
وسلم قال" أَعْظَمُ النِّسَاءِ بَرَكَتًا أَيْسَرُهُنَّ  
صَدَاقًا"

وقال سيدنا عمر بن الخطاب: لا تغالوا  
صداق النساء فإنها لو كانت مكرمة في  
الدنيا أو تقوى عند الله كان أولاكم  
وأحقكم بها رسول الله صلى الله عليه  
وسلم"



وفي عهد الصحابة كان مهر النساء علي  
غير القادر أو الفقير انه يحفظها ايات من  
القرآن الكريم

ولكن اذا كان الرجل غني وباستطاعته  
اكثر من كده فهو في الحالة دي ليه  
مطلق الحرية انه يحدد قيمة المهر ولو  
كانت بقنطار من الذهب او الفضة... لأن  
ربنا قال في القرآن الكريم " وآتيتهم  
إحداهن قنطارا"

-يعني باختصار يا بني المقدم والمؤخر  
هيبقي عبارة عن مبلغ رمزي... وبالنسبة  
للشبكة هتكون في حدود  
امكانياتك... او أقل كمان (لا يكلف  
الله نفسا الا وسعها )



صحيح يا بني ما قولتليش انتو هتعيشوا  
فين بعد الزواج ان شاء الله

-انا اشتريت الشقة اللي قصادنا في نفس  
العمارة... بصراحه يا حج والدي ووالدتي  
محتاجين اني اكون جنبهم الفترة  
الجايته... وانا كمان نفسي اكون قريب  
منهم مش عايز أعيش حياتي كلها بعيد  
عن اهلي حتي بعد ما رجعت لبلدي

-ربنا يخليك لأهلك يا بني... ماشاء الله  
عليك يا ابو عادل عرفت تربي بجد

-بارك الله فيك يا ابو عمر... وبعد  
الكلام الجميل اللي سمعته منك ده انا  
كمان متأكد انك عرفت تربي اولادك  
كويس



-بصراحة يا حـج انا ما عرفتش اربي غير  
ليلي... انما عمر انا بعترف اني فشلت في  
تربيتـه... الست مامتـه مدلعاه حبتين..  
ومعظم مشاكلنا انا وهي بسببه... لحد ما  
خلاص تعبـت وقولتلها انا كفايتـه عليا  
ربيت ليلي

عمر: ليه كده يابابا ده انا بحبك أوي  
وبسمع كلامك... ولا ايه رأيك ياماما  
كريمـة: الله يسامحك يابني دايمـا  
كاسفني كده... الحق مع والدك انا فعلا  
دلعتك أوي... ياريتك كنت اتعلمت  
الأدب والذوق من اختك... ربنا يخليكي  
ويحفظك لينا ياليلي يابنتي



ليالي: ويخليكي ليا يا احلي ماما في  
الدنيا... انا غسلت الطقم اهو وبقي جاهز  
اتفضل يا عادل.

-متشكر يا انسة ليالي... اسف تعبتك  
معايا

-ابو عمر... متشكر ايه واسف ايه يا بني  
ليالي خلاص بقت خطيبتك... ولا انتي ايه  
رايك يا ليالي

-رايي في ايه يا بابا

-بلاش الهبل والحركات بتاعة البنات دي  
يا ليالي احسن اغير رايي

-حاضر يا بابا أنا موافقة يا بابا بس بشرط

-عادل.. اتفضلي قولي الشرط بتاعك

يا ليالي





-ليالي: شرطي الوحيد انك تقولي ايه سر  
التغيير اللي حصل فجأة ده... المرة اللي  
فاتت كنت هنا بطقم اهل كده وملون  
ازرق في اخضر وقميص كاروهات... وريحت  
البيرفيوم وحشه... وكنت ولا بس نضارة  
شمس تحت المطر... وكنت بتشرب  
العصير بطريقة غريبة... وكان اللي  
يشوفك يقول عليك بلياتشو... اوزي  
ماقال عمر اخويا شغال في..... سوري مش  
هقدر اقولها

ده غير انك دخلت علي السجاد بالشوز  
وخليته بقي طين وقعدنا 3 ايام نغسل فيه  
لحد ما نصف من تاني..

لكن المرة دي جاي بطقم شيك أوي علي  
احداث موضتة... والألوان جميلة جدا...



والبيرفيوم يجنن... وتسريحت الشعر  
جديدة وبقيت اتيكيت في اسلوبك  
وتصرفاتك وكل حاجه... وكان نفسي  
اشوفك وانت بتشرب الحاجه الساقعه بس  
يا خسارة وقعت... انا اسفرت هروح اجيبلكم  
غيرها

-لا استني ياليلي... عشان يبقي شربات بعد  
ما نقري الفاتحة ان شاء الله.. بس الأول  
هقولك سبب التغيير اللي حصل فجأة ده ...  
بصراحة هو مش تغيير ولا حاجه... لكن  
دي طبيعتي..

مش معقول واحد متخرج من هندسة...  
وبيشغل في اكبر شركة الكترونيات  
في السعودية ويبقي منظره بالشكل اللي



انتني شوقتيه ده... بس انا عملت كده  
لسبب مهم جدا... كنت عايز اعرف ايه  
اكثر حاجة ممكن تافلت نظرك في  
الشخص اللي قدامك... سواء كان شكله  
او طريقة تفكيره

ليلي: مش فاهمة

عادل: كل انسان ياليلي عبارة عن  
صورتين... صورة منهم للهيئة والجسد  
والشكل الخارجي.. والتانية للروح والقلب  
والضمير... احيانا تلاقي شخص جميل  
جدا... شكله وسيم وجذاب... و يلبس  
علي احدث موضة... زي بتوع السيما لكن  
من جواه شخص مغرور ومتكبر... اناني  
يحب نفسه.. عديم الاحساس والقلب  
والضمير.. ولا يفيد المجتمع بأي شئ.



واحيانا تلاقى شخص عادي جدا ماحدث  
يهتم بوجوده.. لكن عايشه جواه روح  
قديس او راهب... متواضع يحب الصغير  
ويحترم الكبير... ويتمني الخير لجميع  
الناس ..

وانا كنت عايز اعرف انتي هتشفيني بأي  
صورة منهم... يعني ده كان اختبار  
ليكي... وتقريبا انتي نجحتي في الاختبار  
-مامت ليالي... أيوة صحيح يا بني، نجحت  
فعلا... انت ما سمعتهاش قالت عليك ايه  
المرة اللي فانت ...

-علي فكرة ياماما خالتو كانت عايزة  
تكلمك في حاجة مهمة امبارح  
وبتقولك ابعتيلها عمر يصلح جهاز



الكمبيوتر عشان عايزة تكلم بنتها اللي  
متزوجه في السعدية بتقول ان في  
مشكلة بينها وبين زوجها

كريمته: ينفع كده ياليلي لسه فاكرة  
دلوقتي... ايه اللي واخد عقلك... ده  
احنا لسه عارفين بعض من اسبوع يابنتي

-مفيش حاجة ياماما... انا هقوم اجيبلكم  
الحاجة الساقعه

-ابو عمر.. لا استني لما نقري الفاتحة  
ياليلي..

-عمر... مفيش فاتحة ولا جواز يابابا غير  
لما تاخدو رأيي انا الأول... ولا انا واحد من  
الجيران جاي هنا يسمع ويضحك... ويقول  
حاضر ونعم وخلص...



وبعدين انا مش صغير كمان يعني لازم  
العريس ياخذ رأي اخو العروسة

-عادل... اتفضل يا عمر قول رأيك في

زواجي من اختك ليلي

-انا موافق بس بشرط واحد

-ايه هو الشرط المهم ده

-لا انا احب اقول لهولك بيني وبينك

-عمر يهمس في أذن عادل ( الميته اللي

وقعت عليك من فوق انا السبب فيها

وشرطي الوحيد انك تسامحني... انا بحب

ليلى اختي اوي وما كنتش عايزها تبعد

عني، يوم واحد حتي)

-عادل انا مسامحك يا عمر



-عمر... اتفضل ياابا اقرى الفاتحة

-والد عادل... علي بركة الله.. نقري  
الفاتحة دلوقتي ياابو عمر.. والخطوبة ان  
شاء الله تبقي زي النهاردة خير البر عاجله  
-ابو عمر... علي بركة الله

-----

العروسة في الجامعة

ليلى: المحاضرة النهاردة كانت رخصة اوى  
ياسمر.. المعيد الجديد بنى ادم تافه..  
ودمه ثقيل.. وما كنتش فاهمه منه اى  
حاجه ...

سمر: الظاهر انه معجب بيكي ياليلي...  
طول المحاضرة كان دايمما يبص عليكى..  
كأن مفيش حد غيرك فى المدرج.. ده





حتي الطلبة كلهم لاحظوا الموضوع ده..  
وفي ناس كثير سألتني عن العلاقة اللي  
بينك وبينه

-بسرعة كدة خليتوها علاقة... شكلي  
كده هسيب الجامعة واقعد في البيت  
بسببكم... انا ما صدقت انسي اللي حصل  
من بسمة وصاحبها... حرام عليكم هو  
مفيش غيري انا في الجامعة ولا ايه

-بصراحه ياليلي.. انتي كمان كنتي  
متوترة وحركاتك بتقول ان في حاجة  
بينكم... ومره تبصي في الساعة.. ومره  
تبصي في الموبايل... المدرج كله كان  
مركز معاكي انتي والمعيد النهارده...  
وناسيين ان دي المراجعة النهائية قبل  
الامتحان



-يامصيبتي السوداء.. حتي انتي ياسمر  
بتفكري زيهم.. من امتي وانا بعمل علاقة  
مع حد... انا فعلا كنت متوترة لكن مش  
ده السبب

-امال ايه السبب ياست ليلي

-بصراحة ياسمر من اول ما دخلت  
المحاضرة لقيت رقم غريب بيرن عليا...  
وانا عندي فوبيا من الأرقام الغريبة  
دايما... بخاف يكون بابا تعب في الشغل..  
او عمل حادثة بالعريية... او في حاجة في  
البيت لا قدر الله... وكان نفسي المدرج  
يولع... عشان أخرج واشوف مين اللي  
بيكلمني



-ياساتر يارب ايه الخيال الأوفر ده.. ان شاء  
الله مفيش حاجة وحشة.. تفائلي خير  
ياليلي... طب ما رديتيش ليه وانتي جوه ..  
ما احنا بنعمل كده عادي يعني

-لأ ما قدرش اعمل كده بحس ان دي  
حاجة غلط وبخاف اتعرض للإحراج من  
المعيد... وكمان بطلت استأذن في وسط  
المحاضرة من بعد ما اتكعبت المرة اللي  
فانت والناس كلها ضحكت عليا... انا  
هرن علي الرقم دلوقتي اشوف هو مين  
وعايز ايه

-استني ده بيرن عليا اهو ...

-الو مين حضرتك

-انا عادل ياليلي



-عادل مين حضرتك

-انا عادل خطيبك ياليلي.. لحقتي

تنسيني

-لا ما نسيتش.. عايز ايه يا عادل دلوقتي...

انت مش عارف ان انا في الجامعة... وكمان

ليا ساعتين بكنسل عليك... وجبت منين

اصلا الرقم بتاعي...

-اهدي شوية ياليلي.. انا واقف قدام باب

الجامعة دلوقتي.. لما تيجي هشرحلك

كل حاجة

-يامصيبتك ياليلي... انا همشي دلوقتي

ياسمر ...

-في ايه يابنتي.. استني انا جايت معاكي

-لا مش هينفع خالص سلام



(الجامعة كلها شافت ليلي وهي بتجري  
ناحية الباب )

ليلي في لهجة حادة: عايز ايه يا عادل ايه  
اللي جابك هنا.. وما قولتش ليه قبل ما  
تيجي.. ازاي تيجي من نفسك كده من  
غير ما تقول لبابا حتي... اتكلم ساكت  
ليه

عادل يحاول تهدئتها: اتكلم ازاي وانتي  
في الحالة دي... اهدي ياليلي واسمعيني انا  
هقولك كل حاجة

-حاضر يا استاذ عادل... انا هديت اهو...  
اتفضل اتكلم... جيت هنا ليه

-انا كلمت والدك الصبح عشان استأذن  
منه نروح نجيب الشبكة انا وانتي



ومامتك... فقالي الموضوع مش مستاهل  
الزحمة دي كلها خد الامور ببساطته...  
تعالني في اي يوم خد ليالي وهاتوا الشبكتة  
اللي تناسبكم.. قولتله ينفع اجي  
النهاده... قالي ليالي في الجامعة دلوقتي...  
فاستأذنت منه اجياك هنا وبصراحه هو  
وافق بصعوبة ...

اصلك وحشتيني بجد ياليلي وكان نفسي  
اشوفك دلوقتي

-وجبت رقمي منين أكيد من ماما ...

-لا عمر أخوكي حبيبي هو اللي اداني  
رقمك

-ياسلام عمر بقي حبيبك دلوقتي... من  
امتي ده يااستاذ عادل



عادل: من ساعته ما ....

سمر: مين ده اللي انتي واقفه معاه ياليلي

ليلي: مفيش حد غريب ياسمر ده عادل

خطيبي... انتي ايه اللي جابك دلوقتي

سمر: مش انا وحدي اللي جيت يابنتي... ده

الجامعة كلها جات وراكي ياليلي... بصي

جوه الباب كده ...

ليلي: يانهار مالوش الوان... الناس دي كلها

جايه ليه... انتو عايزين مني ايه حرام

عليكم

سمر: اصلك ما شوفتيش نفسك عملتي

ايه بعد التليفون اللي جالك... الناس

كلها افتكرت ان في حاجه معاك...

جايين يظمنوا عليك





بسمت ( صديقتها السابقة ) في لهجة  
استفزازية

ما انتي حلوة اهو ياليلي... وبتكلمي شباب  
عادي.. وبتوقفني معاهم في الشارع  
كمان... قوليلنا بقي يا ابلة فضيلة هو ده  
احسن من حسام في ايه... علي الأقل  
حسام مش غريب... واهو ابن الجامعة اولي  
بيكي... و تحبو بعض في السر... مش في  
الشارع عيني عينك كده... ايه البجاجة  
دي كان في جرة وطلع لبره ...  
صحيح ياما تحت الساهي دواهي.

-عادل بعد ما ضربها بالقلم علي وشها..  
لولا انك بنت كنت رميتك تحت اقرب  
عريضة... الظاهر ان اهلك ما عرفوش



يربووكي وسايبينك زي الكلاب في

الشارع تنهشي في لحم اللي رايح واللي جاي

-تقدم حسام موجهها كلامه لعادل قائلاً...

انا مش بنت اهو وريني هتعمل معايا ايه

- ( حدث بينهما تشابك بالأيدي.. ثم

تدخل امن الجامعة.. وقام باحتجاز

الاثنين، لحين وصول سيارة بالشرطة التي

حضرت علي الفور .. )

صعد الأربعة الي السيارة ( عادل ويلي ) و

(حسام وبسمت )، وتوجه الجميع الي قسم

الشرطة.

-ضابط التحقيق: مين فيكم الاستاذ

حسام



-حسام: انا

-الضابط: اتفضل حضرتك تشرب ايه...

وشوف الانسة اللي معاك كمان

حسام: مش عايز حاجة... انا لازم اخرج

من هنا بسرعة... قبل ما تحصل مصيبة

وانت تروح في داهية

-حاضر يا حسام بيه.. ياريت حضرتك

تهدي شوية... انا بعمل محضر اثبات حالة

للجرح اللي في دماغك... وطريقة التعدي

عليك... وتعرضوا علي النيابة...

وتفضل تمشي.. والاستاذ ده يشرفنا هنا

تاني



-عادل: يتفضل يمشي ازاي اذا كان هو  
اللي اتهجم عليا.. هي البلد دي هتنصف  
امتي

-اسكت مش عايز ولا كلمت... انت مش  
واحد بالك عملت ايه في حسام بيه...  
ومين السنيورة اللي معاك دي.. انتي بقي  
اللي اسمك ليلي سبب المصايب دي  
كلها... ده انتوا هتشوفوا ايام سودا...  
خليكوا واقضين هنا لحد ما اكتب  
المحضر وتروحوا للنيابة

حضر العقيد هاشم ثم دفع الباب بقدمه  
اليمني وتقدم مسرعا ناحية الضابط قائلاً:  
نيابة ايه اللي انت بتقول عليها ياكابتن...  
انت مش عارف دي تبقي مين هي واللي  
معاها... انت اكيد اتجننت ..



-الضابط ل حسام ( قوم اقف يالا انت  
والبنت دي)

اهلا وسهلا هاشم بيه، من فترة ما اتشرفناش  
بحضورك، اتفضل ارتاح هنا مكاني...  
هروح اجيب لحضرتك حاجه ساقعه  
بسرعة

العقيد هاشم غاضبا: استني هنا انا مش  
جاي اقعد ولا اتضايف... انا هاخذ بنتي  
ليالي وعادل خطيبها ونمشي من هنا فورا  
الضابط في تأدب: حاضر يافندم، بس انا  
كتبت المحضر والأربعة كلهم مضوا  
عليه دلوقتي



العقيد هاشم محذرا: المحضر يتقطع حالا  
وقد امني دل وقتي.. والواد والبنت دول  
يتأدبوا... وما حدش يخرج منهم غير باذني

-حاضر يافندم.. تحت امر حضرتك

-يللا يابنتي.. يللا بينا يا عادل

-حاضر ياعمي اتفضل حضرتك

-ليالي ( ساخرة ) سلام يابسمت... سلام  
يا حسام بيه ثم تبعتهما بضحكات ساخرة  
وقالت: قولتلكم مليون مرة ابعدوا عني..  
هي دي اخرة اللي ما يسمعش كلام ليالي

-----

يادبلت الخطوبة عقبالنا كلنا



بمجرد ان خرج الثلاثة من قسم الشرطة  
شاهدوا العشرات من طلاب الجامعة  
يتقربون وصولهم... تسمرت ليلى مكانها  
ولم تتحرك خطوة واحدة.. بينما وقف  
عادل مندهشا من هذا الحشد الرهيب.. ثم  
همس في أذن ليلى قائلاً

-يانهار ابيض هي الناس دي كلها جايت  
لمين

ليلى: مش عارفه.. بس حسام وبسمة ليهم  
صحاب كثير في الجامعة يمكن جاين  
عشانهم

بعد ثوان معدودة.. التف الجمهور حول  
العروسين عادل وليلى وبدأوا يهتفون  
شكرا هاشم بيه... جبتلنا ليلى وعادل





من جوه القسم يابيه... وعدلت الحال  
المایل

اندفعت سمر من بين الطلاب واحتضنت  
ليلى قائلة

-حمد لله علي سلامتك يا حبيبتي..

كفارة يالولا

ليلى: بطلي رخامة يابت وقوليلى الناس دي  
كلها جايت هنا ليه

سمر ضاحكة: بصي ياستي... بعد اللي  
حصل قدام الجامعة انا ما سكتش.. ورحت  
للطلبة اللي كانوا واقفين يتفرجوا  
وقولتلهم كل حاجه... عشان كده هم  
اتفقوا يردولك اعتبارك وياخدوا حقك  
من الاتنين... وكتبوا مذكرة مضي عليها



الف طالب وقدموها لإدارة لتأديب حسام  
وبسمته وممكن توصل لفصلاهم من  
الجامعة...

-ياااااه كل ده عشاني انا... بس ماكانش  
له لازمة ييجوا دلوقتي... هي الناس دي  
كلها جات ازاي ياسمر

سمر: اخدنا اذن من الادارة وجبنا 3 باص  
كبير من بتوع الجامعة... وكل اللي معاه  
عربيته عملها ميكروباص ركب فيها اللي  
يعرفوا واللي ما يعرفوش

وجايين دلوقتي عشان يقضوا في صفك  
انتي وعادل... ويشهدوا معاكم في  
النيابة... انا نسيت ان باباكي عقيد في  
الشرطة وأكيد هيعرف يطلعكم بسهولة



ليالي مبتسمة: الحمد لله ... بس انا  
مبسوطه اوي بالمنظر ده.. ولا ايه رأيك  
يا عادل

عادل في سرور: انا كمان فرحان اوي... اول  
مرة احس بالأمل ان ممكن بكره يكون  
أجمل.. والشباب الواعي اللي قدامك ده  
ممكن يغير حاجات كتير في المستقبل

العقيد هاشم: طب احنا هنوقف كده  
كتير.. ولا انتوا مبسوطين بالمنظر ده  
وفاكرين نفسكم أعضاء في مجلس  
الشعب انت وهي...؟

ليالي تعانق والدها: طبعا هنمشي يابابا بس  
ما ينفعش اسيب زمايلي كده لازم اعزمهم



عندي في البيت... ولا ايه رأيك يا حج  
هاشم يا ابو الكرم كله

هاشم: انتي مجنونة يابت دول اكر من  
500 طالب هنعزمهم فين دلوقتي

ليالي: ماليش دعوة يا بابا.. حضرتك تقدر  
تتصرف.. ولا انت عايز تكسفي قدامهم

الوالد: مين ده اللي يقدر يكسبك يالو ولا  
... انا موافق ولو قد هم عشرين مرة  
كمان... هو انا عندي كام ليالي... يلا  
بينا علي البيت

سمر تهتف في سعادة: ايه رأيكم نحتفل  
بالخطوبه النهاردة بالمرة.. هيبقي يوم  
تاريخي ياليلي... بعد إذن حضرتك طبعاً  
يا اونكل هاشم



هاشم: انا ما عنديش مانع... لو العروسين  
عايزين كده

سمر: ايه رأيك ياليلي

ليالي في دهشة: حفلة ايه اللي نعملها  
دلوقتي ياسمر... انا ما جبتش فستان  
الخطوبة... ولازم اروح الكوافير... انتي  
اكيد اتجننتي

سمر: انتي عندك فساتين سهرة كتير...  
ولا نسيتي يوم ما رحنا خطوبة منار  
صاحبتنا... والناس كلها افتكرت انك  
انتبي العروسة... وبالنسبة للمكياج  
ما تخافيش انا هساعدك فيه.... ولو ده  
جنان اتجنني... مش انتبي اللي بتقولي  
كده دايمًا.. ولا ايه رأيك يا عادل



عادل في حماس: انا موافق طبعاً.. نفسي  
افرح من زمان.. وأكيد بوجود شباب زي  
الورد كده الفرحة هتكون اكبر  
بكثير... وكمان بابا وماما مش هيزعلوا  
من حاجه زي دي... احنا نروح نجيب  
الشبكة وبعدين نوصل البيت ناخذهم  
معانا

سمر: قولتي ايه ياليلي... وافقي بقي  
الراجل عايز يفرح واحنا كمان عايزين  
نفرح بيكي

(شباب الجامعة بصوت واحد يهتفون ...

ياليلي... يا جميلة... خلي الخطوبة  
الليلة ...

ياليلي يا جميلة وافقي وفرحينا)



ليلي: ما عنديش مانع.. انا موافقة بس  
بشرط ...

سمر: ايه هو

ليلي: انك تباتي معايا النهاردة... وتفضلي  
سهرانه كمان للصبح... غير كده مش  
هوافق

سمر: لحسن حظك خالتي عندنا  
النهاردة.. بس انتي عارفه ان عمري ما  
عملتها لكن عشان خاطرك هكلم ماما  
واستأذن منها.. واكيد هي هتوافق بعد ما  
تعرف الموضوع خصوصا انها بتحبك اوي  
ودايما بتحذرنني من كل صحابي الا انتي

ليلي: اوك تمام احنا موافقين يا بابا





هاشم: طيب علي بركة الله... خد  
خطيبتك وسمر يا عادل وروح هات  
الشبكة... وانا هاخد الشباب ونروح  
البيت... وما تحملش هم اي حاجه... انا  
هكلم عمر وهو هيقوم باللازم

عادل في بهجة: حاضر يا عمي... يلا  
ياليلي... يلا ياسمر

وصل الثلاثة بعد قليل الي ( محل  
الجواهرجي )

عادل: اختاري اللي يعجبك ياليلي.. وانا  
هعمل تليفون لبابا وماما وافهمهم اللي  
حصل... عشان يجهزوا بسرعة قبل ما نعدي  
عليهم ..

( ليلي اختارت حاجات بسيطة جدا )



عادل بعد عودته: ايه اللي انتي اختارتيه  
ده ياليلي..؟

ليالي: انا مش عايزة اكثر من كده...  
عندي ذهب كتير ومش عايزة حاجة  
تانية زيادة

عادل غاضباً: انا ماليش دعوة باللي  
معاكي.. انا فعلاً قولت لباباكي اني  
هجينب حاجة بسيطة بس مش للدرجة دي  
يا عروسة.. اتفضل يا حاج... خد هات قد  
دول خمس مرات كمان

ليالي: بس ده كتير يا عادل.. وبابا فهمني  
اعمل ايه، وانا ما قدرش أخالف كلام بابا

عادل: مالكيش دعوة انتي... انا هتفاهم  
مع باباكي في الموضوع ده.. وبعدين انتي



تستاهلي اكثر من كده بكتير  
يا حبيبتي... واوعدك اني اجيبك قدهم  
عشرين مرة كمان بس الأول أحقق اللي في  
دماغي

ليالي: لا استني لحظة وحده كده... انت  
قولت ايه دلوقتي

عادل: قولت هجيبك قدهم عشرين مرة  
لما احقق اللي في دماغي

-لا الكلمة اللي قبلها

-انا هتفاهم مع باباكي

-لا مش دي في كلمة تانية قولتها

بسرعه كده

-قصدك... مش كتير عليك

يا حبيبتي



-اه هي دي... متأكد ان انا حبيبتك بجد

يا عادل ..... !؟

-ايوة طبعا متأكد مليون في الميته... والا

ما كنتش قولتها

سمر: مش وقت حب وغرام دلوقتي

يا اساتذة.. عايزين نلحق الناس اللي

مستنيين عندكم في البيت ياليلي..

والايام جايت كتير بس اللي ما يزهدقش

من الثاني

عادل: انا عمري ما ازهدق من ليلي

\*الصائغ العجوز: ربنا يسعدكم يا بني...

وتفضلوا كده دايمما تحبو بعض طول

العمر... يا ااه فكرتني يا بني.... ياما ناس

كتير قبلك قالوا كده.. ودلوقتي بقي



حاله غير الحال.. حتي الذهب بتاعهم  
باعوه بعد ما اطلقوا.. خلاص.. مابقاش له  
لازمة معاهم

سمر: جرا ايه يا حجاج فال الله ولا فالك...  
في حد يقول كده لاتنين عرسان في  
بداية حياتهم... وانا بقول كل محلات  
الذهب زحمة الا انت

الصائغ العجوز: هي دايمما الحقيقة كده  
يابنتي... الناس كلها بتبعد عنها...  
ومحدث عايز يسمعها... انا بس بحذرهم  
من الدنيا وعمايها... والمحلات الزحمة  
اللي بتقولي عليها دي انا اللي بوردلهم كل  
الشغل بتاعهم



ليالي: عيب كدة ياسمر الراجل معاه حق  
برضه... شكرا علي النصيحة يا حج

عادل: ربنا يجمعنا علي الحب... في الدنيا  
والاخرة ان شاء الله... شكرا يا حج علي  
النصيحة... سلام عليكم

-----

في بيت العروسة

عمر يدخل مسرعا: مامااااااا... يااا  
مامااااااا... الحقي ياماماا... الحقيني  
يا حجة كريمة

كريمة متسائلة: في ايه يابني... عملت  
مصيبة.. ولا في حريقه في البيت ولا ايه...  
قول في ايه اتكلم يا وش المصايب



عمر: التتار داخلين علينا دلوقتي... جاين  
يحتلوا بيتنا ياماما.... الحقي اهربي قبل ما  
يدخلوا البيت ياست كريمه

كريمه في ذهول: اهرب فين يا ابن  
الموكوسه... تتار ايه اللي جاين دلوقتي  
ما تتكلم فهمني في ايه

عمر يلتقط أنفاسه: بابا اتصل من شويه...  
بيقول في ناس كتير اوي جاين بيتنا  
وهيعملوا خطوبه ليلي النهارده

كريمه مصدومه: خطوبه ايه يا ابن  
المجنونه... ده لسه باقي اسبوع.. هم  
غيروا المعاد وانا مش عارفه ولا ايه...  
وبعدين مين الناس اللي جايت كلها... احنا





قولنا الخطوبة هتبقى عائلية وفي اضي  
الحدود كمان

-ماانا قولت لبابا ده كله... ف قال الدفعة  
بتاعة ليلى كلها جايت تحتفل بالخطوبة  
هنا في البيت... وخالاني كمان اتصل  
بمحل الحلويات المشهور عشان يجهزوا علب  
الجاتوه والحاجات الساقعه... ويجيبوها هنا  
علي البيت بسرعة

كريمة تضرب كفا بكف: بابا  
اتجنن رسمي هو الراجل ده هيكبر امتي

عمر ضاحكا: ايه الكلام ده ياماما... ازاي  
تقولي كده علي جوزك ... طب علي  
فكره بقي انا هقول لبابا... ولا تجيبي  
100 جنيه واسكت



كريمت تتقدم ناحيت عمر: امشي من  
قدامي دلوقتي احسنالك... واعمل اللي  
باباك قالك عليه بسرعة

عمر مبتسما: انا عملت كل اللي بابا قال  
عليه... وعالب الجاتوه هتوصل بعد نص  
ساعه... سيبي ودني بقي ياماما... خلاص  
والله مش هقول لبابا أي حاجه ...

كريمت: طيب يللا اجري بسرعة في صوت  
عربيات كتير شكلهم وصلوا قدام البيت

(انتشر طلاب الجامعة كالنمل في  
الحديقة الخلفية بمنزل العقيد هاشم،  
وبدا الجميع في التقاط الصور أمام الزهور  
وأشجار الفاكهة... ثم بعد قليل حضر  
عادل وأسرته وليلي وسمر ...



وماهي الا دقائق معدودة حتي توقفت امام  
المنزل ثلاث سيارات محملة بعلب الجاتوه...  
فتطوع عدد من الشباب لتوزيعها علي بقية  
الطلبة..

مضت نصف ساعة تقريبا بعدها ظهرت  
ليلي في أروع صورة أثار انتباه الجميع في  
حديقة المنزل... فستان موف سواريه  
كالذي ترتديه نجمات هوليوود... مع  
طرحه بلون النسكافيه... وقضازات بيضاء  
اللون... وتحمل في يدها أجنحة صغيرة

بينما ارتدي عادل بدلتة المفضلة.. ذات  
اللون الفضي اللامع... وقف الجميع مذهولا  
من روعة وجمال العروسين... الي ان حضر  
عمر وأعلن بدء الحفل.... قام الطلاب بعمل  
فقرات متنوعة... بدأت بتلاوة القرآن



الكريم... ثم خطبت قصيرة عن كيفية  
اختيار زوج المستقبل... بعدها أنشد أحد  
الطلاب أبياتا من الشعر... ثم جاء دور  
المسرحية الكوميديّة... تلتها فقرة  
الأكروبات والحركات البهلوانيّة... ثم  
فقرة تقليد الفنانين... وانتهى الحفل  
بالأغنية الشهيرة ياد بلة الخطوبة عقبالنا  
كلنا

وفي النهاية التف الجميع حول العروسين  
والتقطوا المزيد من الصور التذكاريّة  
أثناء لبس الدبل والشبكة... وقبل ان  
يغادر الضيوف الحفل، وضعت ليلى الأجنحة  
امام الجميع وقالت بصوت مرتفع

-كل واحد يكتب اسمه هنا... وعبرة  
جميلة كمان في دفتر الحضور... عشان



تبقى ذكرى حلوه تفضل معانا طول  
العمر.. ان شاء الله

امتلت الاجنده عن اخرها بعبارات المدح،  
والاطراء، والنصائح المتنوعه... ثم غادر  
الضيوف الحفل... وبقيت هناك ثلاث  
صفحات، كانت من نصيب سمر، وعادل،  
وعمر..

فكتبت سمر: "الحب كالمولود اذا مات لا  
يعود"

وكتب عمر: "يارب يا عادل تحب ليلى اختي  
قد انا ما بحبها"



وفي الصفحة الاخيرة كتب عادل: لا  
يوجد طائر يغادر السماء ويختار الهبوط  
الي الأرض سوى الطائر الجريح

فكتبت ليالي في نفس الصفحة: سيظل  
الطائر في امان مادام يحتضن السماء فان  
الجراح لا تأتي سوى من الأرض.

ثم أغلقت الدفتر ونظرت الي عادل وقالت  
في هدوء: انا خائفة من كلام الجواهرجي

عادل في ثقة: اوعدك اني أخيب ظنه

سمر مازحة: انتي صدقتي كلامه ياليلي..  
ده راجل عجوز ويخرف.. ماشاء الله  
عليكم ربنا يحميكم من العين والحسد..  
انا هستأذن دلوقتي حاسه اني تعبانة  
شوية.. بعد اذنك ياليلي تعالي خديني



علي اوضتک... و بعدین ارجعی  
لخطیبک.. انا هفضل سهرانه لحد ما  
تیجی

عادل: استنی یاسمر.. انا اللي ماشی..  
عندی مشوار مهم اوی بکره

لیلی: مشوار ایہ المهم اوی ده عادل..؟

عادل: هبقي اقولک فی الوقت المناسب  
یالیلی.. مش هینفع اقولک دلوقتی

لیلی: انت هتبدأ تخبی علیا من اولها.. مش  
معنی انی وافقت علی الخطوبه من غیر  
ما اعرف عنک کل حاجه یبقي تاخذ  
علی کده... انا لازم اعرف عنک کل  
کبیره وصغیره.. وقبل أي خطوة تاخدها





في حياتك لازم اكون انا اول وحده  
تعرفها.. واكون عارفه نتيجتها كمان

سمر: اهدي شوية ياليلي.. مش وقت  
الكلام ده يا حبيبتي.. لسه في فترة  
خطوبة شهرين كمان تقدرؤا تتفاهموا  
فيه براحتهك..

عادل: خليه تقول اللي هي عايزاه ياسمر..  
ليلى فعلا معاها حق.. بصي ياستي انا هبدأ  
من بكرة أدور علي أصدقاء الجامعة اللي  
كانوا معايا في أوائل الدفعة.. عشان  
هعرض عليهم فكرة المشروع اللي كنت  
بحلم بيه من اول ما تخرجت من الكلية..  
وساعتها الظروف ما كانتش تسمح اني ابدأ  
في تنفيذه.. ادعيلي اني الاقيهم لسه  
موجودين ياليلي.



رفعت ليلى يديها إلى السماء وقالت: إن شاء  
الله تلاقىهم يا عادل

عادل في تضرع: يارب إن شاء الله أنا  
هستأذن دلوقتي اشوف وشك بخير ..

صحيح ياليلي.. عايز أنا اطلب منك حاجة  
قبل ما امشي بس خايف تكسفيني  
-خير يا عادل عايز ايه

-عايز رقم تليفونك.. ومش هكلمك  
غير وقت الضرورة.. يعني مش هرخم  
عليكي كتير

ليلى في دهشة: ازاي تقول كده يا عادل..  
ما انت اصلا معاك رقم تليفوني.. ولا انت



ناسي انك ضحكت علي عمر واخذت  
الرقم منه

عادل قاطبا حاجبيه: لا مش ناسي.. بس انا  
ما ضحكتش علي عمر.. انا اخدت الرقم  
منه بعد ما استأذنت من مامتك... ثانيا انا  
كنت عايز اخده منك انتي لان ساعتها  
هيبقي له معني تاني، واحساس جميل غير  
لما اخد رقمك من حد تاني.. ثالثا لو مش  
عايزاني اكلمك.. او حتي عايزاني  
احذفه من عندي قوليلي وانا هعمل كل  
اللي انتي تطلبه

ليلي تمد يدها ناحيته: طيب يا عادل هات  
تليفونك

عادل: اتفضلي ياليلي



ليلي تبتسم قائلة: انا كتبلك رقمي  
اهو.. بس ما تبقاش حمقي اوي كده..  
وفك التكشيرة اللي علي وشك دي  
عادل في هدوء: حاضر .. متشكر اوي  
ياليلي

ليلي متسائلة: عايزه اعرف بقي دلوقتي  
هتسجله باسم ايه

عادل في ثقة: هسجله باسم ( عباد الشمس  
(

ليلي مستنكرة: يعني ايه عباد الشمس ..  
هو اسمي مش عاجب حضرتك ولا ايه

عادل: لا عاجبني طبعا.. بس انا مش عايز  
اسجلك باسمك.. يمكن انسي الموبايل  
في مكان غريب او يضيع مني وحد يلاقيه



فيشوف الارقام اللي عليه.. ساعتها هبقي

متدايق جدا ان حد عرف اسمك

تبسمت ليلي في خجل وقالت: صحيح

عندك حق، طب اشمعني اختارت اسم (

عباد الشمس )

عادل: هو العسل بيعجي منين

أجابت ليلي: من النحلة

كرر عادل تساؤلاته: والنحلة بتتغذي علي

ايه

أجابت العروس: علي الورد والفل والياسمين

وعباد الشمس

صاح عادل: شاطرة ياليلي.. انا بقى

سميتك عباد الشمس.. عشان انتي اصل

العسل كله



سمر: احمر احمر نحن هنا.. ياسيدي..

ياسيدي علي الكلام

ليلي: طيب يا عادل.. مجاملة مقبولة منك

عادل: لو حاسه انها مجاملة اعتبريني

ماقولتش حاجة

ليلي: عادي براحتك

عادل: براحتي ازاي يعني مش فاهم

ليلي: علي فكرة يا عادل انا مش متعودة

حد يكلمني بالطريقة دي.. فياريت تهدي

شوية لسه بدري علي الكلام ده.. وياريت

كمان ما تكلمنيش فون غير في حاجة

مهمتي زي ما بتقول.. ولازم تعرف انا مش من

البنات اللي بتقعد ترغي في الموبايل لحد

الصبح.. ومش معني ان انت خطيبي يبقي



نسهر كل يوم نتكلم لحد الفجر..  
وكم ان ياريت تاخذ إذن من بابا وماما قبل  
ما تيجي بيتنا.. غير كده مش هقدر  
اقابلک

عادل في ذهول: مش فاهم ياليلي.. ايه  
لازمة الكلام ده كله.. هو انا غلطت في  
حاجه ولا ايه

ليلى في لامبالاة: لا ما غلطتش يا عادل..  
بس دي تعليمات بابا، هو كان عايز  
يقولک الكلام ده بنفسه بس مالقاش  
الفرصة المناسبة

نهض عادل من مكانه قائلاً: طيب  
ياليلي.. انا همشي دلوقتي واعتبريني ما





خداش رقمک.. یاریت تخلي عمر ینده  
بابا وماما عشان نمشي من هنا کلنا

سمر في محاولة لتهدئة الموقف: اهدوا  
شویت یا جماعت ما ینفکش الکلام ده في  
یوم خطوبتکم

هتف عادل قائلًا: انتي مش سامعة  
صاحبتك یاسمر بتقول ایه

ردت سمر قبل أن تنطق لیلي بكلمة:  
حصل خیر یا عادل، علي فكره باباک  
ومامتک کانوا لسه خارجین من شویت،  
وسمعتهم بیقولولک احنا ماشیین یا عادل  
خلیک انت مع خطیبتک.. بس الظاهر  
انک ما سمعتش حاجه



عادل: فعلا انا ما سمعتش، كفايتة اللي  
سمعتة دلوقتي.. انا مضطر استأذن... سلام  
عليكم

-وعليكم السلام ورحمة الله وبركاته

سمر غاضبة: ايه اللي انتي هبتيه ده  
يابنتي... يخرّب بيت دماغك ده انتوا لسه  
في اول يوم خطوبة،.. ازاي تكلمي  
الراجل بالأسلوب ده ياليلي

أجابت ليلي لهجة تنم عن الندم: هو انا  
عملت ايه يعني، بابا هو اللي خلاني اقول  
الكلام ده... وبصراحة معاه حق انا  
مقتنعة جدا برأيه.. ولا انتي مش واخده  
بالك من عدد البنات اللي اتخطبوا في



الجامعة وبعدها بشهر واحد اتفستخت  
خطوبتهم لأتفه الأسباب

ردت سمر قائلة: أولا عادل غير أي حد من  
شباب الجامعة، ثانيا: غلط يابنتي انك  
تكلمي أي حد بالأسلوب ده مهما كان...  
وممكن تخلي اللي قدتمك يفهم اللي  
انتي عايزاه بطريقه غير مباشرة.. او كان  
مممكن تخلي مامتك هي اللي تكلمه  
اكيد مش هيزعل منها.. ده انتوا لسه في  
اول يوم خطوبه امال بعد كده هتعملوا  
ايه

أشاحت ليلى بيدها قائلة: هنعمل ايه يعني  
عادي.. انتي عارفاني صريحت جدا في  
كلامي.. وكل صحابي البنات عارفين  
كده كويس



تبسمت سمر وقالت: احنا عارفين كده  
لأننا صحابك وطول الوقت معاكى..  
لكن عادل يادوب انتوا لسه عارفين بعض  
من كام يوم.. ويمكن دي اول مرة تقعدوا  
فيها الوقت ده كله.. يعني الراجل كده  
زعل اوي من كلامك ..

ليلى غاضبة: لو زعل مني يبقي مش  
بيحبني.. اللي يحب حد بجد هيحاول  
يلاقى أي عذر عشان يسامحه... بس قوليلي  
ياسمر هو انا كنت عصبية فعلا للدرجة  
دي..؟!

صرخت سمر وقالت: عصبية بس... ؟ ده  
انتي كان ناقص تخطي الراجل  
بالكرسي اللي جمبك



بدت علي وجه ليالي ملامح الحيرة ثم قالت:  
بصراحه ياسمر ما كنتش واخدة بالي،  
طيب ايه رأيك يابنتي اعمل ايه انا  
دلوقتي..! اكلمه واعتذر له، ولا ابعتله  
مسج، ولا ايه رأيك..؟

سمر في لهجة محذرة: ما تعمليش اي حاجة  
دلوقتي، عشان لو اتكلمتي معاه تاني  
بنفس الأسلوب ده ممكن تعملي مشكله  
اكبر من اللي حصلت من شوية... استني  
لما الراجل يهدى هو كمان، ويللا بينا  
نطلع ننام عشان نصحي بدري.. ولا انتي  
مش هتروحي معايا الجامعة بكرة

انتفضت ليالي من مكانها وقالت: لا هروح  
طبعا.. يللا بينا يا فيلسوفة زمانك



عمر ياتي مسرعا: انتوا رايحين فين.. ده انا  
قولت اجي اقعد معاكم شوية، ينفع  
تسيبوني وتمشوا

تحركت ليلي خطوتين ثم قالت: رايحين  
ننام يا عمر عايز حاجة

عمر وقد بدا عليه الارتباك: لأ ... قصدي  
ايوة!..

ليلى في حيرة: يعني ايه لأ و ايوة...  
اتكلم يا عمر عايز ايه

عمر وقد احمر وجهه: عايز اقول حاجة  
للاسته سمر

ليلى في غضب: مش وقت كلام يا عمر..  
رايحين ننام دلوقتي عندنا جامعة بكرة

عمر في إلحاح: معلىش كلمته وحده بس



سمر ضاحكة: اكله ياعمر عايز تقول  
ايه

اقترب عمر ناحية سمر ثم قال: عايز اقول  
لحضرتك ان انتي جميله اوي..  
بتفكريني بالممثلات - كرستين ستوارت  
بطلة فيلم - twilight بس انتي اجمل منها  
بكتير بدون مجاملة

انفجرت سمر ضاحكة ثم قالت: متشكرة  
أوي ياعمر.. ده انت مثقف كده، وبتسمع  
افلام امريكية.. وعارف اسامي الممثلين  
كمان

عمر في ثقة: وبسمع الأفلام بدون ترجمة،  
يعني بعرف كويس هم بيقلوا ايه من  
غير ما حد يقولي.. انا شاطر اوي في





الانجلش يا ميس ليلى... ولو محتاجه  
مساعدة في المنهج بتاعكم انا تحت  
امرک

ضحكت سمر بشکل هستيري بينما  
صاحت ليلى فجأة: بسم الله ما شاء الله،  
أخويا بيتكلم لغات وانا مش عارفت.. انت  
عمرک ما قولتلنا حاجه زي دي يا عمر  
بيه.. هو انت بتخبي عنا شطارتک ولا ايه  
عمر بصوت هادئ: انتوا بس اللي مش  
عارفين قيمتي کويس

تقدمت ليلى ناحيته ثم وضعت يدها علي  
كتفه وقالت: طيب يا شاطر روح نام بقي  
عشان تصحي بدري للمدرسة بکره



أمسك عمر بيد اخته في رفق وقال: استني  
شوية في حاجة كمان عايز اقولها

ضغطت ليلي علي قدمه وقالت: عايز تقول  
ايه تاني يا عمر

عمر موجهها حديثه الي صديقتها: انا عارف  
ياميس سمر انك قاعدة لوحدة انتي  
ومامتك في البيت.. ممكن تسمحي لي اجي  
ازورك انا وليلي ونظمن عليك من وقت  
للتاني ..

رحبت سمر بالضيف المنتظر وقالت: اهلا  
وسهلا تشرفونا في اي وقت يا عمر.. كفاية  
بقي ولا عايز تقول حاجة تانية



هتف عمر في سعادة: لا كفاية أوي  
متشكر جدا لحضرتك.. تصبحوا علي  
خير

سمر وليالي بصوت واحد: وانت من اهل  
الخير يا عمر

وصل عادل الي منزله وقد بدت علي وجهه  
علامات الغضب ثم قال  
السلام عليكم

الحج توفيق: خير يا بني مالك، واضح  
انك متضايق جدا، حد من صحابك  
جراله حاجه ولا ايه

عادل محاولا استعادة ملامحه الطبيعية:  
خير ان شاء الله يا والدي، مفيش حاجة



كلهم بخير، انا بس اللي مخنوق شوية لأن  
الأسانسير عطلان، ونفسي اتقطع من السلم  
للدور الرابع

توفيق ضاحكا: حصل خير يا بني بكره  
يصلح إن شاء الله

المهم دلوقتي الف مبروك للخطوبة، ما  
تتصورش قد ايه انا مبسوط دلوقتي.. وقت  
بحلم باليوم ده طول عمري،

وكم ان هتعيش معانا في البيت انت  
ومراتك.. انا بجد فخور بيك يا عادل...  
كنت خايف الغربة تقسي قلبك علينا  
لكن الظاهر انها خلت قلبك بقي حنين  
اكثر من الأول.



رد عادل في هدوء: متشكر جدا يا بابا ربنا  
يخليك لنا ويديك الصحة وطولت العمر  
ان شاء الله

مامت عادل: حمد لله بالسلامة يا بني،،  
جيت بدري يعني.. ده احنا قولنا نسيبك  
تقعد شوية مع عروستك.. حتي باباك  
نده عليك واحنا ماشيين وانت ما رديتش  
عليه

عادل في أسف: سامحيني ياامي ما خدتش  
بالي

تبسمت منيرة وقالت: اللي واخد عقلك  
ياسيدي

عادل في لامبالاة: مفيش حد واخد عقلي  
ياامي .. انا هروح انام دلوقتي



تعجبت الأم من ردود الابن السخيفة ثم  
قالت: مالك يابني في ايه.. حد مزعلك  
من أهل العروسة ولا ايه

صاحت أميرة الأخت الصغرى والوحيدة  
قائلة: أكيد السنيورة هي اللي مزعلاه  
ياماما ، مفيش حد غيرها ممكن يزعله  
النهارده

منيرة في غضب: اسكتي يابنت عيب، انتي  
اتعلمتي الكلام ده امتي... هو انتي اول ما  
تنطقي كده عايزه تشعلليها من اولها..  
خليكي زي مانتى ساكتة احسنلك

ردت أميرة في سخرية: حاضر يااا ام عادل



ربت منيرة علي كنف ابنها وقالت: انا  
هروح اعملك حاجة تاكلها يا عادل.. انت  
من اول ما طلعت الصبح ما أكلتش حاجة ..

قبل عادل يد والدته ثم قالز متشكر  
ياامي ماليش نفس اكل دلوقتي ..

ألحت منيرة في حديثها وقالت: يعني مش  
ناوي يابني تقول ايه اللي مزعلك قبل  
تدخل تنام وانت مهموم

تقدم عادل ناحية غرفته قائلاً: انا اسف  
ياامي.. هبقي اقولك بعدين... هستأذن  
انام دلوقتي عندي مشوار مهم أوي بكره ...

تصبحوا علي خير

رد الأبوين في حيرة ممزوجة بالدهشة:  
وانت من أهل الخير يابني





الله يسامحها اللي كانت السبب ستات  
تموت في النكد... روعي نامي يابت  
يا أميرة.. مش عايزه اشوف وشك تاني  
النهارده

تأففت أميرة وصاحت قائلة: طيب حاضر  
ياماما انتي دايمًا كده مش طايقاني ولا  
مستحلمة كلمة واحده مني... عشان  
كده أنا دايمًا ساكتة.. ومش عايزه  
اتكلم عشان عارفه ان عندك القولون  
العصبي، وكمان خايفة اكتب علي  
نفسك.. تصبحي علي خير

منيرة في لامبالاة: وانتي من اهل الخير  
ياست أميرة..



# (في قسم الشرطية) ..

يدخل أحد الضباط يتجاوز عمره الأربعين،  
مرتدياً بدلته الرسمية ثم يهتف قائلاً:  
السلام عليكم... أنا الضابط رأفت  
البحيري والد حسام، المحتجز عندكم..  
ومعاه بنت اسمها بسمت

نهض الآخر من مكانه ومد يده مسلماً  
عليه ثم قال: أهلاً بيك يا فندم.. أنا  
الضابط عاصم أنور، احنا اسفين جداً علي  
كل اللي حصل، لكن حسام بيه متهم  
بالتعرض لبنت العقيد هاشم نور الدين..  
أثناء وجودها مع خطيبها.. وفي أكثر من  
500 طالب شاهد علي الواقعة



رد الضابط رأفت في أسف: انا عارف ده  
كويس.. واتصلت ب هاشم بيه واعتذرت له  
بالنيابة عن ابني.. ياريت حضرتك تفرج  
عنهم بضمان محل الإقامة

ضابط القسم: كنت اتمني تنفيذ طلبك  
يا فندم لكن هاشم بيه أمر محدش يخرج  
منهم بدون إذنه.. خصوصاً بعد ما  
اكتشفنا ان حسام اب حضرتك بيتعاطي  
هيروين.. والبنت اللي معاه مسجلة أدا..  
واتقبض عليها اكثر من مرة في أوضاع  
مخلتة بالشرف في الطريق العام

عقد الضابط رأفت حاجبيه ثم قال: مش  
مهم البنت اللي معاه دلوقتي.. انا اهم  
حاجة عندي ابني.. اسمحلي اكلع العقيد



هاشم مرة ثانية، عشان تنهي الموضوع ده  
بشكل ودي

-اتفضل يافندم

-الو.. السلام عليكم ازيك يا هاشم  
بيه.. انا رأفت البحيري والد حسام

-عايز ايه تاني يارأفت .. ما احنا اتكلمنا  
في الموضوع ده كتير.. وانا خلاص قبلت  
أسفك

-متشكر جدا يافندم.. بس انا في القسم  
دلوقتي.. والضابط عاصم بيه رافض  
الافراج عن حسام ابني ..

-طيب انا هكلمه يفرج عنهم، بس خد  
ابنك معاك، وخليه يبعد عن طريق



بنتي.. عشان هيندم أوي علي أي حاجه  
يعملها بعد كده.

-حاضر يافندم.. انا هخليه يكتب تعهد  
في القسم انه ما يتعرضش لبنت حضرتك  
-انا مش محتاج تعهد من حد.. انا هعرف  
احمي بنتي كويس ..

-متشكر جدا يافندم.. اتفضل.. عاصم  
بيه مع حضرتك

-افرج عنهم يا عاصم بس خليه تحت  
المراقبة كام يوم

-حاضر يافندم

[خرج الثلاثة من قسم الشرطة، الضابط  
رأفت، حسام، بسمت]



نظر الضابط رافت الي ابنه باستنكار ثم  
قال غاضبا: لحد امتي يا حسام بيه هتفضل  
طائش كده، ومسببلي مشاكل، وجايبلي  
الإحراج دايمًا مع كل زملائي، انا تعبت  
معاك لازم تنهني المهزلة دي، وإلا  
هسلمك للسجن بنفسي ..

تصرفاتك دي هتخليهم يفصلوني من  
الشغل... ولولاك كان زمني بقيت عقيد  
دلوقتي، زي الراجل اللي كان بيهزأني  
بسببك.

رد الابن في لامبالاة: يعني كنت عايزني  
اعمل ايه يا بابا، اسيب واحد من بره  
الجامعة يضرب زميلتي قدامي، وانا واقف  
ساكت



نهره الوالد قائلا: ما تقولش زميلتي، انا  
ما اقبليش انك تمشي مع وحده زي دي.. انت  
ما تعرفش انها مسجلة أداب ولا ايه... انتي  
يابت يابسمت ابعدي عن حسام احسنك  
ولا مش هيحصلك طيب، وهضيلك  
مستقبلك اكر ما هو ضايع.. فاهمة ولا لأ  
ردت بسمت وهي تمثل دور الخضوع: فاهمة  
يارأفت بيه.. انا همشي دلوقتي يا حسام،  
باي  
أدار حسام ظهره للوالد ثم قال: استني  
يابسمت انا جاي معاك  
جذبه الوالد من ياقته قائلا: تعالي هنا  
يا ولد،..





صاح الابن في غضب: نعم ياابا ..  
حضرتك عايز ايه تاني

أجاب الوالد في ثقتة: انا هاخدك ونروح  
علي بيت ليلي دلوقتي، عشان تعتذرلها هي  
وخطيبها علي الموقف السخيف اللي حصل  
منك

ضحك الابن بسخرية ثم قال في حزم: انا  
مش هعتذر لحد.. الواد هو اللي غلطان  
المفروض ييجي قدام الجامعة كلها،  
ويعتذرلي انا وبسمت

الوالد وقد أصابه اليأس: بسمت تاني..؟  
هتفضل لحد امتي كده تا عيني معاك...  
طب قللي اعمل ايه فيك دلوقتي



تراجع الابن خطوتين ثم قال: ما تعملش  
حاجه.. ومش هعتذر لحد مهما حاولت..  
حضرتك هتروح البيت... ولا أروح لوحدي.

صرخ الضابط قائلاً: انا هروح البيت.. ومش  
عايزك معايا... انا خلاص زهقت منك..  
وماليش نفس اشوفك في بيتي، ولا في أي  
مكان تاني.. اجري ورا صاحبك بسمته  
وانسي ان ليك أب طول ما انت ماشي في  
السكة دي.

انطلق حسام باتجاه بسمته وهو يهتف: طيب  
سلام... ثم لحق بها وقال: استني يا بسمته  
انا جاي معاك

نظرت بسمته ناحيته باستغراب قائلة:  
حصل ايه يا حسام.. بتجري ليه كده..



وسبت باباک لیه دلوقتی، مامتک اکید  
مستنیاک فی البیت، المفروض تروح  
تشوفها، وتظمنها علیک.. قبل ما یجرالها  
حاجه

رد حسام: انا خلاص مش راجع البیت طول  
ما الراجل ده عایش هناک.. انا زهقت منه  
ومن النصایح بتاعته دي کل شویته.

صاحت بسمته وهي تخفي سعادتها بعودته؛  
ده مهما کان باباک یا حسام وأکید  
خایف علیک.. روح اركب معاه العربیة  
عشان تشوف مامتک ونتقابل بعدین فی  
الجامعة او فی شقتک الی فی المعادی

قال الابن غاضبا: بقولک مش راجع  
یا بسمته، بابا خلاص طردنی من البیت..



كان عايز ياخدني معاه، نعتذر لعادل  
وليالي.. بس انا رفضت.... عشان كده ما  
رضيش ياخدني معاه البيت.... وقال كمان  
انسى ان ليك أب طول ما انت ماشي في  
السكتر دي

بسمتة حائرة: طب وهتعيش ازاى كدة  
يا حسام.. ده انت محتاج 10 الاف جنيه في  
الشهر علي الأقل ..انت ناسي اللي بتتعاطاه  
ولا ايه... اوعي تقول انك ناوي تبطل  
الحاجات دي وتسمع كلام باباك

تبدلت ملامح الابن ثم قال في غضب: انتي  
اتجننتي يا بسمتة... أبطل ايه.. انا ما قدرش  
اعيش من غير الحاجه دي... بابا أصلا ما  
يفرقش معايا في حاجه.. يعني وجوده زي  
عدمه... البركة في ماما ربنا يخليها لي..



انا هبقي اكلها تبعتلي فلوس مع أي حد  
من جيرانها... ولا انتي عايزاني اروح اعتذر  
لعادل وليلي

جزت بسمت علي أسنانها قائلة: ليلي...؟  
ياااه ده انا عايزه أكلها بسناني دلوقتي،  
واقطع منها حتت وارميها للكلاب، دي  
هتشوف مني أيام عمرها ما كانت تحلم  
ببها... ولا كمان عادل خطبها عمري ما  
هنسي انه ضربني بالقلم قدام شباب  
الجامعة كله... انت لازم تاخدلي حقي  
منهم يا حسام

تبسم حسام كالواثق في قدراته قائلاً:  
أكيد يا حبيبتي.. بس الموضوع مش سهل  
زي ما انتي فاكرة، ومحتاج ترتيب  
كويس.. انسي كل حاجة دلوقتي ويلالا



بيننا، ناخذ تاكسي ونطلع علي شقة  
المعادي، وهناك ن فكر هنعمل ايه...؟

بسمت ضاحكة: يلا بينا

#في بيت العريس

السابعة صباحا

دق جرس الهاتف، مد عادل يده اليمني  
وراح يستعلم عن مصدرها.. فإذا هي رسالت  
من ليالي أو عباد الشمس كما هو مقيد  
بسجلات الهاتف

(انا اسفرت يا عادل حقك عليا ما كانش  
قصدي أزعلك، انا ما نمتش طول الليل  
بعد ما حسيت انك زعلت مني.. كنت  
هرن عليك بس خوفت ما تردش عليا، مش



هقدر اكلمك صوت دلوقتي عشان رايحة  
الجامعة مع سمر.. اشوف وشك بخير..  
سلام)

تبسم عادل في سرور، وانسل من تحت  
الغطاء، ثم راح يفرك عينيه بكلتا يديه  
وهو يتشاءب بعد ليلة طويلة قضاها  
مفكرا فيما حدث عقب انتهاء حفل  
الخطوبة إلي أن غلبه النوم، فإذا بوالدته  
تستأذن في الدخول وهتفت قائلة : صباح  
الخير يا عادل

تقدم الابن ناحية والدته وقبل يديها ثم  
قال: صباح النور يا ست الكل ...

ربتت الأم علي متف ابنها وقالت: انا جيت  
اصحيك عشان مشوار النهاردة.. وجبتلك





الظطار معايا كمان اتفضل بألف هنا  
يا حبيبي... ماشاء الله عليك يا بني  
تتحسد النهاردة.. اللي يشوفك امبارح  
بالليل وانت مكشر ما يشوفكش دلوقتي  
والضحكة ماليت عينيك

حضرت أميرة الأخت الصغيرة ثم قالت:  
أكيد السنيورة ضحكت عليه بكلمتين  
ياماما، ما انا عارفتة كويس أسلوب بنات  
اليومين دول، البنت تعمل نفسها مسكينة  
وقطرة مغمضة، لكن هي في الأصل داهية  
ومحدث يقدر يغلبها

صرخت الأم في غضب : طب قول لي صباح  
الخير الأول يامفعوصة... واغسلي وشك  
وبعدين تعالي اتكلمي



ردت أميرة وهي تكتّم غيظها: انا اسفه  
ياماما.. انا غلطانة أصلا اني بتدخل في  
أموركهم.. الحق عليا اني عايزة اخلي أخويا  
ياخد باله من كهن البنات

هتف عادل في ذهول: وانتى تعرفي ايه عن  
كهن البنات يا أميرة.. ده انتى لسه ما  
كملتيش 12 سنة، ولا انتى قرىتي كتاب  
في الموضوع ده

ضحكت أميرة في سخرية ثم قالت:  
كتاب ايه يا عادل يا أخويا... كهن البنات  
ده كتب كتيير مش كتاب واحد..  
واختك اللي قدامك دي حافظة المقرر  
كله.. يعني أسألني عن أي حاجه تخطر  
علي بالك وأنا هقولها لك، انت أخويا



الكبير برضه، ومش عايزه وحدة تضحك  
عليك

أجاب عادل في دهشة: ماانا بسألك اهو،..  
اتعلمتي الكلام ده كله امتي وفين  
يااميرة

تبسمت أميرة في ثقة ثم قالت: اتعلمته  
من التليفزيون ياأبيه عادل، من أول ما  
وعيت علي الدنيا وماما بتقعدني قدامه..  
وساعات كانت بتنزل السوق وتسيبني  
لوحدي في البيت،.. بقيت حافظة كل  
الأفلام والتمثيليات الجديدة والقديمة...  
ودلوقتي كمان بسمع أفلام رعب، لكن  
مش بلحق أقري الترجمة عشان بتمشي  
بسرعة



فوجئ عادل بحديثها وقال: ماشاء الله  
عليكي يا أميرة، أفلام رعب كمان... ده انا  
بخاف اسمعها يابنتي... طب قوليلي بقي ما  
كنتيش بتكلميني ليه وانا في السعودية  
غير ثواني قليلة وبعدين تجري بالتليفون  
علي ماما او بابا

أطرقت أميرة ثوان قليلة ثم قالت: ماما  
قالتلي انك سافرت السعودية وانا عندي  
سنتين.. و كمان دي أول أجازة ليك، يعني  
انت كنت زي الغريب بالنسبالي يا أبيه  
عادل.. ويادوب بدأت اخد عليك قريب من  
كام يوم.



تمت والدتها قائلة: ياريتك ما اخدتني  
عليه يابنتي، ثم واصلت حديثها بصوت  
مرتفع: سيبي أخوكي يفطر يا أميرة وروحي  
اغسلي وشك... وغيري هدمك.. ولا  
اقولك روحي كمي نوم لحد آخر النهار،  
من حقك ترتاحي شوية بعد ما خلصتني  
الامتحانات، ومحدش هيصحكي ولا  
يزعجك.

قالت أميرة مستنكرة: حاضر ياماما، ولو  
مش عايزاني أقعد في البيت انا ممكن  
اروح أقعد عند خالتي.. او حتي انزل  
دلوقتي حالا أدور علي شغل

صاحت الأم غاضبة: شغل ايه يامجنونة  
دوقتي... هو حد ناقص بلاوي... وبعدين  
سيبي خالتك في حالها، كفاية اللي هي



فيه... ولا انتي عايزه تجنيها زي ما  
جنتيني في اليومين اللي انتي نطقتي  
فيه...

ولت أميرة ظهرها قائلة: طيب ياماما انا  
هروح أقعد قدام التليفزيون في أوضتي  
ومحدث يخطب عليا

ردت الأم وهي تضرب كفا بكف: حاضر  
ياسعادة السفيرة... ادخلي اوضتك واقفلي  
الباب وراكي، ولو عايزه حاجه قوليلي وانا  
اجيبها لك لحد عندك

مصت أميرة في طريقها وقالت: حاضر سلام  
ياماما، سلام يا عادل يا اخويا







صاحت الأم متعجبة: شبعت ازاي هو انت  
أكلت حاجه يابني... اوعي تكون  
بتفكر في كلام اختك، ما تاخدش علي  
كلام البنت المجنونة دي، وكمل  
فطارك يا عادل

نهض الابن من مكانه ثم قال: لأ خلاص  
ياأمي ماليش نفسك اكل دلوقتي... انا  
هقوم البس.. واخرج واقابل صحابي... لو  
احتاجتي اي حاجه ا بقي رني عليا قبل ما  
اجي ان شاء الله

رفعت الأم مائدة الطعام وهي تقول: طيب  
يابني.. ربنا يوفقك ويجعلك في كل  
خطوة سلامة



تقدم الابن ناحيته أمه وقبل جبينها قائلاً:  
يارب يخليكي ليا يأمي.. ولا يحرمني  
منك ابدا طول العمر ياست الكل

ثم استطرد حديثه قائلاً: صحيح يأمي هو  
بابا صحي ولا لسه

ردت الأم قائلة: باباك صحي من بدري..  
جهزته الفطار، وشرب الشاي، ودلوقتي  
نازل علي الشغل

تقدم عادل ناحيته الدولاب قائلاً: يعني  
كده مش هالحق أغير هدومي وانزل معاه



لحد آخر الشارع انا لسه ما اتعودتش علي  
زحمة المواصلات ياست الكل

توجهت الأم الي الخارج وقالت: انا سبت  
باباك بلبس البدلة هروح أقوله  
يستناك تنزل معاه بس ما تتأخرش.

-حاضر ياست الكل

( \*ارتدي عادل الزي القديم، الذي كان  
يفضله دائما أثناء فترة دراسته في  
الجامعة ..

قميصا رماديا يميل الي البياض،.. وبنطلونا  
بنيا يميل الي السواد،) !!..

ثم أسرع في طلب والده، فقالت الأم:  
والدك لبس البدلة وخارج حالا  
دلوقتي... انت ليه مش لابس بدلتك.. دي



مكويته وجاهزة وموجوده في دولابك  
يا بني

تبسم عادل قائلاً: لا يا أمي.. أنا اللي  
اختارت أخرج كده النهارده.. اصل الطقم  
ده وحشني جدا

راحت الأم تتأمل ملامح ابنها في رداء  
الجامعة القديم ثم قالت: يا اه يا بني..  
تصدق انه وحشني أنا كمان.. ده اكرر  
طقم كنت بحب اشوفه عليك ايام  
الجامعة، فكرتني بالأيام الجميلة يا عادل

رد عادل قائلاً: بس دي اكرر أيام تعبتي  
فيها معايا يا أمي.. ولا نسيتي لما كنتي  
بتسهر معايا لحد الفجر.. ويادوب بعدها



بساعتين كنتي بتصحي عشان تجهزي  
الفطار لبابا قبل ما يروح الشغل

أغرورقت عيني الأم بالدموع ثم قالت:  
بالعكس يابني دي كانت أسعد أيام  
حياتي، صدقني يا عادل.. مفيش اجمل من  
ان الام تشوف ابنها بيتعب عشان عايز  
يحقق أحلامه.. ساعتها بيكون نفسها  
تعمل المستحيل عشان تشجعه وتوقف  
جملته.. ولو ينفع تقطع حته من جسمها  
عشان تساعد مش هتتاخر

(اقترب عادل ناحيتها واحتضنها بشده،  
بعدها رأي الدموع تسيل علي وجنتيها، ثم  
راح يقبل يديها، وانتهى بقبلة علي جبينها  
ثم قال:)



ربنا يخليكي لنا يا ست الكل

(حضر الوالد) : ايه ده ياسي عادل، وبابا  
فين من ده كله، مفيش دعوة حلوة ليا انا  
كمان ولا احنا مالناش في الحب جانب

توجهه عادل ناحية الوالد ثم قال: و احنا  
نسوي ايه من غيرك يا حج، انت البركة  
كلها، ربنا يحفظك، ويخليك لنا طول  
العمر ان شاء الله

تبسم الوالد ثم قال: ويخليك لنا يا بني..  
يللا بينا

الحجه منيرة: استني يا عادل

-نعم يا ماما... حضرتك عايزه تيجي معانا

ولا ايه



-بس ياواد... فاكّر الشنطة الصغونة دي

ولا نسيته

-دي الشنطة اللي كنت باخدها معايا

الجامعة... ياه ياأمي.. هي لسه موجوده

-ايوة موجوة يا حبيبي.. انا شلتها بعد انت

ما خلصت دراست.. وجمعتك فيها كل

حاجتك، وأدواتك القديمة.

الساعة الرقمية اللي جبتهاك من العمرة

.. والنظارة اللي جابهاك والدك من

المكتبة اللي جمبنا.

وفي كمان قلم حبر اهو، أكيد لسه

بيكتب لحد دلوقتي.

-ربنا يخليكي لينا ياأطيب أم في الدنيا..

ما تتصوريش قد ايه انا فرحان دلوقتي..





دي أجمل حاجة شوفتها من اول ما سبت  
الجامعة

-ربنا يجعل حياتك كلها فرح وسعادة  
يابني، يلا بقي عشان تلحق باباك، انا  
نسيت اقوله انك خارج معاه، وهو كمان  
نزل واحنا مش واخدين بالنا

-حاضر يأمي.. اشوف وشك بخير  
عادل ( في خطوات سريعة )؛ استني يا حج  
انا جاي معاك

-علي فين يابني.. انا مش رايح ناحيت  
خطيبتك ..

-انا كمان مش رايح هناك.. بذا متك  
يا حج، في حد يروح لخطيبته الساعة 8  
الصبح



-جايز يابني.. كل حاجه في زمانكم،

بقت عادي أوي، وممكن تحصل، انا ما

بقيتش استغرب من أي حاجه بشوفها

-بس مش للدرجه دي يابو عادل.. وابنك

كمان زي ما بيقولوا كده رجعي، من جيل

الستينيات ..

-طب اركب العريته، وبعدين نكمل

كلامنا..

ياسلام يابني.. فكرتني بجيل

الستينيات، وبأيام زمان... كانت أجمل

أيام... وكنا احسن جيل كمان

كلنا كنا إيد واحده،..وكل واحد كان

بيخاف علي جاره أكثر من أخوه، وعمر ما

حد فينا اتمني الأذي لقرايبه ...



ورغم المرار والضنك اللي احنا عشناه  
أيامها.. لكن الضحكة كانت بتطلع من  
القلب.. ولا عمرنا كنا بنخاف من  
المستقبل.. ولا بنشيل هم لبكره.

- كل الأجيال بتقول كده يا حج ..

احنا كمان هنقول الكلام ده لأولادنا..  
وان زمنا أحسن من زمنهم.. أولادنا هيقولوا  
لأولادهم والأجيال اللي بعدهم نفس  
الكلام... هو ده حال الدنيا ماشية دايمًا  
من سيئ ل أسوأ.

-يافتح ياعليه يارزاق ياكريم... ده احنا  
لسه بنقول ياهادي.. خليك متفائل  
يابني... في حد في الدنيا يبقي متشائم  
كده علي أول الصبح



-انا لو متشائم ياوالدي ماكنتش جيت

معاك النهارده

-ليه يابني خير، رايح علي فين ان شاء الله

-رايح أقابل زمائلي اللي كانوا معايا

الجامعة

-ياسلام يابني.. رايح تدور علي زمائلك

اللي سبتهم من 5 سنين فانت.. انت كده

تاخد جايزة نوبل في الوفاء.. ده شباب

الايام دي.. الواحد منهم ما بيصدق يخلص

امتحانات.. وبعدها بكام شهر تلاقية نسي

كل صحابه وزمائله.. ماعدا شوية قليلين

زيك كده.. ربنا يبارك فيكم يابني..

عمر البلد ما هتتقدم غير بالشباب اللي من

النوع ده



-احنا عددنا كان كبير أوي يا حج.. ومن  
أول سنته عملنا مجموعة في الجامعة  
سميناها فرقة ( #الجيل\_الصاعد ) وكان  
لينا أهداف جميلة جدا.. لكن مع كل  
سنة كان عددنا ينقص، لحد ما بقينا 10  
طلاب في آخر سنة.. مننا خمسة من أوائل  
الطلبة ..

وانا كنت علي تواصل معاهم حتي بعد ما  
سافرت للسعودية.. لكن فجأة انقطعت  
الأخبار عنهم.. ما بقاش فاضل منهم غير  
كمال صاحبي، وكنت بتواصل معاه من  
وقت للتاني... وهو اللي انا رايج عنده  
دلوقتي.

-ربنا يوفقك يا بني.. ويلم شملكم علي  
خير مرة تانية



-يارب ان شاء الله.. بس تفتكر يا حـجـ اللي

بيفترق ممكن يتجمع مرة تانية

-أكيد يا بني.. لو الطرف الثاني عنده

الاستعداد لكده مهما كانت الظروف..

بالضبط زي العقد أو السبحة لو اتقطعت

هنقدر نجمعها لكن بعد ما نتعب شويتة...

بس لو في حبة بعدت أوي منهم ساعتها

يبقي صعب، اننا نضمها للعقد أو السبحة

مرة تانية، لأن هي اللي اختارت كده

-حلو أوي التشبيه ده يا حـجـ، ماشاء الله

عليك.. فكرتني بسقراط الفيلسوف

اليوناني

-فيلسوف ايه يا بني بطل تريقتة.. احنا

يادوب علي قدنا



-ما تقولش كده يا حج انت بس اللي مش  
عارف قيمة نفسك... انا هنزل الشارع اللي  
جاي، ونبقي نكمل كلامنا وقت تاني ان  
شاء الله

-ان شاء الله يابني خلي بالك من نفسك  
-حاضر يا حج.. سلام عليكم

---

(اركب عادل التوكتوك ودار بينه وبين  
السائق الحوار التالي)  
عادل: لو سمحت ياكابتن، عايز اروح عند  
المسجد اللي في اخر الشارع  
سائق التوكتوك: قصدك الجامع بتاع  
المرحوم عبد الصمد...؟





عادل: انا مش عارف اسمه الحقيقي.. بس  
اكيد هو

السائق: الله يرحمه كان راجل طيب..

عادل: قصدك علي مين

السائق: قصدي علي صاحب الجامع، الشيخ  
عبد الصمد يا حضرة الأفندي.. في اليوم  
اللي مات فيه بعد ما رجعنا من الدفن...  
أسلاك الكهرباء اللي في الجامع كلها  
ضربت، والنور قطع في الشارع كله طول  
الليل، كأن الجامع كان حزين علي  
فراقه... في ناس كثير قالت انها كانت  
بتشوفه يوميا في صلاة الفجر.. قبل الجامع  
ما يتفضل... وكل يوم كان يجيب حد  
غريب يصلي معاه، وكمان الناس كانت



بتشوفهم، بعد الصلاة وهم ماشيين في  
الطريق، أول واحد يقرب منهم يختفوا مرة  
وحده.. وكانوا دايمًا لابسين أبيض في  
ابيض ..

ايه رأيك في الكلام ده يا استاذ.. اوعي  
تكون من الناس اياهم اللي مش بيصدقوا  
الكلام ده

عادل: الله أعلم... ابقى روح انت صلي  
الفجر.. وتأكد بنفسك

سواق التوكتوك: ياريت يا استاذ ادعيلي  
ربنا يهديني.. بس انا بقولك الجامع  
اتفضل، والناس بطلت تصلي فيه بعد اللي  
حصل

عادل: خير ايه اللي حصل يابندق



السائق: عرفت اسمي منين يابيه.. انت  
عزيت ولا مخاوي... انزل ياعم ما  
تخوفنيش منك، ولا اقولك انا اللي هنزل  
سلام عليك

عادل: استني يابندق ما تخافش، انا قرئت  
اسمك علي ظهر التوكتوك.. ولا انت  
ناسي انك كاتب اسمك

بندق: اه صحيح.. لمؤاخذه يابيه.. بس  
بعيد عنك موضوع الشيخ عبد الصمد ده  
يجنن أجدعها أفندينا... ما سألتنيش يعني  
يابيه.. الناس بطلت ليه تصلي في الجامع.

-انا مستنيك تخلص كلامك، قول  
ياسيدي الناس بطلت ليه تصليه في الجامع



بندق: بعد وفاة المرحوم، الورثة كانوا عايزين يهدوا الجامع ويعملوا مكانه برج كبير، بس كل ما ييجي حد جديد يشتغل في الجامع، تحصل حاجه غريبة.. مرة واحد منهم بدأ يهد أول طوبه لقي إيد غريبة مسكت ايده.. فوقع من فوق السلم وطلع جري علي بيته، ومن ساعتها اتخرس ومش بيتكلم

ومرة تانيه دخلت ناموسه في عين واحد مابقاش شايف منها لحد دلوقتي.. واخر مرة مات المهندس مات فجأة بالسكتة القلبية... ومن ساعتها الجامع اشتهر، ومحدث قادر ييجي يهد منه طوبه..

عادل: سبحان الله



بندق: الجامع اهو يا استاذ... صحيح انت  
اسمك ايه

-اسمي عادل... وساكن مسافرة نص ساعه  
بالعربية من هنا

بندق: عربية ايه يا سعادة البيه.. خد  
رقمي اهو، وابقي كامنني وقت ما تكون  
عايز تروح اي مكان

عادل: طيب ياسيدي قول رقمك  
بندق: حط تليفونك في جيبك يابيه..  
وخد الكارت بتاعي اهو.. معاك الأستاذ  
بندق

عادل: أستاذ...؟ وكارت كمان...!، ده انت  
طلع مثقف اهو يابندق



بندق: امال انت فاكر ايه يابيه، احنا  
كمان متعلمين برضه.. انا تخرجت من  
ثالثة اعدادي، وجبت مجموع الثانوية  
العامة كمان، بس لولا الحوجة كان  
حالي بقي غير كده خالص..، الله يسامح  
اللي كانت السبب في الرمية السودا دي...  
مش هتسألني مين السبب يا استاذ عادل...؟!  
عادل: يجري بسرعة.. هبقي أسألك المره  
الجاية.. سلام يابندق.

-----

بندق: براحتك ياعمنا ... سلام يا صاحبي  
(المسجد علي اليمين مغلق، والمقهى علي  
اليسار مكتظ بالرواد)



عادل ل صبي القهوة ( 16 سنت )؛ لو سمحت

انا عايز اروح بيت الأستاذ كمال صابر

صبي القهوة؛ مين الأستاذ كمال صابر .. انا

ما اعرفش حد بالاسم ده

عادل؛ ازاي ده انا لسه مكلمه امبارح،

وقالي اسأل صبي القهوة وهو هيجيبك

لحد البيت، مش انت برضه (زيزو تخشينة)

-ايوة انا زيزو تخشينة، بس لو سمحت انا

اسمي حازم، الاسم الثاني محدش يناديني

بيه غير زباين القهوة اللي يعرفوني

-طيب ماتزعلش ياسي حازم، انا عايز بيت

الاستاذ كمال، رنيت عليه دلوقتي،

وتليفونه مقفول، بس اكيد انت عارفه،

هو زبون دايم علي القهوة.





حازم: بص يا استاذ عادل، زباين القهوة  
كتير زي مانت شايف، كمال صاحبك  
ده بيشتغل ايه.

عادل: انا لسه راجع مصر قريب، وكنت  
بكلمه علي فترات طويله، بس عمره ما  
كلمني عن شغله، وكل ما اسأله، يقولي  
ماشي الحال.. أديني اهو بعافر زي غيري.

حازم بدأ يزهدق : طب اسمع كويس  
يا عمنا، انا مش فاضي أحل معاك فوازير  
رمضان، في 3 اسمهم كمال هنا، انت عايز  
مين فيهم.. الدكتور كمال العجلاتي، ولا  
المتر كمال التريزي، ولا كمال كبود  
سواق التاكسي.



عادل: انا عايز البش مهندس كمال، هو  
شاب في نفس سني، كان من أوائل الطلبة  
في الجامعة ..

حازم: يبقى انت أكيد تقصد عمنا  
#كمال\_كبود السواق، اصله شاطر اوي  
وعمره جاب ميكانيكي للتاكسي بتاعه،  
لحظه هاخد إذن من المعلم واجي معاك  
علي بيته.

عادل: تمام انا في انتظارك

حازم رجع: يلا بينا يا استاذ عادل، سرحان  
في ايه.. وبتبص ليه كده أوي ناحية  
الجامع

عادل: مفيش حاجة.. بس الجامع شكله  
جميل جدا.. خسارة انه مقفول..



حازم (بصوت منخفض): امشي يا استاذ نبعد  
عن هنا الاول،. عشان محدش يسمعنا، الله  
يسامحهم اللي قفلوه،

نظر عادل نحوه في ذهول وقال: هو الجامع  
بقي بيخوف اوي كده

همس حازم في اذنه قائلاً: ايوة يا استاذ ده  
في ناس بتقول انهم عاملين تحته مخزن  
كبير للسلاح، وناس بتقول ان في مقبرة  
تحت الجامع، عشان كده هم عايزين  
يهدوه، لكن ربنا كبير يا استاذ عادل

عادل: ونعم بالله، لسه باقي كتير علي  
البيت يا حازم؟



حازم: احنا خلاص وصلنا، الاسطي كمال  
اهو عند التاكسي الابيض اللي علي  
يمينك، انا هسيبك وارجع القهوة.. سلام

\*اقترب عادل ناحيته صديقه ثم وضع يده  
علي كتفه وقال: السلام عليكم ازيك  
يا بشمهندس كمال

استدار كمال ناحيته سريعا ثم رد في  
لهفة وقال: وعليكم السلام .. انت اكيد  
البشمهندس عادل توفيق.. والله بعودة  
الايام يا صاحبي.. بالأحضان يا صديق العمر

بأدله عادل بالأحضان والترحيب ثم قال:  
وحشني يا ابو كمال، ايه يا بني اللي عمل  
فيك كده.. فين الشياكة بتاعة زمان،  
ده انت بقيت اقرع، ومسلوع، ووشك بقي



عامل زي الرغيف المحروق، والتاكسي ده  
بتاع مين؟ انت متأكد انك كمال صابر  
اللي كنت زميلي في الجامعة.

-ايوة متأكد يا عادل، احمد ربنا انك  
هربت بدري يا صاحبي، احنا هنا عايشين  
هنا في المفزعة، وغصب عنك هتشكل  
علي حسب الظروف اللي حواليك.. وانا  
نصيبي زي ما انت شايف.. سيبك من  
الكلام ده ويللا نطلع فوق نتغدي ونشرب  
شاي

-لا اسف انا مستعجل، يللا نروح لباقي  
صحابنا زي



-طب علي الأقل اطلع سلم علي الحجه..

دي نفسها تشوفك وكانت بتدعيك

طول ما انت مسافر

-أكيد هاجيها بس وقت تاني، لازم نلحق

باقي الشباب محتاج اقابلهم كلهم النهارده

-طيب علي بركة الله، اتفضل ادخل

التاكسي برجلك اليمين، انت اول زبون

النهارده

عادل يضحك : يعني هتحاسبني علي

مشاوير النهارده

-عيب عليك يا دووله : ده انا نفسي

أردلك حاجه من جمالك عليا ايام

الدراسة، لولاك انت ما كنتش طلعت من

العشرة الاوائل



عادل: انت تستاهل كل خير يا كمال،  
قولي بقي هنروح علي فين

-هنروح أول حاجة عند #اسماعيل و  
#يس قريبين منا في الميدان، بعد كده  
هنروح لصاحبنا #فرج\_الصعيدي اكيد  
هنلاقيه قدام الجامعة  
-وهم بيعملوا ايه هناك

-التلاتة ماشاء الله عاملين مشاريع مهمة  
جدا بتفيد البلد ..

-جميل جدا يا كمال فرحتني بجد، أخيرا  
حد من الدفعة قدر يحقق أحلامه،  
ماتتصورش قد ايه انا متفائل دلوقتي

-فعلا يا عادل التلاتة دول مجتهدين جدا،  
ما شاء الله وبدأوا من الصفر، وكملاوا في





طريقهم بجهود ذاتية لحد ما وصلوا  
للمشروعات العملاقة دي

عادل: الحمد لله عقبالنا ياسيدي لما ننجح  
كده زيهم، هو انت مش قولتلي يا كمال،  
انك بتشتغل مدرس كمبيوتر في مدرسة  
خاصة

كمال: شغل المدارس الخاصة ما يفتحش  
بيت يا عادل، انا اشتغلت فيها 3 شهور  
وسبتها، وبعدين اشتغلت علي تاكسي بتاع  
واحد جارنا، لحد ما قدرت اجيب التاكسي  
ده، والحمد لله كده رضا، ادعيلي بس  
اخلى الأقساط اللي عليه، مش باقي غير  
10 أقساط ان شاء الله.



عادل (في حسرة): لا حول ولا قوة إلا  
بالله.. ربنا يوفقك يا صاحبي.. قولي  
صحيح احنا كده هينفع نقابل زملائنا في  
شغلهم دلوقتي، ولا لازم ناخذ منهم إذن  
قبلها بكام يوم..؟!

كمال: انت بالذات تقدر تقابلهم في اي  
وقت انت أعز صديق بالنسبانا كلنا  
يا عادل

عادل: طيب تمام.. هستأذنك اعمل  
تليفون مهم..

كمال: اتفضل يا دووله

.....

عادل: السلام عليكم.. ازيك يا حماتي..  
يارب تكونوا بخير



مامت ليالي: ازيك ياعادل، احنا بخير  
الحمد لله وانت عامل ايه.. مشيت ليه بدري  
امبارح

عادل: اسف يا حماتي كان عندي مشوار  
مهم النهارده عشان كده مشيت بدري..  
وقولت اطمئن عليك دلوقتي

مامت ليالي: ربنا يوفقك يا حبيبي، خلاص  
يبقي تيجي تتغدي معانا النهارده  
عادل: اسف يا طنط، مش هقدر اجي  
النهارده

الحجه كريمه: ليه يا بني خير.. هتأخر  
كتير بره ولا ايه

عادل: لا مش هتأخر.. بس متأسف مش  
هقدر اجي



كريمه: اكيد ليالي مزعلاك، عشان  
كده مشيت بدري امبارح، يبقني لازم تيجي  
عشان اعرف في ايه؟ ولا هزعل منك  
يا عادل

عادل: ماقدرش علي زعلك ياطنط وعشان  
خاطر حشرتك انا جاي النهارده..

كريمه: طيب يا حبيبي تيجي بالسلامه..  
انا هفضل دلوقتي عشان ليالي بترن عليا  
عادل: اتفضلي حضرتك سلام عليكم

نظر كمال الي عادل في دهشة وقال: ما  
قولتيليش انك اتجوزت يا عادل، عموما  
ياسيدي الف مبروك، انت اول واحد يتاهل  
في الدفعه النحس دي



ضحك عادل وقال: انا لسه ما اتجوزتش  
يا كمال، احنا لسه مخطوبين من امبارح

كمال: ماشاء الله الف مبروك يا عادل،  
ربنا يتمم بخير، المفروض تجيب هديته  
لعروستك بقي النهاردة.. علي فكره انا  
ذوقي حلو جدا في اختيار الهدايا، حظك  
من السما يادووووله

عادل: واحنا راجعين ان شاء الله.. هو لسه  
باقي كتير علي ما نوصل ل اسماعيل  
وياسين

كمال: لا خلاص ياسيدي احنا وصلنا اهو،  
يللا انزل واقلل باب التاكسي كويس

نظر عادل الي كمال متسائلا: انزل فين هو  
ده مقر الشركه ولا ايه؟



اطلق كمال ضحكة مدوية وقال: شركة  
ايه يا عادل..؟ مين جاب سيرة شركة  
دلوقتي..؟

عادل: مش انت قولتلي ان اسماعيل وياسين  
عملوا شركة ومشروع بيضيد البلد

كمال: انا ما قولتش شركة، قولت مشروع  
يا عادل افكر كويس

عادل: طيب فين هو المشروع ده

كمال: ما تستعجلش انزل الاول وبعدين  
أقولك

استجاب عادل للامر وترجل من التاكسي  
ثم اغلق الباب ونظر الي صديقه مذهولا  
وقال: انا مش فاهم انت واقف ليه هنا  
يا كمال



اقترب كمال قليلا ثم وضع يده علي  
كتف عادل وقال: هو ده المشروع اللي انا  
كلمتك عليه يا صديق العمر، أشهر  
عريضة فول في الميدان، واللي بيغسل  
الصحون هناك ده حبيبك ياسين، واللي  
بيغرف من قدرة الفول ده صاحبنا  
اسماعيل.. ما تفكرش كثير، و تعالي  
نسلم عليهم

تقدم كمال في اتجاههم وقال: السلام  
عليكم، منورين الميدان يا جدع شباب في  
الدنيا

اسماعيل وياسين (في نفس واحد):  
وعليكم السلام ورحمة الله وبركاته،  
ازيك يا كمال، هتاكل ايه النهاردة، فول  
بالزيت الحار، ولا ناوي تاخد ساندويتشات





وتمشي انت والزبون اللي معاك ده، شكله  
قرفان ييجي ياكل عندنا

كمال: زبون ايه يا متخلفين.. سيب اللي  
في ايدك وبص كويس يابني انت وهو..  
ده عادل زميلنا أيام الدراسة... تعالي قرب  
يا عادل واقف بعيد كده ليه

عادل: السلام عليكم ازيك عامل ايه يا  
اسماعيل.. وانت يا استاذ ياسين، أخبارك  
ايه.. ما تفهموني بالضبط ايه اللي انتوا  
بتعملوه ده انا بقيت تايه دلوقتي ومش  
فاهم حاجة..

ضحك اسماعيل بأعلي صوته وقال: دي  
شركة لاسستيراد وتصدير الأدوات



الالكترونية، ايه رأيك بقي يا بشمهندس  
عادل في المشروع الجميل ده

عادل: شركة ايه يا اسماعيل، انت بتهزر

ياسين: استني انت ياسماعيل سيبنى انا أرد  
عليه.. بص ياسي عادل شايف الصحن اللي  
في ايدي دي كويس..؟ هي دي السيديات  
بتاعتنا، وقدرة الفول دي بقي هي الشاشة  
بس للأسف شاشة عادية مش LCD ،  
والمغرفة الطويلة دي اسمها الماوس، أما  
بقي الكيبورد اهي قدامك، طاسة الزيت  
والمفاتيح الطعمية اللي جواها، وشايف  
الأنبوبة دي بقي هي دي وحدة التشغيل  
يعني ال CPU ، حتي تعالي قرب كده  
اسمع صوتها.. ايه رأيك بقي في الشركة  
دي..!!؟



اسماعيل: نسيت تقوله علي الهارد يافالح

ياسين: الهارد بقي هو اللي احنا فيه  
دلوقتي.. الشمس، والتراب، وصوت  
العرييات، ده غير بتوع البلدية أجارك  
الله منهم

اسماعيل: اللهم احفظنا يارب.. بلاش  
السيرة دي يا عم ياسين، وهات كام طبق  
نجهز فطار للرجالة

عادل: لا احنا مستعجلين، نتقابل بكره ان  
شاء الله عندي في البيت، مستنيكم بعد  
المغرب

اسماعيل: والله محد فينا جاي غير لو  
اخذتوا الساندويتشات دي معاكم.. افطروا  
بيها وانتوا ماشيين



عادل: ماشي ياسيدي مقبولة منك.. يلا  
ياكمال.. سلام عليكم

كمال: يلا بينا يادوولة نلحق #فرج  
صاحبنا، انا كلمته دلوقتي هو مستنينا  
قدام الجامعة

عادل: بيعمل ايه قدام الجامعة، هو رجع  
للدراسته تاني ولا ايه

كمال: لا ما رجعش بس هتعرف اول ما  
نوصل ان شاء الله

(استند عادل بظهره الي المقعد الأمامي  
بجوار السائق، ولم ينطق بكلمة واحدة  
أثناء سيرهم، بينما كان كمال يبكي  
وينتحب قلبه ولكنه يخفي دمع عينيه



الفاضح... يلهو ويضحك وفي داخله ألف  
قصة من قصص الحزن والألم..)

وصلوا اخيرا الي مبني الجامعة

نظر عادل الي كمال صديقه وقال: عارف  
يا كمال انا نفسي في ايه دلوقتي..؟

ن نفسي ادخل الجامعة، وابوس كل شبر  
وكل طوبت فيها، دي مهما كانت برضه  
هي المكان اللي اتعلمنا فيه

كمال: مش وقته يا صديقي، ابقى تعالي  
لوحدهك وعيش احلامك احنا كفايت  
علينا كده، يلا بينا دلوقتي عشان نلحق  
فرج قبل ما يروح مكان تاني

عادل: هو فرج هيقابلنا فين يا كمال قريب  
ولا بعيد من هنا



كمال: علي الناصية الثانية، قصاص

الجامعة، جيب المكتبة اللي هناك دي

عادل: قصدك انه صاحب محل التيك

اواي اللي هناك ده

كمال: انزل الأول يا عادل، احنا هنركن

هنا

عادل: طيب لما نشوف اخرتها معاك ايه

يا عم كمال

(الشارع مزدحم بالمارة ومكتظ بالسيارات

ولكنهم تمكنوا اخيرا من عبور الطريق

بعد محاولات متكررة من التقدم والتأخر

وكانهم راقصي باليه في ساحة عامة)

كمال: صاحبك اهو يا عادل



عادل: قصدك علي مين، ماتصد منيش  
اكثر من كده

كمال: لازم تتصدم عشان تعرف احنا  
وصلنا لأيه، ومصير الشباب اللي بيتخرج  
كل سنة هيبقي ازاي في المستقبل؟

عادل: قصدك ايه ياكمال

كمال: قصدي زي ما انت شايف اهو، التالت  
علي الدفعه بتاعتنا بعد انا وانت، بتاع تمر  
وسوبيا ...

كمال ل فرج: اتنين تمر لو سمحت

فرج: انتة ما هتبطلشي الحركات دي واصل  
يا ابو كمال.. ميتة هتكبر عاد

كمال: جبتلك معايا هديتة النهاردة..  
فاكر مين ده.. ركز كويس يا عبقرى





فرج ب برود: عادل زميلنا والاول علي

الدفعه، اهلا بيك يا عادل

كمال: مالك يا فرج في ايه

فرج: مضيش حاجه يا كمال.. تشربوا ايه

كمال: والله ما احنا شاربين حاجه غير لما

نعرف في ايه

فرج في حزن: بت عمي هتتجوز النهارده،

خلاص يا كمال #عبير وافقت علي

العريس، أهلها اجبروها ان هي توافق ..

كمال في ذهول: بسهولة كده تتجوز حد

تاني، وتسلم نفسها ليه، وتعيش طول

عمرها معاه، رغم انها بتحب حد غيره

اغرورقت عيني فرج بالدموع ثم قال:

البنت عندينا في الصعيد مجرد كائن



ضعيف، وكل الموجودين معاها في البيت  
بيتحكموا في تصرفاتها وأفكارها، بدايتها  
من أبوها وامها لحد أصغر واحد في اخواتها.

وتخاف جدا تاخد قرار من نفسها، عشان  
محدث يلومها لو حصلت حاجه في  
المستقبل.. الوضع يختلف جدا من هنا  
للصعيد ياكمال ....

اتفضلوا اشربوا العصير.. خد يا عادل

عادل: عصير ايه بس يافرج... احنا جينا  
في وقت غير مناسب بالمره.. حتي مش  
هعرف اسألك دلوقتي ايه اللي انت عامله  
في نفسك ده ..

فرج: انا هوفر عليك السؤال، انا بكتب  
رسايل علمية في مكتب كمبيوتر بعد



الظهر وبتحاسب بالقطعة، بس عددنا  
كبير في المكتب، والشغل ضعيف،  
مالقيتش قدامي غير اني اعمل كده،  
خصوصا اني عايش لوحدي في الغرب،  
وكماني بدأت أحضر دراسات العليا، وقريب  
جدا هنا نقاش رسالت الماجستير بتاعتي،  
بعد شهرين ان شاء الله

عادل: ربنا يوفقك ويعوض صبرك خير  
يا فرج.. انا اكثر واحد حاسس بيك  
دلوقتي، لأنني كنت عايش في الغرب  
زيك خمس سنين بعيد عن اهلي وحبائبي

فرج ساخرا: غربة عن غربة تفرق  
يا بش مهندس.. خانك ذكائك المرة دي..  
أصعب غربة هي الغربة وانت جوه بلدك



یا عادل بعید عن اهلک وناسک رغم انهم  
قربین منک

عادل: فعلا معاک حق یا فرج.. عموما احنا  
هنمشي دلوقتي.. وفي انتظارک بکـره  
بعد المغرب ان شاء الله  
فرج : اتفقنا یا شباب هکون موجود في  
معادي ان شاء الله

عادل: علي برکت الله، یلا بینا یا کمال  
نشوف باقي صحابنا،.... اظن باقي کمان  
خمسة غیرنا من مجموعتنا )  
#الجيل\_الصاعد)



كمال: سلامتك يا عادل، انت قابلت  
المجموعة كلها النهاردة، ولا نسيت ان  
عددنا كان خمسة في اخر سنت

عادل: انا ممكن انسي أي حاجه ماعدا  
الجروب بتاعنا لسه في 5 تانيين ياكمال،  
احنا كنا 10 مش خمسة

كمال: انساهم يا عادل، كفايت انك  
رجعت بالسلامة ولقيت حد مننا موجود!!...

عادل: انت ناسي ياكمال اننا اتعاهدنا،  
عمر واحد فينا ينسي الثاني، ولا نفترق  
طول العمر

كمال: لا مش ناسي يا عادل، وهقولك  
عشان ما تفكرش كثير اتنين الخمسة  
التانيين منهم (خالد وشوقي) غرقوا في



البحر علي حدود ايطاليا كانوا مسافرين  
بشوفوا اكل عيشهم بعد ما ضاقت بيهم  
الدنيا،، وعاصم دخل المستشفى عشان  
عملية الزائدة، جاله هبوط في القلب مات  
بسبب جرعة مخدر زيادة، وأشرف كان  
ضمن اللي ماتوا في برج اسكندرية اللي  
وقع السنة اللي فاتت

مش باقي غير صفوت ده بقي رجع يشتغل  
مع ابوه في تجارة السلاح والمخدرات،  
ومستحيل طبعا انك توصله ..

عادل: يعني كلهم كده ماتوا إنا لله وإنا  
إليه راحعون



کمال: انا ما کنتش عایز افکرک بس  
انت الی جبتہ لنفسک.. قولی بقي هنطلع  
علی فین دلوقتی

عادل: ارجع بینا علی البیت، انا عایز اقعد  
فی أوضتی أسبوع متواصل، عشان اقدر  
استوعب الی حصل ده کله.

کمال: انت لازم تتعود علی الصدمات  
یادوولت، وتبقي عندک مناعة منها، انت  
یادوب لسه فی البدايت، والمشوار طویل  
یا صاحبی ...

وبعدین عایز حماتک تزعل منك ولا  
ایه.. انت مش قولتلها انک هتغدي معاها  
النهارده





عادل: والله ما ليا نفس لأي حاجة  
يا كمال، انت مش حاسس باللي انا فيه،  
يمكن عشان انت عشت كل صدمة من  
دول لوحدها، لكن بالنسبة بالي كل  
الصددمات دي عشتها مرة وحدة، حاسس  
دلوقتي كأن صخرة كبيرة وقعت فجأة  
فوق دماغي

كمال: انت ما عشتش حاجة يا عادل انت  
يادوب سمعت

عادل: ساعات اللي بيسمع حاجة بيعيشها  
بخياله اكثر من اللي عاشها في الواقع ذات  
نفسه

كمال: صدقني يا صاحبي، لو فكرت  
كثير هتتعب وتخسر كل حاجة أولها



خطيبتك .. انا هاخذك دلوقتي  
وأوصلك لحد عندها، وكمان هنروح سوا  
نجيبها هديّة مناسبة في أول زيارة ليك  
بعد الخطوبة.

عادل: اعمل اللي تشوفه ياكمال، بس  
عشان خاطري اطلع بينا الأول، علي  
الجنينة اللي كنا بنتقابل فيها كل يوم  
بعد الجامعة.

كمال شارد الذهن: طيب يا عادل.. بس  
اوعدني تكون دي اخر مرة نروح فيها  
هناك، وبعدين تركّز في أهلك،  
ومستقبلك، وخطيبتك اللي أكيد  
دلوقتي مستنياك، ونفسها تشوفك  
مبسوط دايما



عادل: حاضر يا كمال أوعدك ان شاء  
الله،،،،،،،

#في بيت العروسة

ليلى تدخل مبتسمة

ازيك ياماما.. وحشتيني ياست الكل

كريمة: انتي اللي وحشتيني اكثر  
يا حبيبتي، راجعة ليه بدري كده، مش  
قولتيلي هتأخري النهاردة عشان عندك  
محاضرات كتير

ليلى: أصل ياماما المحاضرة الثانية فيها  
معيد رخم ومش عايزه اشوف وشه،  
والمحاضرة الثالثة كلها رغي وكلام  
نظري ونصايح، البنات كلها زهقت منها



تبسمت والدتها وقالت: اللي عايز ينجح في  
حاجة لازم يستحمل ويتغلب علي كل  
الظروف اللي حوالية

ليالي: ماشي يا ست ماما،.. قوليلنا بقي  
يا ست الكل هنتغدي ايه من ايدك الحلوة  
النهارده

كريمة: انا عاملة محشي مخصوص عشان  
عادل جاي يتغدي معانا بعد شوية،.. ماما  
قولتلك ان هو جاي، وعارفة ومتأكدة  
انك رجعتي بدري عشان كده

ليالي: يوه ياماما دايم كده بتكسفيني،  
طب عشان كلامك ده مش هقابله النهارده



کریمه تضحک: براحتک انا مش هخسر  
حاجته.. ادخلي اوضتک، واقضلي علي  
نفسک، وما تخرجيش لحد ما عادل یمشي

لیلي: کده یاماما طیب بای دلوقتی

(عمر راجع من المدرسته متبهدل)

الحجه کریمه: یانهار ابيض، ایه اللي  
جرالک یابني، مالک متبهدل کده لیه،  
وهدومک متقطعة

عمر: مفیش حاجه یاماما

کریمه: مفیش حاجه ازای؟ انطق بسرعه  
والا هخلي باباک یسیب الشغل وییجي  
یشوفک دلوقتی

عمر: اتخانقت مع زمیلي فی المدرسته



كريمت: اتخانقتوا امتي، وليه ياعمر

اكيد انت اللي غلطان

عمر: اسمعيني الأول وبعدين هتعرفني

ابنك غلطان ولا لأ... النهاردة في حصرة

الدين المستر كان بيتكلم عن السرقة

وبيقول انها حرام... واللي يشوف حد

بيسرق وما يقولش عليه يبقي هو اشرتكر

معاه في الذنب، ولسه المستر ما خلاصش

كلامه لقيت عاطف زميلي بيمد ايده في

شنطة كريم صاحبي ويسرق منها،

الأقلام والكراسات، فانا قولت للمستر

عليه، راح المستر ضربه قدامنا كلنا ...

كريمت: كويس وبعدين



عمر: وبعد ما خلصت الحصة، اتخانقنا انا وعاطف، والفصل اتقسم نصين، نص الفصل مع عاطف، والنص الثاني معايا، بس الحمد لله احنا غلبناهم، مع انه كانوا اكثر منا بكثير ...

كريمته: الحمد لله

عمر: هو دايمما كده ياماما الناس اللي مع الحق قليلين جدا؟!

كريمته بتنهيده طويلته: ايوة فعلا يابني

عمر: وصحيح ياماما اللي معاه الحق هو اللي بيغوز دايمما

كريمته: أكيد يا حبيبي بس لازم اللي معاه الحق، يصبر وما يعملش حاجه تغضب ربنا





عمر: الحمد لله انا بصلي، وبصوم، ومش  
بعمل حاجه تغضب ربنا

كريمه: مش كفايت يا بني لازم تعمل  
خير كثير مع الناس، عشان ربنا يحبك  
اكثر

عمر : حاضر يا ماما... في حد بيرن الجرس  
هنزل اشوف مين..

كريمه: ده اكيد عادل خطيب اختك،  
انزل افتحله الباب

عمر ( فتح الباب ) : ازيك يا ابيه عادل،  
اخبارك ايه، اتفضل ادخل، ماما  
مستنياك فوق



عادل: متشکر یاعمر، عامل ایہ فی  
الدراستہ، شد حیلک الامتحانات خلاص  
علي الأبواب

عمر: ما تخافش عليا، انا مذاکر کويس

عادل: ماشي ياسيدي، بس مالک متبهدل  
کده ليه

عمر: اصل انا عضو في فريق التمثيل،  
وعملنا النهاردة مسرحيه. وانا قمت بدور  
ال .....

انا اسف مش هكذب عليك، انا اتخانقت  
مع واحد النهارده، وما تسألنيش ليه، وقت  
تاني ابقی اقولک، اتفضل ادخل سلم علي  
ماما



عادل: السلام علیکم، ازیك یاحجه  
کریمه، اخبارک، والحج هاشم عامل ایه  
کریمه: احنا کلنا بخیر یاحبیبي،  
اتفضل اقعد هنا، مش ناسي حد تاني..؟!

عادل: زي مین یاطنط  
کریمه: ما اعرفش.. بس في حد انت عایز  
تسأل علیه ولا لا ؟

عادل ( وشه جاب الوان ) : بصراحه ایوة  
کریمه: أكید لیلي.. ولا في حد تاني  
عمر: أكید یعنی مین غیرها، ولا ایه  
یا استاذ عادل

کریمه: روح انت یاعمر غیر هدومک،  
عایزه اتکلم مع عادل شویته



عمر: حاضر ياماما سلام عليكم

كريمه: مالك يا عادل يابني، انتوا  
لحقتوا تزعلوا من بعض ده انتوا لسه  
مخطوبين امبارح، لو كانت ليالي مزعلاك  
قول وانا هعرف اتفاهم معاها كويس

عادل: انا مش زعلان من ليالي في حاجه،  
بس كان في سوء تفاهم بينا وراح لحاله  
كريمه: متأكد ان راح لحاله..؟ يعني مش  
عايز تقول حاجه

عادل: حقيقي ياطنط الموضوع انتهى،  
ومفيش بينا اي زعل دلوقتي

كريمه: انا مش هضغط عليك، وما  
يهمنيش اعرف حاجه، المهم عندي هو اني



اشوفكم كده قدامي مبسوطين دايمًا  
طول الوقت ..

انا هدخل انده ليلي عشان تسلم عليك..  
بس انت خليك شاطر، واعمل زي شباب  
الايام دي اللي بياخبطوا كيان البنت  
ويخطفوا قلبها في قعدة وحدة  
عادل: الحب مش بالكلام ياطنط، وعموما  
حاضر هحاول اعمل اللي بتقولي عليه.

(تسارعت دقات قلب الحبيب، وراح يستطلع  
هلال المحبوب، أتراه يأتي علي عجل، أم  
يمتنع عن الظهور ويغيب)  
فتحت كريمة الباب،،،، ليلي في أجمل  
وأرقي الثياب



كريمت: ايه ده كله.. ايه ده كله...  
لابست ليه دلوقتي، نسيتي انك قولتي انا  
مش هقابل عادل ياماما

ليالي: مين قالك اني هقابه.. انا كنت  
بشوف الضستان ده كويس عليا ولا لأ..  
عشان من اول ما اشتريته ما لبستهوش ولا  
مره في اي مناسبة مع انه جميل جدا،  
وكمان بحبه اوي عشان بابا جابهولي في  
عيد ميلادي.

كريمت: واشمعني لبستيه دلوقتي ما كان  
قدامك الايام اللي فاتت... وبعدين  
المكياج ده جديد كمان وكنتي



هتجريبه، ولا هو لزق في وشك لوحده  
غصب عنك

ليلي: وبعدين ياست ماما عايزه تقولي ايه  
كريمة: عايزه اقول اطلعي عشان تسلمي  
علي عادل

ليلي: واضح انك مصممة... حاضر ياماما  
انا هخرج عشان خاطر ك  
كريمة تضحك: ماشي يالولا... هو ده  
اللي انا واخداه منكم

(فتحت ليلى الباب... سبقتها الحجة  
كريمة... ليلى مترددة... جذبتها والدتها  
من يدها بقوة الي الخارج... فوقف عادل  
مذهولا شديد الانبهار بما رأت عيناه... فقد  
كان ظهور القمر مختلفا هذه المرة...)





فمدت ليلى يدها ناحيته وقالت :

ازيك يا عادل، عامل ايه

عادل: الحمد لله بخير، وانتى ؟

ليلى: انا بخير الحمد لله ...

كريمه: انا هروح اشوف الأكل علي النار،

واجيبلكم حاجه تشربوها

عادل: اتفضلي يا حجة

ليلى: اجي معاكي ياماما

كريمه: لأ خليكى... وتبص لعادل

(اتصرف يا لخمه)

عادل: انتى زهقتى من يالىلى، عايزه

تسيبيني ولا ايه



ليلي: لا ما زهقتش ، بس انت ساكت، يبغي  
أكيد مش عايز تكلمني، فانا هقعد اعمل  
ايه

عادل: اعتبرينا قاعدين علي الشط ،  
وبنتأمل في البحر

ليلي: البحر بيصرخ، ويعبر عن اللي جواه،  
ولا انت ما سمعتش صوت الموج ولا مره

عادل: سمعته أكيد... بس الناس بتحب  
البحر الهادي، وبتخاف من الموج العالي

ليلي: الموج العالي دليل علي قوة البحر،  
ومش أي حاجه تقدر تكسره

عادل: بس الموج بيحتاج رياح قويه عشان  
تحركه يعني محتاج هوا



كريمت ( سمعت كلمت هوا ) : ما تشغلي  
المروحة او التكييف ياليلي، الراجل عايز  
هوا

ليلي: حاضر ياماما ..

نظرت ليلي ناحيته في خجل وقالت: انت  
عايز الهوا اللي بتقول عليه ماما، ولا  
قصدك علي الهوي الثاني، اللي درسناه في  
أشعار قيس وليلي،،

تبسم عادل ضاحكا ثم قال: انتي شايفه  
ايه

ليلي: شايفت انك ما تعرفش حاجه عن  
الهوا،، انت حتي ما رديتش علي المسج اللي  
بعتهالك امبارح



عادل: انتي أخرجتيني امبارح قدام  
صاحبك

ليلي: اللي بيني وبينك المفروض ما  
يتأثرش بأشخاص تانيين، انت لو زعلتني  
قدام العالم كله، وجيت صالحتني  
لوحدي أكيد هسامحك

عادل: انا كنت مسامحك من قبل ما  
تصالحتيني

ليلي: امال ليه ما رديتش عليا ..

عادل: أقولك الحقيقة وما تضحكيش

ليلي: قول ياسيدي

عادل: انا تعمدت اني ما اردش علي المسج،  
عشان ترني عليا بعدها وتكلميني،، كنت  
محتاج أوي اني اسمع صوتك النهارده



ليلي: ماشي ياسيدي اهو النهاردة سمعت

صوتي وشوقتي كمان، يلا صالحني

عادل: انا اللي أصالحك برضه... عموما

ياستي ماشي شوفي كده جبتك معايا

ايه،، وقولي رأيك دلوقتي في ذوقي

ليلي: دلوقتي دلوقتي مصمم يعني

عادل: ايوة مصمم جدا

ليلي: طيب ياسيدي، اول حاجه الجاكت

الأرجواني لونه جميل جدا لكن احنا مش

في الشتاء دلوقتي، ثاني حاجه الصندل

الأبيض ماينفعش مع الجاكت الشتوي

الأرجواني،، تالت حاجه الشنطرة الصفرا

مع الجاكت الأرجواني والصندل الأبيض



كده يعملوا قفلة،، لكن حقيقي ذوقك  
يجنن يا عادل!!

عادل في سره: الله يسامحك يا كمال  
عايز تطفش البنت كده من اولها

ليلي: انت بتقول حاجه يا عادل

عادل: لا مفيش حاجه، بس بصراحه  
الحاجات دي كلها ذوق كمال صاحبي،  
فضل يحلف قدامي ان ذوقه حلو ويجنن  
لحد ما خلاني اقتنعت برأيه وادي النتيجة

ليلي: أولا يا عادل لو فكرت في كل هديته  
لو حدها هتلاقىهم كلهم حلوين،،، لكن  
الثلاثه مع بعض شكلهم غريب

ثانيا انا هقبل الهديه عشان ما تزعلش  
مني، بس ما تجيبليش حاجه ثانيه، ولما



ابقي مراتك ياسيدي انا اللي هطلب منك  
كل حاجة ساعتها ..

ثالثا وده الأهم لما تفكر تجيبلي هديته  
يبقي تجيبهالي علي ذوقك، انا هتزوجك  
انت مش صاحبك، وأيا كان ذوقك انا  
متأكد انه هيعجبني.. اتفقنا يا عادل

عادل: تمام اتفقنا

كريمه جات: اتفقتوا علي ايه يا حلوين،  
مممكن اعرف ولا ده سر بينكم

ليالي: ما نقدرش نخبي عنك حاجه يا ست  
الكل، عادل بس جابلي هديته، وبعد  
إذنك هقبلها المرة دي عشان عادل ما  
يزعلش.. وكل اللي انتي عايزه تقولييه  
دلوقتي انا قولتهوله





كريمت: ما تستعجلش يا بني،،، الايام  
جايت كثير ان شاء الله.. وهتجيبها هدايا  
لحد ما تزهدق

عادل: عمري ما ازهدق من حاجه زي دي،،  
كفايت اشوف البسمت علي وش ليلي وانا  
بقدملها وردة بسيطة.. او افكرها بهديت  
تليق بيها

ليلي: تفتكرني،،،؟ يعني انت ممكن  
تنساني

عادل: ما تخافيش انا هعلق صورتك في  
رموش عينيا عشان تفضلي قدامي طول  
الوقت

(ليلي تبسم في خجل)



كريمه: من امتي بتعرف تقول كلام زي  
ده يا عادل

عادل: انا بكتب شعر من ايام الجامعة

ليلى: طب ما تسمعنا حاجة كدة

كريمه: خليها وقت تاني ياليلي،، باباكي  
لسه مكلمني دلوقتي، بيقول، ان قدامه  
10 دقائق ويوصل البيت، ولازم الأكل  
يكون جاهز، ولا ايه رأيك يالولا

ليلى: ودي محتاجة رأي... انا هقوم حالا  
دلوقتي،، احنا مش قد زعل سي بابا،، ما  
اقدرش اشوفه مكشر ابدأ في البيت.. بعد  
إذنك يا عادل... خد ريموت التليفزيون  
واسمع اللي يعجبك



بعد دقائق معدودة دخل أبو عمر من باب  
المنزل في خطوات واثقة ثم قام بالقاء  
السلام علي عادل وقال: السلام عليكم،  
ازيك يا عادل عامل ايه، انا جيت دلوقتي  
من الشغل عشانك، بعد الحاجه قالتلي  
انك منورنا النهاردة

تقدم عادل ناحيته لمصافحته ثم قال:  
ربنا يخليك لنا يا عمي، في الحقيقة  
طنط كريمه كامتني من شويه وقالتلي  
لازم تيجي تتغدي معانا، وانا ما قدرش  
ارفضها طلب، خصوصا اني محتاج اكلم  
مع حضرتك في موضوع مهم

-خير يا عادل في مشكله معاك ولا ايه



**عایز اطلب من حضرتک .....**

## حضرتک عامل ایہ

الحج هاشم: ايه اللي في وشك ده ياعمر،  
انت اتخانقت مع حد ولا ايه



عمر: انا قولت لماما كل حاجه.. وهي  
هتقول لحضرتك يابابا... اتفضل اتغدي  
الأول

هاشم ( بنبرة حادة): مش هتغدي ولا هعمل  
اي حاجه غير لما اعرف ايه اللي حصل  
معاك

اجاب عمر في امتثال: انا اتخانقت مع  
عاطف زميلي في الفصل النهاردة يابابا،  
عشان قولت للمستتر انه يسرق الأقلام  
والكراسات من كريم صاحبي،، بس انا  
ضربته اكثر من كدة وهو دلوقتي في  
المستشفى

ابو عمر: شايفك مبسوط يعني؟ مع إن اللي  
انت عملته ده غلط



عمر: ازاي يابابا بتقول كده.. وماما قالتلي  
ان انا مش غلطان

هاشم: مامتك أخذت الموضوع من وجهة  
نظر تانية يا عمر .. لما انت حذرت  
صحابك وخليتهم يعرفوا ان عاطف ده  
حرامي.. لكن ده غلط من وجهة نظري

كريمه: قصدك ايه يا ابو عمر  
-قصدي اللي عمله ابنك يا حجه كريمة  
صح وغلط في نفس الوقت

كريمه: حاول توضح أكثر شوية.. احنا  
ما نفهمش كلام الألفاظ بتاعك يا حج

هاشم: بص يا عمر يابني. كان المفروض  
الأول تكلم صاحبك بينك وبينه  
وتقوله ان ده غلط، وزي انت ما تقبلش ان



حد ياخذ حاجتك، ما تاخذش حاجة  
صاحبك اللي أكيد باباه تعب عشان  
يجيبهاله.

عمر: طيب ولو ما سمعش كلامي..؟

هاشم: ساعتها تقول الكلام ده للمستتر  
بينك وبينه، وهو يتخذ القرار المناسب،  
لكن انت كده فضحته بين صحابه..  
واحتمال كبير دلوقتي يسيب المدرسة  
ويشتغل حرامي أو بلطجي في الشارع  
عادل: المدرس كمان غلط ان ضربه قدام  
صحابه، كان المفروض يستدعي ولي أمره  
قبل أي تصرف

كريمت: انا احتارت معاكم دلوقتي، يعني  
المفروض اللي زي عاطف ده نطبطب عليه





ونقول له شاطر يا حرامي واسرق كمان  
وكمان

هاشم: لا طبعاً.. بس اللي زي عاطف ده  
المفروض نهتم بيه ونحتويه و نحاول معاه  
علي قد ما نقدر.. لو قدرنا اننا نصنع منه  
انسان كويس يبقي أنقلنا الناس من  
شروره... لأن المجتمع حقيقي مش ناقص  
مشردين اكثر من كدة

كريمته: انا كده فهمت معاك حق في  
كل اللي قولته.. كفاية بقي الأكل  
هيبرد.. نتغدي وبعدين نكمل كلامنا

هاشم: انا اسف يا عادل يا بني،.. دي قلته  
ذوق مني، بس الكلام أخذنا زي ما انت  
شايف



عادل: انا شخصيا استفدت جدا من كلام حضرتك.. وهو ده الموضوع اللي كنت عايز اكله حضرتك فيه ياعمي

هاشم: خير يا عادل، عايز تأجل الفرح ولا ايه

عادل: أكيد لأ يا حج.. ده لولا امتحانات ليلي ان كنت طلبت من حضرتك الفرح يكون النهاردة قبل بكرة

هاشم: امال ايه هو الموضوع يا عادل

-كنت عايز استأذن من حضرتك، أقابل حسام وبسمته واحاول أتفاهم معاهم،  
يمكن أكون سبب في إنقاذهم من الضياع



هاشم: اللي زي دول ضاعوا خلاص يابني..  
احنا المفروض دلوقتي نحاول علي الأقل  
نلحق اللي زي عاطف عشان ما يبقوش زيهم

عادل: حضرتك تقصد ايه يا حج

هاشم: أقصد اني هاخدك انت وعمر  
ونروح نزور عاطف في المستشفى.. و تنسي  
موضوع حسام وبسمته نهائيا دلوقتي، انا  
خليتهم تحت المراقبة، ولو حسيت انهم  
ندموا علي تصرفاتهم، أو لقيت عندهم  
رغبة ولو بسيطة في انهم يرجعوا عن  
طريقهم أكيد هخليك تقابلهم

عادل: حاضر ياعمي اللي تشوفه

هاشم: كلك ذوق يابني.. يلا بقي بسم  
الله... هي ليالي مش هتتغدي معانا ولا ايه



کریمه: بتقول انها تعبانه ومش هتقدر  
تاكل دلوقتي

عمر: بعد اذنكم انا هقوم دلوقتي، وابقى  
اكل مع اختى بعدين

هاشم: انت كمان تعبانه يا عمر، ولا  
مالكش نفس تاكل

عمر: اسف يا بابا انا ماقدرش اكل لوحدي  
من غير ليلي.. هبقى اتغدي معاها بعد  
شويه

هاشم: طيب ياسيدي، يابختكم ببعض،  
بس اعمل حسابك ان فرحها خلاص قرب  
اهو بعد الامتحانات

عمر: حاضر يا بابا ان شاء الله

-----



## #في شقة المعادي

(حسام ممدد علي كنبته الأنتريه، بسمته  
أفضل قدميه علي الأرض، فيشير اليها  
بكأس الخمر ويقول):

عارفه ايه هي أحسن حاجه في الدنيا ؟

بسمته: ايه يا حسام

حسام: إزازتين الخمر اللي انا كنت سايبهم  
هنا المرة اللي فاتت قبل ما اروح القسم

بسمته: انت رايق أوي وبتروش يا حسام بيه

حسام: كلمته حسام بيه ما تتكررش  
تاني علي لسانك

بسمته: ليه يعني بتدايقك..؟ ولا  
بتفكرك باللي حصل في القسم



حسام: انتي فاكرة ان انا ممكن اسيب  
حقى، ده بعدهم، من أول ما خرجت من  
القسم وانا بفكرلهم في كام مصيبة  
تفرق بينهم

-وفكرت في ايه يافالح

-أول مصيبة فكرت فيها اني ابعت لعادل  
صور فاضحة عليها وش ليلي

بسمت: دي فكرة قديمة

-طب اخلي حد من صبياني يرش مية نار  
علي وشها

-لأ يابني انا عايزة حاجه أفضع من كده  
بكتيررر

-طب ايه رأيك اخبط عادل بالعريية  
ونرتاح منه



-مش هبقي مبسوطت برضه

-طب ابعت حد يتصاحب علي عادل،  
ويعزمه في كافيه، وبعدين يحطله السم  
في العصير ؟

-لأ انا عايزة مصيبتة تضيع مستقبل وحياة  
اللاتنين وهم عايشين في نفس الوقت عشان  
يندموا مليون مرة علي اللي عملوه فينا  
-طب ايه رأيك أخطف ليلي واغتصبها  
بسمت؛ انت اتجننت، ناسي باباها ممكن  
يعمل فينا ايه، دي أقل حاجه هيعدمنا  
احنا الاتنين

-امال انتي عايزه ايه حيرتيني معاكي





-انا هفكر لهم في مصيبة تدمر حياتهم  
وتضيع مستقبلهم.. ومستقبل أهاليهم  
كمان

-مش هتلاحقني عملي كده قبل ما يجوزوا

-ومين قالك اني عايزة اعمل فيهم حاجة  
قبل الجواز... تخيل انهم اختاضوا علي اي  
سبب دلوقتوا وفسخوا الخطوبة هيخسروا  
ايه...؟ ولا حاجة... هيفضلوا زعلانين  
كام يوم... ويسمعوا الأغاني الحزينة  
بتاعة مصطفى كامل ومحمد محيي،  
ويقرفوناب بوسسات علي الفيس،  
وايموشنات الدموع والقلب المكسور...  
وبعدين ايه اللي يحصل يافالح

-قولي انتي يانا صحة



-ولا هيحصل اي حاجته.. كل واحد منهم  
بعدها بكام يوم هيقابل حد جديد  
ينسيه الحب اللي كان... ويبقي ساعتها  
احنا استفدنا ايه..؟

-صحيح يبقي ما استفدناش اي حاجه..  
امال هنعمل ايه دلوقتي يا حفيدة  
موسولينى

-احنا هنسيبهم يتسلوا، ويفرحوا كام  
يوم بالزواج، لحد المراقبة ما تنتهي،  
ومفيش مانع اننا نتصاحب عليهم، وكمان  
نحضر فرحهم، ساعتها بقي هبدأ في تنفيذ  
الخطه بتاعتي.. الدمار الشامل هيكون  
بعد الزواج... و هيبقي له تأثير فظيع لحد  
اخر يوم في حياتهم، تخيل بقي لما تلاقي



ليالي مطلقة أو أرملته... وعادل اتجنن علي  
فراق ليالي

-يابنت المجنونة... انتي اتعلمتي الإجرام  
ده فين وامتي، و الأفكار دي كلها جبتها  
منين... ده الشيطان تلميذك وبيتعلم  
منك.. ده كيوت أوي بالنسبالك

-اصبر عليا هو انت لسه شوفت  
حاجه....علي فكرة انا سامعة صوت حد  
بيخبط علي الباب وبيرن الجرس

-تبقي مصيبة لو كان بابا عرف مكانا  
-لأ ما اعتقدش.. مستحيل مامتك تقوله  
انك متأجر الشقة دي من وراه... يمكن  
البواب عايز الايجار او جايبالك وصل  
النور.. انا هستخبي جوه لحد ما تشوف مين



-طيب يلا بسررررعه

حسام فتح الباب وبصوت عالي: انت مين  
وعايز ايه؟

-انا ابن البواب الجديد في الفيلا بتاعة  
باباك، مامتك بتسلم عليك وبتقول خد  
المبلغ ده.. وهتبعتهولك أول كل شهر، ولو  
محتاج اكثر ابقى كلمها في التليفون،  
وبتقولك كمان هي محتاجة تسمع  
صوتك ابقى كلمها ضروري

-طيب متشكر .. خد انت دول ..  
والموضوع ده يبقى سر بيني انا وانت وماما،  
ولو حد عرف خبر انت عارف هيحصلك  
ايه

-حاضر يا حسام بيه... سلام عليكم



-وعليكم

#في بيت العروسة

دق جرس الهاتف

عادل: الو السلام عليكم ازيك يا بابا

بابا عادل: انت فين يا بني.. العشا أذن وانت  
من الصبح بره ولا نعرف عنك اي حاجه،  
ينفع كده..

-انا اسف يا بابا.. الحجة كريمه عزمتمني  
علي الغدا النهاردة.. وبعدين الوقت سرقنا،  
وانا قاعد دلوقتي مع أونكل هاشم وطنط  
كريمه وليالي وعمر .. كلهم بيسلموا  
عليك



-طيب كنت علي الأقل اتصل بينا ، احنا  
من بدري قاعدين مشغولين عليك

-انا اسف يابابا.. معلىش دي اول مرة أتأخر  
فيها من اول ما رجعت من السفر، ونسيت اني  
لازم أكون في البيت من بعد المغرب زي  
زمان

-حصل خير ياسيدي،.. كفايت كدة،  
تعالا مامتك مستنياك ومش راضية  
تتعشي غير لما تيجي

عادل: .. حاضر انا جاي حالا

-طيب يابني.. احنا في انتظارك.. ا بقي  
سلامي علي كل اللي عندك  
-سلام عليك

-وعليكم السلام ورحمة الله وبركاته



عادل: انا اسف يا جماعة مضطر امشي  
دلوقتي، والدتي مش هيجيها نوم غير لما  
تظمن عليا

هاشم: خد راحتك يا بني، بس ابقى قول  
لباباك ان بيت عمو هاشم كلهم بيسهروا  
لحد 12 بالليل وياريت تشرفونا بالزيارة في  
أقرب فرصة

حاضر يا عمي

-سلام عليكم

كلهم ماعدا ليالي: وعليكم السلام  
ورحمة الله وبركاته

(خرج عادل من البيت فحملت ليالي الهدايا  
وأسرعت في سعادة بالغت الي غرفتها،  
فاحتضنت الفستان والحقيبة ولكنها





فوجئت بشيء غريب.. فدار بينها وبين  
نفسها الحوار التالي (:

هي الشنطرة دي مالها تقيلتة كدة ليه... ؟

يمكن فيها علبتة ميكب وعادل اتكسف  
يقول عليها قدام مامتي.. ؟

أو يمكن دي كلها شوكلاتة وعادل  
عاملها لي مفاجأة..؟

أو يمكن عرف اني بموت في الحلاوة  
المشبك وجايبلي كام قرص هديتة ..

أو يمكن دي لعبتة جايبها لأخته ونسي  
ياخدها من الشنطرة ...

أو يمكن دي بطيخته..؟



لأ مش بطيخة ياهبلت...! يمكن أناناس  
؟..

لأ يامجنونت دي شنطت جوه شنطت.. أكيد  
الشنطت الحقيقية اللي هو جايبها لي  
مخبيا وعمايز يفاجاني بيها.. ما هو أكيد  
مفيش حد في الدنيا يجيب لخطيبته  
شنطت صفرا زي دي.. ؟!

طب ما تفتحها يابت وتشوفي جواها ايه...  
انتي بتحيري نفسك ليه صحيح.. ؟

لأ مستحيل اشوف جواها ايه يمكن يكون  
ده مقلب عامله فيا عادل تطلع قنبلة  
تبهدل وشي



طب ما تكلميه يابت وتسألينه ولا هتفضلي  
سهرانت طول الليل كده بتاكلي في  
نفسك، ومش علي بعضك

لا ما ينفعش اكلمه تلاقيه وصل البيت

عايزاهم يقولوا عليك ايه يابت ياليلي،  
البت خلاص خدت الواد من باباه ومامته،  
ولا يقولوا مش قادره تصبر علي غيابيه  
دقيقة وحدة ..

روحي نامي يالولا بلاش دلع.. وجهدي  
قلبك واستنيه هو يرن عليك ..

تصبحي علي خير

وانا من اهله

-----

#في بيت العريس



عادل: السلام عليكم

الحجة منيرة : حمد لله بالسلامة ياسي  
عادل ، انت لحقت تنسانا اوي كده

تبسم عادل وقال: طب ردي السلام الأول  
ياماما وبعدين تتفاهم

-مفيش تفاهم.. كنت علي الأقل افتكّر  
باباك ومامتك اللي مش غولين عليك  
طول اليوم.. ولا انت خلاص قعدت جمب  
السنيرة ونسيت أهلك

توفيق: اهدي شوية يامنيرة وخفي عن  
ابنك شوية خليه يعيش حياته

عادل: انا مستحيل اي وحده تخليني أنسي  
أهلي ياماما حتي لو كانت ليالي نفسها...  
انا اسف ياست الكل غلطة ومش هتتكرر



تاني... قوليلي بقي هنتعشي ايه من ايدك  
الحلوه النهاردة

-عايز تقول انك ما اتعشيتش هناك

-هم جهزوا العشا بس انا حلقت ما اكل  
غير معاكى... يلا بقي عشان انا جعان اوى

-طيب يا عادل 3 دقائق هروح أسخن الأكل

اتفضلي يا است الكل

#في\_غرفة\_ليلى

راحت ليلى تجوب الغرفة ذهابا وايابا وهي  
في حيرة من امرها ثم قالت: يووو مش  
جايلي نوم.. اعمل ايه انا دلوقتي.. مضيش  
غير حل واحد.. أقري شوية في أي رواية..



لأ أنا عارفت سبب قلت النوم... انا هفتح  
الشنطة واللي يحصل يحصل..

(فكرت ليلي في حيلة مأكرة لفتح  
الشنطة... فوضعتها علي السرير ثم  
أحضرت خيطا رفيعا طوله مترين وربطته  
في رأس السوستة ثم ابتعدت مسافة آمنة  
وسحبت الخيط فجأة.. فتمت عملية فتح  
الشنطة بنجاح.. فاقتربت ليلي منها شيئا  
فشيئا وراحت تحملق بعينيها داخل الشنطة  
فوجدت بعض اللفائف الورقية التي عادة  
ما يضعها الباعة داخل الحقيبة لخداع  
الزوار بجمالها وروعها.. ودائما لا يكتشف  
المشتري هذه الخدعة إلا بعد فوات الأوان،  
عند عودته الي المنزل.



مدت ليالي يدها داخل الشنطة لتفريغها من تلك القطع الورقية، واحد، اثنان، ثلاثة، لا توجد قطعة رابعة، هذا كل ما بها من اللزائف الورقية.. ولكنها ما زالت ثقيلة.

فاقتربت أكثر، ثم مالت برأسها الي داخل الشنطة، ودققت النظر مرة أخرى، فوجدت قطعة قماش سوداء في أسفل الحقيبة، ترددت ليالي هذه المرة في التقاطها، فتوقفت عدة لحظات، استعادت فيها توازنها، وهدأت أنفاسها، واستجمعت كل قواها، ثم أخيرا أغمضت عينيها ومدت يدها اليمنى كالمتردة داخل الحقيبة لالتقاط قطعة القماش، فأحست كأن يدها وقعت في فم كائن حي... لم يمهلهما





لتعرف ماهو حتي نهشها بأنيابه وخرز  
أسنانه في أصابعها، فصرخت ليلى مذعورة،  
ونفضت يدها من الفزع... ثم بدأ جسدها  
ينتفض عندما شاهدت بعض الدماء تسقط  
من أصابعها

فانطلقت هربا ناحية الباب، فإذا بوالدتها  
تهرول باتجاه الغرفة عقب سماعها  
استغاثات الطفلة المدللة، فاندست ليلى  
في حضن الأم وقالت :

-الحقيني ياماما في عقربة جوه الشنطرة..  
وعضتني في ايدي كمان.. خلاص كده  
جسمي اتسمم انا هموت ياماما



احتضنتها والدتها وقال: اهدي يا حبيبتي،  
بعد الشر عنك ما تقوليش كده...  
الحقني يا هاشم بنتك بتموت...؟!

هاشم (يجري مسرعا): في ايه يا كريمه  
مالك ياليلي... بتعيطي ليه

-مش عارفة يا بابا حسيت بحاجه ثقيله  
في الشنطة اللي جابهالي عادل فقولت  
افتحها اشوف فيها ايه لقيت حاجه زي  
العقربيه لسعتني في ايدي.. انا خلاص  
هموت يا بابا

-ما تخافيش يابنتي دي أكيد مش لسعت  
عقربيه.. انا هتأكد الأول واشوف ايه اللي  
جوه الشنطة



(أمسك هاشم الشنطرة وقال: هي مالها  
تقيلت كده ليه... ثم رفعها بكلتا  
يديه... ونفضها ناحيت الأرض بقوة،  
فخرجت منها..

قطرة سوداء صغيرة الحجم هربت إلي ركن  
الغرفة الأيمن، ووقفت خائفة كأنها  
متأهبة لأي هجوم من العائلة.. فقال  
هاشم..

-الله يسامحك يابنتي خضيتيني.. خائفة  
من قطرة ياليلي... ده انتي حتي بتعشقي



القطط.. وعندك ثلاثت في البيت..

حظك حلو يالولا اهو بقي عندك اربعة

كریمت: الحمد لله يابنتي.. ما تخافيش

مفیش سم في جسمك ولا حاجة.. عضت

القطرة بسيطة.. انا هجيبك مطهر ولا صق

طبي، وهتبقى كويست.

هاشم: انا هكلم عادل واشوف ايه

حكاية القطرة دي

ليلي: لا خلاص يابابا ما تكلمهوش انا

بقيت كويست، هبقي اكلمت انا وقت تاني

هاشم: طيب يابنتي انا قاعد في اوضتي لو

احتاجتي حاجة ابقى اندهيلي

ليلي: حاضر يابابا تصبح علي خير



كريمته: العضة كانت بسيطة الحمد  
لله... انا لفيت ايدك بالشاش اهو.. وابقى  
خدي اجازة من الجامعة بكرة

-الحمد لله ياماما.. بس انا لازم اروح  
الجامعة بكرة ده اخر اسبوع في  
المحاضرات... والدكاترة بيقولولنا علي  
اهم الأسئلة اللي ممكن تيجي في  
الامتحان

-اسألت ايه وامتحانات ايه.. انتي هتعرفي  
تكتبي حاجه بإيدك كده

-معلش ياماما هبقي أعلم علي الحاجات  
المهمة بإيدي التانيته.. بس لازم اكون  
موجودة في الأسبوع ده بالذات



كريمت: طيب يابنتي اتغطي ونامي  
دلوقتي، وبكره الصبح ان شاء الله نشوف  
نعمل ايه.. ولو حسيت انك تعبانة مش  
هخليكي تروحي الجامعة

-حاضر ياماما

-يلا بقي نامي في سريرك وانا  
هغطيكي، ولا ايه رأيك انام جمبك  
النهاردة

-تساميلي ياست الكل، ما تشغليش بالك  
انا خلاص بقيت كويست الحمد لله.. بس  
هاتي حاجه للقطرة عشان تاكلها

-حاضر يا حبيبتي

(جرس التليفون)

-السلام عليكم انا عادل ياليلي



-وعليكم السلام ازيك يا عادل برضه ده

مقلب تعملة فيا

عادل: أكيد تقصدي القطرة اللي في  
الشنطة انا اسف ياليلي لسه فاكرها  
دلوقتي هي ماتت طبعا من الخنقة

-ده انا اللي كنت هموت بسببك دلوقتي،  
حرام عليك اللي انت بتعمله فيا ده، ازاي  
تنسي تقول حاجه زي دي..؟ انت جايبها  
لمين يا عادل..؟

عادل: جايبها ليكي انتي ياليلي

ليلي: في واحد يجيب لخطيبته قطرة سودا،  
وكمان جوه الشنطة بالشكل ده... حرام  
عليك انت مجنون ازاي تعمل كده...؟





عادل: انا اسف للمرة الثانية ياليلي، بس  
دي كانت فكرة كمال صاحبي الله  
يسامحه، لما رحنا نشترى الشنطرة، شاف  
القطرة دي هناك، فاستأذن من صاحب  
المحل اننا ناخذها... وقال ان البنات كلها  
بتحب القطط، وبتحب المفاجآت اللي زي  
دي، وقال لي لو عملت كدة كل مره الحب  
هيزيد أكثر بينكم.

ليلي: اسمعني كويس يا عادل.. الظاهر ان  
صاحبك ده أهبل، يااما متجوز وحده  
هبلت، يااما عايز يخرب بيتك... وفي  
كل الأحوال دي اخر مره اسمحك ان أي  
حد ثاني يتدخل في حياتنا الشخصية.

انا ما اقدرش اقولك ابعد عن صاحبك،  
لكن ابعده انت عن حياتنا الشخصية،



وخلي علاقتكم في الحدود المعروفة  
للصداقة مش أكثر من كدة.

عادل: طيب ياليلي، عموما حصل خير،  
وأوعدك انها مش هتكرر ثاني، المهم  
انتي كويستة دلوقتي

-الحمد لله بقيت كويستة، والقطعة جمبي  
اهي، ماما جابتها أكل وخرجت وانا هنام  
دلوقتي

-هتنامي وتسبيني صاحي لوحدي ؟  
-أيوة ده أقل عقاب ليك علي اللي انت  
عملته فيا

-طيب براحتك ياليلي، تصبحي علي خير  
-انا اسفرت يا عادل، معلىش محتاجة انام  
واريح أعصابي بجد، انا أول مرة في حياتي



يحصل معايا كدة.. عمري ما اتخضيت أوي  
بالشكل ده يا عادل

عادل: انا اسف للمرة الثالثة، عموما ريحي  
أعصابك دلوقتي ونتكلم الصبح ان شاء  
الله عشان اظمن عليك

-ان شاء الله تصبح علي خير

-وانتي من أهل الخير والسعادة ياليلي

كريمة: يلا بقي ياليلي عشان تنامي، انا  
جبت أكل للقطعة، وجبتها ميتة كمان  
اهو... امال صحيح فين باقي القطط  
بتوعك يالولا..؟

مش عارفة ياماما يمكن في أوضة عمر

-طيب يا حبيبتي، هطفيلك النور،

تصبحي علي خير



-وانتي من أهل الخير ياماما، بس خلي النور  
مفتوح لحد ما انام، وابقي تعالى اطفئه  
شوية كدة، انا عارفاكي ياماما مش  
هيجياك نوم غير لو اطمنتي عليا  
كويس وشوفتيني نايمت.

-ده حقيقي يابنتي، انا عمري ما اكون  
مبسوطت ولا هعرف انام غير لو حسيت ان  
بالك مرتاح يا حبيبتي  
-ربنا يخليكي ليا ياست الكل... تصبحي  
علي خير

-وانتي من أهل الخير يابنتي

-----

ما إن خرجت الأم، وأغلقت باب الغرفة،  
حتي قفزت القطرة في فراش ليلى، وجلست



أفضل الغطاء بجوارها علي السرير، بعد  
ثوان معدودة، سمعت ليالي صوتا يقول:  
اطفي النور يا استاذة ليالي انا مش بحب انا  
غير في الضلمة

لم تصدق ليالي ما سمعت فعاد الصوت مرة  
أخري ولكن قال في هذه المرة : انا بردانة  
حرام عليك غطيني.. هاتيلنا بطانية  
تانية مع دي،،،..

حلوه البطانية البني اللي فوق الدولاب،  
هتجيبها ولا اجيبها انا.

(تصورت ليالي أن عمر يمزح معها فقالت،  
بردان ازاي يابني واحنا في الصيف



دلوقتي، طب مش هجيب حاجة تعالي  
هاتها انت بقي)

فوثبت القطرة من جوارها فجأة، وتوجهت  
ناحية الدولاب وبدأت تعلق شيئاً فشيئاً  
حتي أصبحت مثل الزرافة، وتضخمت الي أن  
بلغ ظهرها سقف الغرفة.. وتناولت  
البطانية بأنيابها ثم ألقت بها علي وجهه  
ليلي وقالت في غضب:

لما #مستورة تقولك علي حاجه اعملها  
يبقي تعملها فوراً... قولتلك اظفي النور  
ما سمعتيش الكلام... قولتلك قومي  
هاتي البطانية عشان بردانة برضه ما  
سمعتيش الكلام، يعني لازم انا اعمل  
كل حاجه بنفسي... من أولها كده غاوية



تتعبيني معاكي.. بشتغل خدامة عندك  
انا... ده احنا لسه بنقول يا هادي...

انتني ما بترديش عليا ليه... اتخرستي  
حضرتك، ولا شوفتي عذريت ...

يامصيبتي السودا البنت اغمي عليها بجد  
اعمل ايه انا دلوقتي.. فين المراية اللي هنا  
اشوف نفسي

يا وقعت سودا، ده انا منظري وحش اوي.. هو  
انا كدة قطرة، ولا كلب كبير.. ولا  
الفيل ابو زلومة... الحقوني ياناس انا مش  
عارفني.. يخرب عقلك يابت يامستورة  
مالقيتيش غير الصورة دي اللي انتني  
تتشكلي فيها ... صحيح البنت معاها حق  
يغمي عليها.. يامصيبتي تكونش ماتت...





طب اعمل ايه انا دلوقتي...؟ اطلعها في  
صورة صاحبها سمر، ولا مامتها كريمته،  
ولا عمر أخوها، بس خلاص اسكتي انا  
لقيت الحل المناسب...

احم احم.. أستاذة ليالي.. قومي ياليلي..  
قومي ماتودينيش في داهية ..

مفيش غير حل واحد... أرش عليها الميته  
المتلجة اللي جابتها لي مامتها المجنونة..  
حسوا بالقطط حرام عليكم بتشربوها  
ميته متلجة ولا نشون فاسد وأكل بايت...  
ماتجيبولهم أكل مستورد زي بتاع  
الكلاب.. ولا لازم كده كل يوم توجعوا  
بطني...



ليلي ... يا الليلي .. فوقني بقي .... ( وقامت

برش المياه الباردة ) ليلي فاقت أخيرا

ليلي: انا فين وحضرتك مين....؟!

مستورة ( في هيئة دكتور ) : انا الدكتور

#أدهم الديب باباكي اتصل بيا وقال

انك تعبانة شوية

ليلي: يعني انا في البيت دلوقتي

مستورة بصوت خشن: ايوة يا استاذة ليلي

انتي في بيتك وعلي سريرك ما تخافيش

كلنا جمبك

-امال فين بابا وماما يادكتور

الدكتور: بابا نزل يجيب العلاج.. وماما

بتعمالك حاجة تشربها



ليالي: هو انا حصل معايا ايه يادكتور، انا  
مش فاكراه اي حاجه..

-حصل خير تليفزيون حضرتك كان  
شغال وموجود عليه فيلم رعب تقريبا

ليالي: بس انا مش بسمع افلام رعب  
يادكتور، وحذفت كل قنوات الرعب من  
عندي

الدكتور: يمكن مشهد صغير من  
افلامكم الهايفت

ليالي: يعني ايه افلامنا ...؟ انت منين  
يادكتور

الدكتور: انا من مصر، ولسه شارب من نيلها  
والله، وكم ان طافح الانشون بتاعك  
امك من شويته، الله يسامحها



ليلي: لانشون ايه حضرتك..؟

الدكتور: ما تاخديش في بالك.. اصل انا  
كنت جعان من شويته، ومامتك عملتي  
ساندويتش لانشون قبل ما تفوقي.

ليلي: طيب اندهلي ماما ارجوك يادكتور

الدكتور: حاضر يا انسة ليلي، بس عايز  
اقولك علي سر مهم بيني وبينك

ليلي: اتفضل اتكلم يادكتور، انت كده  
خضيتني اكثر، قول بسرعة لو سمحت

الدكتور: خير ان شاء الله، اسمعيني  
كويس وركزي معايا.. شايفته الخنجر ده..  
انا هموتك بيه لو صرختي ولا عملتي اي  
حركة ندالته.. انا مش دكتور.. انا  
عفرية يعني جنية واسمي مستورة..



وجايته هنا عشان مصاحتك.. لو  
اعتبرتيني صاحبتك، وسمعتي كلامي  
مش هضرک وهتبقى حياتك كويست..  
واحلامك كلها تتحقق في غمضة عين...  
انا ما صدقت اني طلعت من القطرة... وعشان  
اطلع منها كان لازم أعرض إيد بنت  
عازبه... ودلوقتي انا عايزة أردلك الجميل  
بتاعك ده علي قد ما اقدر

ليلي؛ عاجزة تماما عن الحركة.. تسارعت  
دقات قلبها.. وجسدها ينتفض كالطير  
المذبوح.. فقالت بصوت مختنق..

انا مش عايزه منك أي حاجة.. انا خايفه  
اوي ابعدني عني وسيبيني في حالي حرام  
عليكي.. لا تنفعيني ولا انفعك.. وانا  
مش هقول لحد علي اللي حصل



مستورة: غصب عنك مش هتقدري تقولي  
لحد السر اللي بينا... ولو رفضتي وجودي  
انا هقتلك بالخنجر ده.. و هيبقي اخر يوم  
في عمرك، ومش هتلحقي تتجوزي عادل

ليالي: وهتعيشي معايا ازاي وانتي عامله  
نفسك دكتور كده... لو حد شافك  
معايا هنا تبقي مصيبتة.. انتي كده  
هتفضحيني مش تنفعيني

مستورة (تشككت في صورة فتاة عشرينية،  
متوسطة الطول، مرححة، ولبقة، وحسنة  
المظهر): ايه رأيك في شكلي كده...؟  
انا دلوقتي احلي واجمل منك بكتير  
اهو.. حتي تعالي نبص في المراية... ولا  
اقولك خليك مرتاحة انا هجيبك  
المراية لحد عندك... ايه رأيك بقي مين



فینا أجمل.. ده لو عادل شافني هيسيبك  
انتی ويجوزني بدالك ..

لیلی: انتی مین و حکایتک ایہ

مستورة: انا تعبانه وعایزه انام دلوقتي، لیا  
3 سنين ما نمتش في السریر زي البني  
ادمين...

تراجعت لیلی مذعورة ثم هتفت في  
استنكار: انتی هتنامي جمبي هنا في نفس  
الأوضة لأ طبعا مستحيل ده يحصل

وضعت مستورة يديها في وسطها وقالت: أيوة  
هنام هنا في أوضتك، وکمان في  
سریرک، وانتی اللي هتنامي علي الأرض





ياليلي، عشان انا مش بحب حد ينام  
جمبي.. وبلاش تدايقيني اكر من كده..  
وما تضيعيش وقتي، خليني أساعدك،  
واحقق اللي انا جايه عشانه

-هو ايه ده اللي انتي جايه عشانه، وبعدين  
انا ما طلبتش مساعدتك في أي حاجة،  
انت عايزة تساعدينني غصب عني

-ايوة عشان ما تغلطيش نفس غلطتي، ولو  
ما قبلتيش مساعدتي انا ممكن افضحك  
في كل مكان، دي اسهل حاجة عندي،  
انزل الشارع دلوقتي واتشك كل بصورتك  
واتحزم وارقص قدام الناس، وممكن اروح  
الجامعة واتصاحب علي طوب الأرض  
هناك، والناس تمسك سيرتك وتبقي زي  
بسمتة اللي كانت صاحبتك



-يا مصيبيتي السوداء... عايزه تفضحيني

قدام خطيبي..؟ وكم ان ابقى زي

بسمته...؟! وبعدين انتي عرفتي عادل

وبسمته ازاي وامتي

-من اول ما دخلت بيتكم وانا عرفت

عنكم كل حاجة.. العفاريات اللي هنا

استقبلوني احسن استقبال، ورحبوا بيا،

وقالولي كل حاجة، اصل انا حلوة ومرحه

وقلبي طيب، والعفاريات بيحبوني منين ما

اروح اي مكان، ويبقوا عايزين يخدموني

بعينيهن، حتي من قبل ما اطلب منهم.

-ياااا سلام.. هو احنا عندنا عفاريات

يامستورة



يااااه الشارع كله بقي مليان عفاريت،  
بس كلهم قاعدين ساكتين، وحاطين  
ايديهم علي خدهم بيتفرجوا عليكم،  
وعلي عمايلكم السودا اللي انتوا بتعملوها  
في بعض، منهم اللي قاعد في المحلات  
بيشوفوا الناس وهي بتغش في بعض، واللي  
قاعد منهم علي القهوة بيتحسر علي  
الرجاله اللي سهرانين لحد نص الليل  
وسايبين ستاتهم وأولادهم لوحدهم  
تعبانين في البيت، واللي قاعدين علي  
أبواب الشقق شايفين الناس طالعين نازلين  
ومحدث فيهم بيقول للتاني صباح الخير،  
واللي قاعدين في الشبايبك وشايفين  
الشباب وهم يبصوا علي الجيران وينتهكوا  
حرماتهم ...



لحد ما العفارىت كلها زهقت وعايزين  
يولعوا في كل البيوت، لكن كلنا  
ملتزمين بالقانون الجديد

ليلى تضحك: قانون ايه ده ؟ هو انتوا  
كمان عندكم قوانين زي اللي عندنا

-ايوة عندنا قانون ودستور، بس القوانين  
بتاعتنا بيحترمها الكبير قبل الصغير..  
مش زي عندكم

-معاكي حق فعلا، بس ايه هي القوانين  
الجديدة بتاعتكم

-بصي ياستي العفارىت الكبار في اخر  
اجتماع ليهم.. اتفقوا اننا نبقى هادين  
الأيام دي، ونظهر قدامكم في صورة  
حلوة، عشان محدش يخاف منا، وقالوا ان



قلوبكم مش هتستحمل اكثر من كدة،  
وكفايت المرار اللي انتوا طافحينه،  
والبلاوي اللي انتوا عايشين فيها.

والطريق بقي مفتوح دلوقتي لأي حد عايز  
يعمل خير في الناس، وكمان في مكافأة  
كبيرة جدا، يعني الألف عذريت الأوائل  
من حقهم يسافروا، ويختاروا أي مكان  
تاني يعيشوا فيه.

-والله يامستورة فرحتيني، أنا بجد سعيدة  
أوي بالقانون الجديد بتاعكم، وبتقدم  
بالشكر لكل العذاريات المحترمين اللي  
سايبنا في حالنا الأيام دي.

-احنا مش عايزين منك شكر ياانسة،  
احنا عايزينك تساعدينا في عمل الخير،



ولا انتي عايزانا نقعد فاضيين كده لا  
نعمل خير ولا شر ..

-أساعدك ازاي مش فاهمة!...

-بصي ياليلي واسمعيني كويس، كل  
العفاريات اختاروا طريقة سهلة لعمل الخير،  
وانا الوحيدة اللي اختارت طريقة صعبة،  
يعني في شوية عفاريات دلوقتي قاعدين  
علي القهوة عشان يزهدقوا الناس فيها...  
ويخلوهم يرجعوا لبيوتهم، وفي عفريت  
صغير واقف علي كل ميزان عشان محدش  
يغش حد، وفي عفاريات شغالة بتفضل في  
الشبابيك عشان محدش يبص لحد، وباقي  
العفاريات كلهم اتوزعوا في المصانع  
والمدارس والمستشفيات، بيحاولوا يعدلوا  
الحال المايل علي قد ما يقدرُوا.





-ماشاء الله ربنا يوفقهم... وانتى اختارتى

ايه بقى ان شاء الله

-هقولك بعد ما احكيك حكايتى..

-احكى يامستورة انا سامعاكى

-طيب قومي من علي الأرض، وهاتي الفشار  
واللب والسودانى وتعالى هنا.. أنا هحاول  
اتعود انك تنامى جمبى علي السرير، بس  
اعمالى حسابك أنا بتغطي بالبطانية  
صيف وشتا

ليلى: الفشار والسودانى اهو، يلا احكى  
بقى عشان انا زهقت من كتر الرغى  
بتاعك.

مستورة: كان ياما كان، في قديم العصر  
والزمان، من ثلاث سنين فاتوا.. مش قديم





أوي يعني، راجل طيب اسمه سعيد متجوز  
وحدة هبلة اسمها سعيدة، كل يوم كانت  
تعمل فيه مقلب جديد، مرة تحطله السكر  
في الأكل والملح في الشاي.. قديمة  
صح... ومرة تحلق شعره عشان ما يبصش  
لوحدة تانيته.. قديمة برضه.. اسمعي  
الجديد بقي.. كانت كل يوم بعد نص  
الليل تفتح الشباك وتحذف الطوب علي  
الجيران وتكسر لمبات الشوارع، وأول ما  
الناس تسأل في ايه تقولهم جوزي هو اللي  
قالي اعملي كدة ...

كانت بتحب جوزها أوي، وبتغير عليه  
غيرة شديدة، وكل ما يشتري لبس جديد  
كانت ياما تحرقه، ياما ترميه في الشارع،  
ومافضلش عنده غير قميص مهمل وبنطلون



مبهدل، وكل أسبوع تحلق شعره بالمقص،  
وطول ماهو ماشي في الطريق، الغريب  
والقريب يشاور عليه ويضحك علي شكله.

ولما كانت تحب تهزر معاه كانت تقفل  
عليه باب الحمام من بره وكمان تظفي  
النور وتسيبه وتنساه لحد ما يكسر الباب..  
وكل ده وجوزها الغلبان مستحملها ..

وطول اليوم كانت بتشغل أغنية وحدة  
بس مفيش غيرها... ( فطريقك مسدود  
مسدود يا ولدي )، مامتها هي اللي قالتها  
كدة عشان ما يحسش بالأمل انه ممكن  
يجوز تاني علي بنتها.. وبنتها الهبلت كانت  
بتعمل كل اللي تقول عليه مامتها.. وحتى  
بعد ما وفاتها سابتها وصية ازاى تحبسي  
جوزك في القفص، وتخليه يكره كل



الستات بسببك، وعمره ما يبص لوحدة  
تانية

وبسبب الحاجات دي كلها انتهت قصة  
الحب اللي بينهم، والشاب الوسيم العاقل  
بقي حاله يصعب علي الكافر، والبنت  
الهادية الطيبة كل يوم جناها يزيد  
أكثر.

وطول الأيام خناقات ومشاكل، لحد ما  
الجيران سموهم مفضوح ومفضوحتة بدل  
من سعيد وسعيدة.

وفي اخر يوم ياليلي حصلت خناقة كبيرة  
جدا في نص الليل بين مفضوح ومفضوحتة،  
عشان قالها ناوليني كوباية المية من  
جيبك وهي رفضت وقالتله تعالي هاتها



لنفسك... فقررت مفضوحة انها تسيب  
البيت، ولمت هدومها وخرجت من الباب،  
وطلعت فوق السطوح عشان تفكر ازاي  
تصالح جوزها، لكن بطريقة تخليه هو  
اللي يعتذرلها.

وبعد تفكير طويل جات علي بالها فكرة  
رهيبه.. نزلت بسرعة عشان تنفذها..  
فتحت الباب بشويش بالمفتاح اللي معاها..  
وطلعت من الشنطة العباية والحجاب اللي  
ماتت فيهم مامتها.. وبعد ما لبستهم وغطت  
وشها، راحت تصحي سعيد وهو نايم وقالتله  
بصوت مامتها المزعج:



قوم یاواد یاسعید مزعل بنتی لیه، وازای  
یجیلک نوم ومرتاک زعلانت..

سعید فی خوف؛ مین....؟! حماتی انا ما  
زعلتهاش والله، یاحماتی، یادوب بقولها  
هاتی کوبایت المیت راحت زعلت واتدایقت  
وعملت معایا خناقت

-وانت تخیلها تجیلک میت لیه، انت الی  
عایز تشرب ولا هی

سعید؛ کوبایت المیت کانت جمبها  
یاحماتی، یعنی مش هتخسر حاجت لو مدت  
ایدیها وجابتها لی

-انت کمان هترد علیا، انا ممکن  
أسخطک قرد دلوقتی.

-أنا اسف یاحماتی مش هعمل کدة تانی.



اوراح سعيد بقي يجري في الشقة كلها  
عشان يهرب منها، لحد ما وقف قريب من  
الشباك، جات هي رفعت ايديها ورايحت  
تهجم عليه، راح ماسكها بايديه ورمها من  
الشباك، فصرخت بصوتها الحقيقي،  
ووقعت قدام محل الأحذية والشنط  
الجلدية اللي كانت فيه القطرة السوداء.

نزل سعيد بسرعة لقي مراته غرقانة في  
الدم، فاتجنن وبقي يجري في كل  
الشوارع، كأن حماته هي اللي بتجري وراه،  
لحد ما خدوه في مستشفى المجانين،  
وتوتة توتة خلصت الحدوتة وانتهت  
حكاية سعيد وسعيدة حلوة ولا  
فتفتوتة..؟!

انتي نمتي ياليلي... ليلي



-أنا صاحبة بس بفكر ازاي ده حصل..  
لكن ايه دخل الحكاية دي بوجودك  
هنا دلوقتي

-ما هو اللي قاعدة جمبك دلوقتي هي  
سعيدة

ليلى انتفضت من مكانها: ازاي كده...؟  
يعني انتي دلوقتي اسمك ايه...؟ سعيدة،  
ولا مفضوحت، ولا مستورة

-كان اسمي سعيدة قبل الزواج، وبعد  
الزواج مفضوحت بسبب الخناقات، ومستورة  
الاسم الجديد اللي اختارته لنفسى، ولا  
انتى عايزة تقوليلى يا مفضوحت زي الجيران  
بتوعنا





-لا خليكى مستورة.. بس انا لسه ما

فهمتش انتي جايت ليه دلوقتي

-بصي بقي ياستي أنا اختارت حاجة شبه

مستحيله عشان أعمل خير في البشر، اني

أحاول أمنع أي مشكلة تحصل بين اتنين

متزوجين، وحظك الحلو اني بقيت من

نصيبك، وهساعدك في زواجك من

عادل، وهكون جمبك طول الوقت عشان

مفيش أي مشكلة تحصل بينكم،

وتعيشوا في تبات ونبات، وتخلفوا

عفريتتت.. قصدي صبيان وبنات

-هتساعديني ازاي بعد اللي حصل

معاكي، انتي بالشكل ده هتدمري حياتي

يامستورة!!...



-ما تخافيش انا ندمت علي اللي عملته في  
جوزي، واتأكدت اني كنت غلطانة،  
وعايزة أكفر عن ذنوبي، وأحاول امنع ان  
قصتي تتكرر مع حد ثاني، خصوصا انك  
هبلت زي سعيدة، وخطيبك عادل طيب  
أوي زي سعيد اللي كان جوزي قبل ما  
اموت ..

وانا جايت أحضر الجوازة من أولها، واقف  
جذبك واقولك تعملي ايه في كل  
تصرفاتك

ليالي: لا انتي خوفتيني منك، أنا مش  
عايزة منك أي مساعدة... انا هعرف اعيش  
بطريقتي في اي مكان



-مش بقولك هبلة زي انا، ما هو ده نفس  
اللي انا كنت بقوله قبل ما اتجوز، وبعدين  
انا هنا غصب عنك مش باختيارك، انا  
نفسي أنجح في المهمة بتاعتي، وأطلع من  
الألف الأوائل بقي وأسافر بره.. زهقت من  
الأشكال الكئيبة اللي بشوفها كل يوم.

-طيب وهتقعدني ازاي معايا كده.. وامتي  
هتكلميني وتقولين لي نصايحك الغالية  
يامستورة هانم!..

مستورة: اعتبريني مش موجودة، انا  
هستخبي جوه الشنطة الصفراء، بس وقت ما  
تحتاجيني افتحي الشنطة، وقولي كلمة  
السر ( طب اعمل ايه انا دلوقتي ).. ولو ما  
احتاجتيش مني أي حاجة انا هفضل  
نايم، بس ليا 3 طلبات دلوقتي



-انتي كمان ليكي مطالب.. اتفضلي

قولي اي هي

-اولا السر ده يفضل بيني وبينني.. عشان لو

قولتيه لحد انا هتحرق وانتي هتجنني أو

تموتي

ثانيا تاخدي الشنطة الصفرا معاكي في

أي مكان تروحيه،

ثالثا انتي من حقك تكلميني في أي وقت

يعجبك بس مفيش غير مرة وحده في

اليوم اللي مسموحك تكلميني فيها

ليالي (في سرها): ده لو كلمتك أصلا،

مصيبة تاخدك، وارتاح منك

مستورة: انتي بتقولي حاجه ياليلي

-لا مفيش، بقولك تصبحي علي خير



مستورة: وانتى من أهل الخير يا حبيبتي

حضرت والددة ليلي لإطفاء النور فوجدت  
ابنتها ملقاة علي الأرض وقد تشبثت  
بالغطاء في خوف وقلق، فصرخت الأم وهي  
تشدد الغطاء من فوقها قائلة :

ايه ده ياليلي انتى نايمت علي الأرض كده  
ليه

انتفضت ليلي من فراشها وقالت: انتى لسه  
صاحية ياماما..؟ انا افكرتك نمتي،  
الساعة 2 دلوقتي

كريمة: من امتى بيجيلي نوم وانتى تعبانة  
يابنتي، ما تغيريش الموضوع بقي وقوليلي،  
من امتى بتنامي علي الأرض، ووشك ماله



أصفر ومخطوف كده ليه، هو انتي لسه  
خايضة من القطرة ياليلي

-ليلي (مترددة وعينيها علي مستورة: لا  
مهم مفيش حاجه ياماما بس انااا خايضة  
أوي....

-خايضة من ايه يا حبيبتي، قوليلي مالک  
في ايه ياليلي.

(مستورة تشاورلها بالخنجر، يعني لو  
اتكلمتي هدبحک)

كريمه: ما تتكلمي ياليلي ساكتة ليه،  
قوليلي يابنتي خايضة من ايه

-الامتحانات خلاص قربت ياماما، انا  
خايضة ومرعوبة بجد، التيرم ده ما  
كنتش مركزة بسبب اللي حصل مع بسمه



-ما تخافيش يابنتي، انا عارفة ومتأكدة  
انك أجمل وأشطر بنت في الجامعة،  
وهتطلعي الأولي علي الدفعة كمان زي  
كل سنة ان شاء الله، بس ما قولتيليش  
برضه نايمت ليه علي الأرض دلوقتي

-مفيش حاجة ياماما، انا كنت نايمت علي  
السرير ووقعت، فكسلت اقوم تاني قولت  
اكمل نوم لحد الصبح

-طيب ياليلي هاتي إيدك وقومي نامي في  
سريرك، واوعي عملي كده تاني

-حاضر ياماما

-انا هطفيلك النور.. تصبحي علي خير

-لا ما تطفيش النور ياماما، انا مش هقدر

أنام في الضلمة





-ليه يابنتي خايضة من ايه تاني

-معلش ياماما اصل انا شوفت عضريت من

شوية

-عضريت ايه، وشوفتيه فين ياليلي

-شوفته في التلفزيون في فيلم التعويذه

بتاع يسرا وعادل امام

-خضيتيني يا بنتي هو انت انتي بتصدقني

الحاجات دي ياليلي

-ايوة بصدقها ياماما انا من فترة قرئت في

كتاب ان (في نوع معين من الجن ساكن

في البيوت، بس اغلبهم طيبين، ومش

يضرؤا حد الا في حالات نادرة جدا، زي

مثلا لما حد يصب ميه سخنه في الحمام

#كلام حقيقي)



-طيب ياليلي بلاش تسمعي الحاجات دي  
تاني لوحدةك، وهسيبك النور مفتوح،  
تصبحي علي خير

-وانتي من أهل الخير ياماما

مستورة: ينفع كده يا ليلي هو ده اللي حنا  
اتفقنا عليه.. يعني مش خايفه اني  
اضررك... عمومًا دي أول وآخر غلطة  
ليكي معايا، ولو اتكررت تاني هيكون  
ساعتها اخر يوم ليكي، وعموما حصل  
خير انا هسامحك المرة دي، عشان عاملت  
حساب للعشرة اللي بينا..

-عشرة ايه انا لسه شايفكي من ساعة،  
وبعدين ازاي ماما ما خدتش باليها منك



-تصدقني فعلا العفارييت معاهم حق لما  
قالوا انك هبلت، احنا محدش ينفع يشوفنا  
غير الشخص اللي احنا عايزينه.. فهمتي  
-طيب فهمت.. انا بصراحه لسه خايفت،  
وهنزل انا علي الأرض ثاني ..

-لا خليك في سريرك، انا اللي هقوم  
واسيبهولك، وهطلع انا فوق الدولاب، ولو  
احتاجتي ميتة او أي حاجة ابقى اندهيلي ..

-متشكرة جدا يامستورة،... تصبحي علي  
خير

مستورة: وانتى من أهل الخير

عادل: صباح الخير ياماما



صباح النور يا عادل.. انت رايح تقابل حد  
تاني من صحابك تاني ولا ايه

-لا ياامي هم اللي جاين عندنا النهاردة،  
هتكلّم معاهم بخصوص الشركتة  
الجديدة

-ما قولتيليش يا عادل شركتة ايه دي اللي  
انت عايز تعملها

-والله ياامي احنا هنحاول بإذن الله نبدأ  
بتصنيع اكسسوارات الكمبيوتر، لحد ما  
نوصل في النهاية لتصنيع جهاز كمبيوتر  
مصري 100 في المئة، وفي المستقبل  
هيبقي عندنا أقسام متنوعة، وهنحاول  
نصمم اختراعات جديدة كمان ان شاء  
الله



-ربنا یوفقک یابني وتقدر تحقق کل

اللي بتتمناه، واكثر کمان ان شاء الله

-ربنا یخلیکي لینا یاست الكل، انا

متأكد جدا ان کل نجاح حققته في

حياتي کان بفضل دعائك ورضاكي

عني.

-ربنا یحفظک من کل شر، ویجعلک في

کل خطوة نجاح یا حبيبي... انا هقوم

أجهزلك الفطار

-حاضر یا امي، بس بشرط افطر انا وانتي

النهاردة.



-انا ملیش نفس دلوقتي، بس هحاول اكل  
حاجه خفيفة عشان خاطرک، وکمان  
هصحي أميرة تظفر معانا وأمري لله.

-ياريت يامي، وحشتني جدا لماضت أميرة..  
انا هدخل اوضتي اعمل مکالمه تليفون  
لحد ما تجهزي الفطار

-طيب يا عادل بس حاول ما تتأخرش  
معاهها.. وما تخلیش ليلي تنسيک مامتک  
واختک

-ياماما.. ياست الحبايب انتي قولتک قبل  
کده محدش هيقدر ياخدني منك ولا  
يبعدني عنک ابدًا ياست الكل

-طيب لما نشوف يابني..بکرة تیجي  
العروسة،، ومامتک تبقي مفروسة ..



عادل يضحك: حلو أوي المثل ده ياماما  
بس انتي أكيد ما تعرفيش مين اللي قاله

-لا عارفة اللي قاله انت ناسي ان مامتك  
خريجة جامعة ولا ايه.. ده مثل قرينه  
للكاتب محمود زيدان في رواية زواج  
صالونات

عادل: يادي النيلة هو محمود زيدان ورانا  
ورانا.. انتي وصلتي للرواية دي ازاي ياماما

-مامت ليلي ربنا يخليها لي جابتلي نسخة  
منها.. وكل يوم أقري فيها شوية انا  
وباباك، لحد ما وصلنا دلوقتي لنص  
الرواية، وباقي كام صفحة والبطل يجوز  
البطلانة ان شاء الله.. ونشوف موضوع  
العروسة دي اللي هتخلي حماتها مفروسة





عادل يضحك: طيب ياماما بعد إذنك  
هروح اكلم العروسة... قصدي ليلي

-اتفضل يا حبيبي

عادل: السلام عليكم ازيك ياليلي، انتي  
فين دلوقتي

ليلى: انا في الجامعة يا عادل، أفضل دلوقتي  
عشان عندي محاضرة، وهكلمك وقت  
تاني ان شاء الله

-طيب ياليلي خلي بالك من نفسك..

سلام

-سلام يا عادل

-----  
(بعد انتهاء المحاضرة)



المعيد الجديد: انست ليالي.. لو سمحتي  
لحظة وحدة بعد اذنك

ليالي: نعم يادكتور، افندم اتفضل  
حضرتك تحت امرك

-مش ملاحظت يا انست انك انتي الوحيدة  
اللي ما كتبتيش المحاضرة النهاردة

-هبعي اخدها من سمر صاحبتني، مش  
قادرة اكتب، دلوقتي، وأعتقد ان الحضور  
هو الأهم في الجامعة

-وبما ان الحضور هو الأهم يا انست غبتي  
ليه عن المحاضرة اللي فانت

-كنت تعبانة، اتخنقت فجأة، وكان في  
ضيوف مهمين جدا عندنا في البيت



-والضيوف أهم مني.. قصدي أهم من

المحاضرة بتاعتي

-حضرتك تقصد ايه يادكتور، انا غبت

عن المحاضرة لظروف خاصة، وأكيد مش

انا وحدي اللي كنت غايبة

-عندك حق يا انسة ليلي، ومتشكر جدا

لحضرتك انك تكرمتي عليا بالحضور

النهادة... بس ايه الجرح اللي في ايدك

ده

-دي القطرة بتاعتي عضتني امبارح.. أنا

مضطرة استأذن دلوقتي

-طيب ممكن سؤال قبل ما تمشي

-اتفضل يافندم



-انتي مرتبطة ولا لأ، اصل انا في الحقيقة  
معجب جدا بيكي لأنك شبه خطيبتني  
اللي ماتت

ليلي اتخنقت: اظن حضرتك أخذت بالك  
من الدبلة اللي في ايدي، بالضبط زي  
ماأخذت بالك من الجرح كويس  
المعيد: انا ممكن اجيبك شبكة  
غالية، وعريية و.....

-أولا يافندم في حديث عن الرسول (صلي  
الله عليه وسلم) قال: "لا يخطب أحدكم  
على خطبة أخيه"

ثانيا بابا مش مخليني محتاجة أي حاجة



ثالثا: خطيبي هو اللي هيجيلي الشبكة  
والعريية، لأنه بني آدم ناجح ومحترم وابن  
ناس.

رابعا: حتي لو ما اقدرش يجيلي اي حاجه،  
انا راضية بنصيبي اللي قسمهولي ربنا  
خامسا.....:

المعيد: مالوش لازمة كفاية كدة..  
اتفضلي سمر صاحبتك مستنياكي  
-متشكرة .. بعد اذنك

سمر: خير ياليلي مالك مكشرة كدة  
ليه، كان عايز ايه منك المعيد الرخم ده  
-مفيش حاجة، انتي قولتي بنفسك معيد  
رخم اهو، بس انا عرفت بكل ذوق وأدب  
إني أوقفه عن حده



-عملتي ايه يامجنونتر، ده ممكن  
يسقطك في الامتحان، ايه اللي انتي  
هبتيه ده

-انا عندي أسقط واحافظ علي كرامتي،  
وثقت أهلي وخطيبي فيا، ولا أني أنجح  
واخسر نفسي واحترام الناس ليا في كل  
مكان

-ربنا يستر، أهم حاجه ما تندميش بعد  
كدة

-مش هندم ان شاء الله.. انا ما شربت  
قهوة النهاردة، وعندي صداع فظيع،  
ومضطرة أروح الكافيه رغم اني بكره  
المكان ده جدا



سمر: مفيش مشكلتا احنا ناخد القهوة  
ونشربها تحت الشجرة اللي هناك دي

-اووووووك يلا بينا قبل المحاضرة  
التانية ما تبدأ

ليلى: السلام عليكم.. لو سمحت ياكابتن  
اتنين قهوة زيادة من فضلك  
عامل البوفيه: حاضر يا فندم  
تقدمت بسمتة وقالت: اتفضل ياكابتن  
أشرف حساب القهوة دي عندي.. ازيك  
ياليلي انا جيت الجامعة النهاردة مخصوص  
عشانك، وعايضة اعتذرلك عن الموقف  
السخيف اللي حصل مني.





صرخت ليلى في وجه بسمت وقالت: أنا مش  
قابلة أسفك، ومش عايزة أشوف وشك  
هنا، ولا حتي في أي مكان ثاني، وياريت  
تنسي نهائيا انك كنتي تعرفي وحده  
اسمها ليلى

بسمت: أنا اسفه بجد، وبترجاكي  
تسامحيني، أنا ندمت علي كل اللي عملته  
فيكي او في غيرك، ونفسي أصلح غلطتي  
وابقي إنسانة كويسة ياريت تساعديني  
ياليلي.

-انتي عمرك ما تبقي انسانه كويسة  
يابسمت.. انا كرهتك وكرهت اليوم اللي  
شوفتك فيه وكرهت كل ساعة قعدت  
فيها معاكي.. وكرهت نفسي لما  
اعتبرتك أقرب صديقة ليا في الجامعة



(بسمت تبكي بشدة وتنحني لتقبيل يد ليلى) ..

أنا خلاص بعدت عن حسام، وقررت أركز في دراستي، أرجوكي سامحيني ياليلي

ردت ليلى في لهجة حادة قائلة: ببساطة كده عايزاني أسامحك، طب اسامحك علي ايله بالضبط...؟ أسامحك انك اتصاحبتني عليا عشان تخدعيني، ولا أسامحك انك كدبتني عليا لما قولتيلي حسام أخوكي، ولا اسامحك لما خليتني الجامعة كلها تتفرج عليا وانا واقضة مع خطيبي... طب تصدقي بإيله.. انا مسامحاكي علي ده كله لكن مستحيل أسامحك انك حاولتي تضيعي مستقبلي وتدمري حياتي، وكنتي عايزة تخليني



أبقي زيك، انتي خسارة تكوني موجودة  
هنا في الجامعة، انتي مكانك الطبيعي  
هو السجن.. أو قفص الكلاب في جنيته  
الحيوانات ..

وما يشرفنيش وحدة زيك تعزمني علي  
قهوة.. وفيش سلام بينا

اتفضل الحساب ياكابتن.. يلا بينا  
ياسمر.. المحاضرة قربت تبدأ

سمر: يخرب بيت جنانك ياليلي، ايه اللي  
انتي عملتيه في البنت ده.. انا بجد  
مستغربة جدا.. كنت فاكراكي  
هتضعفي وتسامحيها.

ليلي: هي ازاي أصلا جات النهاردة ياسمر..  
مش قولتيلي قبل كدة ان اتحاد الطلاب



قدم مذكرة لفصلها من الجامعة هي  
وحسام

-الإدارة اكتفت بمجرد الإنذار المرة دي..  
بس في حالة تكرار موقف مشابه  
هيفصلوهم بدون تردد

-طيب بصراحه ياسمر هي صعبت عليا  
جدا، وكان نفسي اخدها في حضني،  
واقولها انا مسامحاكي يابسمت، بس قولت  
استني شوية، وحاولت أكون قاسية معاها  
علي قد ما اقدر، عشان ما تفكرش ترجع  
في طريق الضياع من تاني.

برافو عليك ياليلي.. ربنا بيقول "ومن  
عفا وأصلح فأجره علي الله" .. يارب يجعل  
هدايتها علي إيديكي ان شاء الله.



-إن شاء الله ...

كان نفسي أكله عادل بس الوقت خلاص  
فات، والمحاضرة أكيد بدأت ..

-مش مشكلت ابقى كلميه بعد المحاضرة  
إن شاء الله.. يلا بينا

قامت والدة بوضع اصنافا متنوعة من  
الطعام علي مائدة السفرة ثم هتفت: الفطار  
بقي جاهز يا بني... واختك أميرة مضجوعة  
عايزة تاكل، يلا خلص تليفونك بسرعة  
وتعالى

حضر عادل تبدو علي وجهه علامات  
الغضب ثم قال: انا خلصت من بدري  
يا أمي.. ومستني تندهي عليا



-في ايه يا عادل مالك مكشر كده ليه

-مفيش حاجة ياامي.. يلا نطر بسم الله

أميرة: علي فكرة ياماما في الأفلام العربي  
لما البطل يكون زعلان من البطلة ما  
يبقاش له نفس ياكل.

عادل: قصدك ايه ياأميرة

-ماليش دعوة انا بقول اللي بشوفه ..

عادل: طيب وبتشوفي ايه تاني يااميرة

أميرة: بشوف ان البطلة لو بتحب البطل  
بجد ما تخليهوش يبغي مكشر كده علي  
الصبح.. ومالوش نفس ياكل

عادل: مانا باكل اهو يااميرة



-انت بتاكل من غير نفس اهو عشان ماما  
ما تزعلش منك.. كأنك قاعد معنا  
بالعافية

مامت عادل: كفاية كدة يا أميرة، عيب  
تتكلمي بالشكل ده مع أخووكي  
الكبير.

-حاضر ياماما.. انا خلاص شبع، هقوم  
أقعد قدام التليفزيون.. ياريت يجيولنا  
حاجه جديدة النهاردة

-كفاية تليفزيون بقي يا أميرة، واعلمي اي  
حاجه تانيه مضيدة

-حاضر ياماما بلاش تليفزيون انا لقيت  
فكرة حلوة اوي





-خير يابنتي فرحتيني.. ايه هي الفكرة

دي يمكن انا كمان اعملها

-انا هروح أقف قدام المراية واكلم

نفسي.. واقعد أصوت واصرخ والم الناس

كلها عليا

-يخرب بيت جنانك يابنتي، لا خليكي

قدام التليفزيون أرحم ..

-حاضر ياماما.. سلام

كريمته: بتفكر في ايه يا عادل يابني.

-خير إن شاء الله.. انا هروح انصف الشقة،

وافتح الشبابيك عشان الهوا يتجدد قبل ما

حد ييجي من صحابي.. هم جاين بعد

صلاة العصر إن شاء الله.. لسه كمال

باعتي رسالت دلوقتي



-طيب يابني وانا هقوم اجهزلكم الغدا

بسرعة

-ربنا يخليكي لينا يا ست الكل.. وتسلم

ايدك مقدما

-تسلم من كل شر يا حبيبي

مبني الجامعة

اتصال تليفوتي من حسام لبسمة

حسام: ازيك يا بسمة.. ها ايه الاخبار

طمعيني عمليتي ايه مع البنت دي

بسمة: حاولت اتمسكن قدامها عشان

تصالحني بس مفيش فايده



-طيب وبعدين.. ما انا قولتلك مش هترضي  
تصالحك انا عارف دماغها.. وبعدين اللي  
انتي عملتيه فيها ده مش شوية

-سيبك انت.. انا هبقي وراها لحد ماخليها  
زي الخاتم في صباعي.. ده انا بسمة  
يا حسام ولا انت مش عارفني

-لا عارفك.. ومتأكد انك هتقدر  
تاخدي حقك منها.. وتخليها تندم علي  
انها بتتحد اكي بالشكل ده

-أكيد يا بني امال انت فاكر ايه

-طيب يللا بقي ما تتأخرش عليا يابت.. انا  
هطلب غدا لحد ما تيجي

-طيب او ك.. انا جايت دلوقتي حالا.. يللا

باي



انتهت المحاضرة وخرج الطلاب جميعا  
فاستأذنت ليلى من صديقتها سمر وقالت:  
بعد إذنك ياسمر هكلم عادل قبل  
المحاضرة التالية ما تبدأ

تبسمت سمر وقالت: اتفضلي يا حبيبتي..  
بصراحة انا جوعت اوي هروح اجيب حاجه  
ساقعة وشوكولاتة لحد ما تخلصتي  
مكالمتك.. يلا سلام

-طيب او ك ما تتأخرين.. سلام

-السلام عليكم ازيك يا عادل.. انا عارفة  
انك زعلان مني، المفروض كنت  
كلمتك اول ما صحيت، بس النهاردة  
قومت متلخبطة ويادوب لبست هدومي



ونزلت الجامعة.. حتي لحد دلوقتي ما  
فطرتش

-ولا انا كمان فطرت بسببك.. نفسي  
اتسدت بعد ما قفلتي في وشي وما اقدرتش  
اكل اي حاجه

-انا اسفتر بس المحاضرة كانت خلاص  
هتبدأ وما كانش ينفع اتأخر عنها..  
وكمان لسه عندي محاضرة هتبدأ حالا  
دلوقتي

-قصدك ايه ياليلي يعني بتطرديني  
كده بالذوق.. طيب ولا يهمك.. سلام

استني يا عادل ما تبقاش مجنون، انا عندي  
محاضرة مهمة فعلا دلوقتي، وهروح بعدها  
علي طول واكلمك، عشان طنط منيرة



وحشتني... وكمان نفسي اكلمك أميرة  
انا لحد دلوقتي ما سمعتش صوتها.. هي  
بتتكسف مني ولا ايه

عادل: لا هي بصراحة مش بتحب... قصدي  
انها مش بتحب الكلام كتير.. ومش  
بتتعود علي حد بسرعة

-او ك مفيش مشكلت.. انا مضطرة اقفل  
دلوقتي.. خلي بالك من نفسك.. سلام

-حاضر وانت كمان ياليلي.. سلام

سمر: اتفضلي الشكوكولاتة اللي  
بتحبها يالولا ..

-ربنا يخليكي ليا يا حبيبتي، واجيبها لك  
يوم فرحك ان شاء الله

-لا انا مش هتجوز ياليلي



-أعوذ بالله ليه بتقولي كدة يابنتي

-بعدين ابقى احكيالك.. ده موضوع

يطول شرحه، والمحاضرة خلاص هتبدأ..

يللا بينا

-او ك يللا بينا

#جرس\_الباب

مامت عادل: اهلا وسهلا، مين حضرتك

-انا فرج صديق البشهندس عادل، هي دي

شقتة ولا انا غلطت في العنوان.

-لأ دي شقتة فعلا بس هو هتلاقيه في

الشقة اللي قصادك دي





فرج: متشكر لحضرتك، واسف جدا  
لازعاجك

-ولا يهكم يابني.. اتفضل هو في  
انتطارك

فرج: السلام عليكم يابشمهندس عادل..  
؟

عادل: أهلاااا ازيك يافرغ عامل ايه،  
حمد لله بالسلامة

فرج: الله يسلمك .. انا اخدت العنوان من  
كمال صاحبنا، وقولت لازم اكون اول  
واحد بييجي هنا ...

-دايما بتحب تكون الأول في كل حاجة  
يافرج



-بس انت دايمًا انت اللي سابقني يا عادل،

وبقيت الأول علي الدفعة بتاعتنا

-ياسيدي ما فرقتش كثير الأول من

التاني... امال فين كمال، واسماعيل

وياسين

-كمال ساعة وجاي هو في مشوار دلوقتي،

وقال انه هيعدي علي باقي صحابنا

وهيجيبهم معاه في سكتة ..

أما بالنسبة لي فأنا عايش لوحدي، وخلصت

شغل بدري... وماليش نفس للمذاكرة

النهاردة، فقولت اجي اقعد معاك... علي

الأقل الواحد يغير جو شوية



عادل: ده انت تنور في أي وقت يافرج، دي  
أمنية حياتي اننا نرجع زي زمان، ونفضل  
دايما قريبين من بعض

فرج: ياريت يا عادل نرجع زي زمان، بس  
ياتري الزمن هيسيبنا نرجع من تاني ولا  
مممكن يفرقنا زي المرة اللي فاتت

عادل: ان شاء الله مفيش حاجة هتقدر  
تفرقنا مرة تانية  
فرج: إن شاء الله، ربنا كريم

عادل: اسف يافرج الكلام اخدنا هروح  
اجيبلك حاجة ساقعة

فرج: لأ بلاش حاجه ساقعه انا نفسي في  
كوبايتة شاي صعيدي من إيد الحجه..



-حاضر ياسيدي.. بس اعمل حسابك بعد

كده لازم تتعود علي الشاي بتاعنا

فرج؛ والله يا عادل ماقدرش اوعدك..

كوبايت الشاي عندنا ماركة مسجلة...

الواحد منا مهما سافر واتغرب مستحيل

ينساها ..

-بس انت بالذات يافرج لازم تنساها عشان

تقدر تنسى حاجات تانية غيرها

-لو قدرت أنسى أهلي اللي ماتوا في السيول،

وبنت عمي اللي غصبوها علي الزواج من

حد غيري، والأرض اللي خدها عمي الثاني

ظلم بعد موت أبوي ممكن أنسى اي حاجة

تانية يا عادل



عادل: هي القضية بتاعة الأرض لسه ما  
جاش دورها لحد دلوقتي ولا القاضي  
حكم فيها لصالح عمك..؟

فرج: المفروض القاضي كان حكم فيها  
من 4 سنين، بس كل 6 شهور يأجل  
الحكم..

واهو القضية لحد دلوقتي رايحة جايت في  
المحاكم مش عارف هترسي عليه ايه.

-تفاءل خير يا فرج.. أكيد أرضك  
هترجعلك إن شاء الله.

-تخيل يا عادل لما عمك اللي هو سندك  
بعد أبوك يتخلي عنك وكمان  
يظلمك.. عمي الكبير سرق الأرض اللي  
ورثناها عن جدي، وعمي الثاني رفض



يجوزني بنته.. الظاهر ان انا ماليش حظ  
في أهلي وقرايبي.

-ان شاء الله ربنا يعوضك خير يافرج،  
واحنا كلنا جمبك اهو انا وكمال  
واسماعيل وياسين.. بدمتك هتلاقي فين  
صحاب وقرايب احسن منا

كمال: احنا جينا اهو مين اللي جايب في  
سيرتنا دلوقتي.

عادل: اهلا وسهلا بكم .. ده انا ياكمال  
كنت بحمد ربنا اننا تجمعنا من تاني..  
وبدعي من كل قلبي بفضل إيد واحد  
طول العمر ان شاء الله.

-يارب ان شاء الله



اسماعيل: احنا كلنا قدامك اهو يادوله  
قول بقي الموضوع اللي عايز تكلمنا فيه

عادل: استنوا شوية عليا نتغدي الأول  
وبعدين نتكلم

ياسين: غدا ايه وبتاع ايه اتكلم ياعمر  
عايزين نلحق ماتش الأهلي والزمالك..  
امال احنا جينا بدري ليه.. ما تقول حاجة  
ياكمال

عادل: وانت من امتي بتشجع كورة يا  
ياسين.. ده انت الماتش الوحيد اللي سمعته  
ما كنتش عارف فريقك مين وكنت  
بتشجع ليضربول وفاكرها الأهلي

اسماعيل: قولت حاجه انا دلوقتي.. عشان  
تعرف نفسك ياياسين انت بتشجع أي فريق





يفوز وخلص.. ومش مهم عندك اللعب  
والفن والهندسة

ياسين: اه وانت عايز تحرق دمك وخلص  
وكل ما تتهزم في ماتش تقول سنظل  
أوفياء.. ياراجل الحق نفسك قبل ما  
يجياك السكر وضغط الدم.. وانت لسه  
صغير في عز شبابك

اسماعيل: طب هتشوف النهاردة هنعمل  
فيكم ايه.. بس ياريت توقضولنا شريف  
إكرامي الجون

ياسين: اه وانتوا كمان ياريت تخلوا  
الشناوي في الملعب.. قال شناوي قال



كمال: يا جماعة اهدوا شوية الأول نسمع  
عادل ونشوف عايز يتكلم في ايه..  
وبعدين ننزل القهوة نسمع الماتش كلنا

فرج: معاك حق فعلا يا كمال

عادل: قبل أي حاجة عايزكم تتخيلوا انا  
جمعتكم النهاردة ليه... نبدأ بكمال اللي  
دايما بيقول انا اكبر واحد فيكم.. ما  
كانوش شهرين دول اللي سبقنا بيهم..  
اتفضل ياسيدي

كمال: أيوة كده.. الأدب حلو برضه..  
أحم أحم انت جمعتنا النهاردة عشان  
جايلنا كلنا عقود عمل عشان كلنا نبقى  
مع بعض في السعودية

عادل: وانت يا فرج



فرج: انت أكيد جمعتنا النهاردة عشان  
جبت لكل واحد فينا سبحة وطاقية  
بيضا، وزجاجة مسك

اسماعيل: انا متهيألي انك جمعتنا عشان  
عايزنا نروح كلنا نصيف في اسكندرية  
زي ما كنا بنعمل في الأجازة كل سنة

ياسين: اهدي ياعم اسماعيل.. مين فاضي  
للكلام ده... عادل أكيد جمعنا النهاردة  
عشان نروح نصطاد سمك علي كوبري  
قصر النيل

عادل يضحك.. والله فكرة حلوة ياياسين  
ياريت فعلا نروح في يوم نصطاد.. وناخد  
كام صورة علي كوبري قصر النيل ..



بس مش هو ده الموضوع اللي انا جمعته  
عشانه

كمال: خلاص ياسيدي غلب حمارنا..  
اتفضل الميكروفون معاك وقول الموضوع  
المهم اللي انت حيرتنا بيه

عادل: فاكيرين الجهاز اللي احنا اخترعناه  
في مشروع التخرج وأخذنا عليه الجائزة  
الأولي علي مستوي جامعات مصر.

فرج: أيوة فاكيرين ياعم بس ايه لازمة  
السيرة دي دلوقتي

اسماعيل: متهيألي كدة ان الموضوع  
بتاعك ياعادل طلع مالوش لازمة.. يلا  
بقي ياعم ياسين نلحق الأستوديو التحليلي



بتاع مدحت شلبي وأمرنا لله أكيد  
هيكون أرحم من الكلام ده

ياسين: انت جاي تفتش في القديم ليه  
يا عادل ما تسيننا عايشين يا اخي.. احنا ما  
صدقنا نسينا اللي فات.. انت عايز مننا ايه  
تاني..؟!

كمال: اهدوا شوية يا جماعة خلي الراجل  
يكمل كلامه.. اتفضل كمل يا عادل.

عادل: ما كنتش عارف انكم بقيتوا  
مستسلمين بالشكل ده... ومع ذلك انا  
عارف كويس ومقدر شعورك ومدي  
الإحباط اللي انتوا فيه دلوقتي.. لكن  
صدقوني لو بقيتوا علي حالكم ده



هتفضلاوا طول عمرکه تايهين... وللأسف  
کمان فاکرين نفسکه عايشين!..

انتوا دلوقتي بقيتوا عاملين زي القرد اللي  
في جنينة الحيوانات واللي بيرضي بأي  
حاجه الناس ترميها له.. وعمره ما فکر انه  
يطلع بره القفص.. و يروح بنفسه يهز شجرة  
التفاح عشان ياخذ اللي هو عايزه وما  
يستناش حد يتعطف عليه بتفاحه  
معضنة!..

فرج: ومين قالک اننا ما حاولناش..؟ احنا  
حاولنا كثير بس للأسف يا صديقي احنا  
فعلا بقينا قرود بس جوه قفص مقفول ب  
100 قفل وصعب أي حد مننا يخرج منه  
تاني



عادل: ولو جه حد جالكه من بره القفص  
وحاول يمدلكه ايده عشان يخرجكم..  
هتوافقوا وتمدوا ايديكم ولا هتفضلوا  
عاشين في مكانكم علي أمل ان ربنا  
يبعثلكم صاعقة تدمر القفص عشان  
تخرجوا بسهولة.

كمال: قصدك ايه يا عادل، كلنا  
بوضوح اكثر ياريت

عادل: يا كمال أنا دلوقتي بمدلكم ايدي  
عشان تخرجوا بره القفص ده ونحاول نبقي  
كلنا إيد واحدة ونعمل حاجه مفيدة  
تخلينا نحس بجودنا كأعضاء مهمين في  
المجتمع.





اسماعيل: مجتمع ايه اللي انت بتتكلم  
عليه... قصدك علي المجتمع اللي تجاهل  
تفوقنا في الدراسة وخلي ابن العميد  
الفاشل بقي معيد واحنا اترمينا في الشارع  
وبقيننا نبيع طعمية في الكتب والأبحاث  
والرسائل العلمية.

عادل: الناس مالهاش ذنب في اللي بيحصل  
ده.. وبعدين ما انت اهو بتخدم المجتمع،  
وبتأكلهم فول وطعمية كل يوم ايه  
الجديد يعني

اسماعيل: لا انا مش بخدمهم انا ببيعهم  
سلعة مقابل المكسب اللي بيخليني  
أعيش.. يعني انا بخدم نفسي قبلهم.



عادل: كلامك منطقي علي قد نظرتك  
المحدودة.. وعموما ياسيدي احنا من  
النهاردة هنمشي بنفس مبدأك.. و هنبيع  
للناس ساعة من صنع ايدينا في مقابل  
مكسب يعود علينا كلنا

ياسين: انا عندي سؤال مهم الأول يادوله  
أنت متأكد انك هتقدر تطول بأيدك  
اللي قاعدين وراقدين من زمان جوه  
القفص... ولا يدوب ايدك هتلمس ايدينا..  
وبعدين تسيبنا وتخلع بعد ما تعشمنا  
بالحلم من تاني، وترجعنا للأمل من  
جديد!...

لو ما كنتش عارف اني قد كلامي ما  
كنتش جمعتمكم النهاردة ياياسين... أنا  
قدمت استقالتي من منصبي كمدير في



الشركة السعودية.. ونويت أعيش في  
بلدي لحد آخر يوم في عمري ..

وفي النهاية كل شيء بإيد ربنا.. ولو ما  
قدرتش أحقق اللي انا عايزه تأكدوا اني  
هرمي نفسي جوه القفص معاكم.

كمال: بعد الشر عنك من رميت  
القفص.. ربنا ما يوريها لك يادوله

فرج: طيب ياسيدي احنا معاك بس قولنا  
انت عايز تعمل ايه

عادل: انا نويت اعمل مشروع لتصنيع  
اكسسوارات الكمبيوتر والاب توب  
كبد ايت.. وفي نفس الوقت هحاول  
نخترع جهاز مفيد للمجتمع وكمان مفيد



لينا.. كمصدر للدخل المادي في  
المستقبل واخذ بالك يا اسماعيل.

اسماعيل: طيب يا عادل وعملت دراسة  
جدوي للمشروع ولا هو كلام وخلاص

عادل: الظاهر انك نسيت صاحبك  
يا اسماعيل.. انا حسبتها كويس اكثر من  
100 مرة بالورقة والقلم ونسبت النجاح  
مليون في المية ان شاء الله

ياسين: علي بركة الله... يلا بقي عايزين  
نلحق مكان علي القهوة عشان نسمع  
الماتش..

عادل: احنا هنتغدي الأول.. وبعدين نروح  
نسمع الماتش مع والدي الحج توفيق.. عشان



هو كمان مستنيه من أسبوع وانا امبارح  
وعدته اني اسمع الماتش معاه...

ياسين: هو الحج اهلاوي ولا زمالك اوي  
يا عادل..؟!

عادل: للأسف ياسيدي الحج أهلاوي متعصب  
اكثر منك انت وكمال.

اسماعيل: لقد وقعنا في الفخ يبغي أنا وانت  
يا عادل محدش فينا هيقدر يتكلم ولا  
حتي يضحك طول الماتش...

عادل: لا ياعم اضحك وهزر براحتك أنا  
والدي متفاهم جدا.. بس ادعي من ربنا ان  
الزمالك يفوز وما يكسفنناش قدام الحج  
النهاردة..



اسماعيل: ان شاء الله... صحيح يا فرج انت  
أهلاوي ولا زملكاوي

فرج: أنا وحيد يا اسماعيل.. لا ليا أهل ولا  
زمالك!..

ياسين: انت تموت في النكد يا فرج..  
يا اخي كفايت بقي و اقلع النظارة السودا  
وبص للدنيا بعينيك الحلوة اللي كل  
شوية تقلب ألوان دي.. مره بني.. ومره  
خضرا.. ومره عسلية.

فرج: حاضر ياسيدي انا هطلع دلوقتي علي  
دكتور العيون وهركب لانسيز أسود عشان  
عينيا تعجب حضرتك



ياسين: برضه أسود تاني... ما تزعلش يافرج  
وما تقفلش معايا امال يافاروق.. قصدي  
يافرج ... انا بهزر معاك والله.

فرج: ولا يهكم يياسين بس انا في ظروف  
مش كويسة الايام دي.. وبعدين احنا  
كصعايدة مش بنحب اللي يضحك الناس  
علينا.. أو يستقل بينا حتي لو كان علي  
سبيل الهزار.

عادل: حصل خير يا جماعته... بعد اذنكم  
الحجة والدتي بتنده عليا.

الجميع: اتفضل يا عادل..

السلام عليكم ..





ازيك ياماما عامله ايه

ازيك ياليلي يابنتي حمد لله بالسلامة

-الله يسلمك ياست الكل... أنا اسفرت  
اتأخرت شوية.. كان عندنا محاضرات  
كثير أوي... والمواصلات زحمة النهاردة  
مش عارفت ايه السبب.

كريمة: ده أكيد عشان ماتش الأهلي  
والزمالك أنا سمعت الخبر في النشرة  
النهاردة.

ليلى: صحيح ياماما ده أنا كنت ناسيت...  
هروح بسرعه بقي أغير هدومي عشان اسمع  
الماتش مع بابا وعمر يارب الأهلي يكسب  
النهاردة.



كریمت: اوعی یابت تقولي كده قدام  
باباكي ده ممكن یعلقك علي باب  
البيت.. یالا اجري بسرعة وما تتأخريش  
عشان تتغدي مع مامتك اللي مستنياكي  
من بدري ومش راضية تاكل لحد دلوقتي..

-حاضر یاست الحبايب... 5 دقائق  
وهتلاقيني واقضت قدامك.. ان شاء الله

مستورة تفرك عينيها وتشاءب في كسل  
قائلت: حمد لله بالسلامة یالولا.. هي  
الساعة بقت كام دلوقتي

-قصدك مساء الخير.. احنا بقينا العصر  
یامستورة هانم.



مستورة: هو انا عرفت انا اصلا... انا  
صاحبة بدري قبل معادي ومخنوقة من  
الكابوس اللي شفته عليكي

ليالي: خير اللهم اجعله خير.. شوقتي ايه  
يامستورة

-شوقت كأنك واقفت في سوق كبير..  
الناس كلها هناك بتبيع ومفيش حد  
بيشتري.. وفجأة لقيتك واقفت مع وحده  
من الجن الشرير.. وعايضة توقعك في حفرة  
كلها عقارب وتعابين بس الحمد لله  
جالك حد مسك إيدك فجأة وأنقذك  
من الوقوع في الحفرة.. لكن الجنية دي



مش راضية تبعد عنك.. ودلوقتي عايزة  
تحضر حفرة أكبر ليكم انتوا الاثنين.

ليالي: هي مين الجنية دي.. ومين ده اللي  
شوفتيه معايا وأنقذني منها..؟!

-مش عارفة بس حد أطول منك مسك  
ايدك، وطلعتوا بره السوق.. وهي برضه  
كانت بتجري وراكه

ليالي: خير ان شاء الله... وانتني يا استاذة  
واقضة تتفرجي ما قدرتيش عملي حاجه.

-انا خوفت منها أوي شكها فظيع ياليلي..  
دي ممكن تحرقني.. وبعدين انا جايت هنا  
في مهمة محددة خليني أركز فيها عايزة  
انجح بقي واسافر بره زهقت من الشارع ده  
ومن كل الناس اللي فيه.



ليالي: مادام انتي زهقانة مننا.. ومفيش  
منك فايذة أصلا.. ما تسيبينا في حالنا  
وتغوري بعيد عننا.

-انا بقول زهقت من الشارع ومن الناس  
التانيين.. انما انتي حاجة تانيّة.. انا  
حبيتك ومش هقدر ابعد عنك أبدا غير  
لما اشوفك مبسوطة.. يلا بقي انا جعانة  
هتفطرينا ايه النهاردة.

ليالي: هجيبك أي حاجة تطفحها بس  
بعد ما اتغدي مع ماما.

-لا ما تتعبيش نفسك انا هنزل اتغدي  
معاكم.. سيبي الكرسي اللي جمبك  
فاضي.. وانا هخلص أكل بسرعة وارجع



أنا تاني.. ومش هعمل أي صوت قدام  
مامتك.

-صوت ايه وأكل ايه.. ابعدني عن ماما  
احسنالك.. انا ممكن اقولهم علي كل  
حاجه ان شالله حتي أموت بعدها.. بس ماما  
لا يامستورة اوعي تقربي ناحيتها بخير أو  
شر..

خليكي فوق الدولاب زي ما انتي وانا  
هجيالك الأكل لحد عندك.

-براحتك يالولا انا بس ما كنتش عايزة  
أتعبك

-لا عادي تعبك راحة يامستورة هانم

-طيب يلا بسرعة وما تنسش السلطات  
والمخلل



-حاضر ياأستاذة أي أوامر تانيّة

-لأ شكرا بس اقفلي الباب وراكبي.. عشان

نازلت أسرح شعري قدام المراية

-حاضر ياست الحسن والجمال.. سلام

-----

كريمت: رايحة بالأكل ده فين ياليلي..

انتي هتاكلي لوحداك ولا ايه؟

-لا ياماما الأكل ده عشان القطط بتوعي..

الظاهر انهم جعانين أوي

-ومن امتي القطط بتاكل مخلل.. هو انتي

اتهبلتي يابنتي ولا ايه

-عادي ياماما.. اصل انا اكتشفت امبارح

وحدة فيهم بتحب الموالح.. هي مالهاش

نفس يعني زينا ولا ايه





-لأ ليها يا حبيبتي.. روعي حظيالهـ

الأكل بسرعة وتعالى... يا حسرة عليكى  
يا كريمه البنت شكاهـ اتجنت زى أخوها  
الصغير.. الله يكون فى عونك يا عادل..

عادل: الجووووووول الأول شيكابالا

اسماعيل: أيوة بقى شدوا حيلكم يا رجاله

والد عادل: اسمعوني كويس يا شباب.. ما  
تفرحوش أوي بأول هدف تحققوه فى أي  
مباراة وتعتبروا نفسكم خلاص فزتوا..  
انتوا لسه فى الشوط الأول وما تعرفوش  
الدقائق أو السنين الجايه مخيالكم ايه..  
نصيحتي ليكم أي هدف تنجحوا فى  
تحقيقه.. اعتبروه مرحله مؤقتة ما تخلص



**ياسين: جووووول عمااااد متعب أية بقا  
يارجالة عايزين الثاني قبل الماتش ما  
يخلص**



والد عادل: جالك كلامي يا عادل ..؟

بس انت كمان يا ياسين كررت نفس  
الغلطة دلوقتي.. ما تفرحش غير لما  
الحكم يعلن انتهاء الماتش بفوزك وفوز  
فريقك

ياسين: انا اسف يا حج فعلا معاك حق

عادل: طيب يا جماعة بما إننا متعادلين  
دلوقتي.. فأنا هالحق أقولكم خبر مهم قبل  
ماحد يسجل هدف تاني وبتخاف.

كمال: اتفضل يا عادل خير عايز تقول ايه

عادل: عايز أقولكم ان فرحي بعد شهر  
وخمس أيام إن شاء الله.. وانتوا كلكم  
معزومين.. وعقبالكم جميعا يا أحلي  
صحاب في الدنيا



فرج: الف مبرووووك يا عادل من سنين ما  
سمعتش خبر حلو زي كده يخليني أفرح  
بجد

كمال: ربنا يتم بخير يادوله.. انا بعدك  
ب 3 شهر ان شاء الله

ياسين: ياسلام يا عادل أخيرا حد من  
صحابنا اتجوز!..

اسماعيل: النهاردة أسعد يوم في حياتي..  
قاعد مع صاحبي كلهم.. وواحد منهم  
هيجوز بعد شهر ان شاء الله.. وكمان بسمع  
ماتش الزمالك حبيب قلبي... صحيح  
يا عادل هي العروسة أهلاوية ولا  
زملكاوية.



عادل: العروسة باباها عضو في نادي  
الزمالك.. أكيد زملاوية طبعاً.. مضيش  
غير عمر أخوها الصغير دايماً بشوفه  
بتشيرت الأهل.

عمر: الجول الثاني حسااااا غااااا ايوة  
كده يار جالت أسحقوهم وعلموهم الفن  
والهندسة

أبو عمر: يعلموا مين ويسحقوا مين يا ابن  
الكلب.. ما هو انا لو عرفت أريك  
ما كنتش قولت الكلام ده ..

امشي دلوقتي من قدامي، روح اسمع الماتش  
في أوضتك



عمر: التليزيون بتاعي مش شغال يا بابا انا  
اسف غصب عني... نسيت نفسي من  
الفرحة بالجول العالمي بتاع عماد متعب.

أبو عمر: انت كمان بتقولها في وشي مرة  
تانيته.. هو انا مش نبهت عليك قبل كدة  
ما تسمعش معايا أي ماتش للزمالك.. انت  
يوم ما تولدت الزمالك خسر الدوري..  
ويوم السبوع خرج من كأس مصر.. روح  
اسمع الماتش في أي حته تانيته.. عايزنا  
نخسر بطولته أفريقيا هي كمان.

مامت عمر: يروح فين دلوقتي انا ابني ما  
ينزلش يقعد علي القهاوي يا ابو عمر







الحكم معلنا نهاية الشوط الثاني والمباراة  
بتعادل الفريقين بهدفين لكل منهما في  
ذهاب نهائي أبطال افريقيا ..

لتشتعل المنافسة بين القطبين الكبيرين  
ويتأجل إعلان الفائز باللقب 30 يوم..  
انتظارا لما ستسفر عنه نتيجة المواجهة  
الأخيرة بين الفريقين في مباراة الإياب  
باستاد برج العرب في الإسكندرية.

#بعد\_مرور\_شهر

#نهائي\_بطولة\_أفريقيا

عادل: انا جيت النهاردة ياعمي عشان اسمع  
معاك الماتش... وبالمرة نتكلم في



التفاصيل النهائية للفرح اللي باقي عليه  
خمس أيام إن شاء الله.

والد عمر: هي الشقة بتاعتك جاهزة  
دلوقتي ولا في حاجة ناقصاها..

-الشقة جاهزة ياعمي من سنتين.. ومش  
ناقصها غير العروسة عشان تنورها

مامت عمر: ربنا يتم بخير يا بني وتكون  
الشقه وش السعد عليكم.. ويفرحكم  
فيها طول العمر ان شاء الله

عادل: يارب إن شاء الله.. ويطولنا في  
عمر كياحجه.

والد عمر: خد يا عادل دول 500 دعوة فرح  
وزعهم بمعرفتك علي صحابك  
وقرايبك.. وأنا معايا 500 كمان هخلي



عمر يوزعهم علي الجيران والعائلة  
الكريمة.. وزمائي في الشغل انا همهم  
بنفسي.

-ازاي كده يا ح.. انا برضه طبعت  
الكروت.. وجبتك نفس العدد معايا  
كمان .

-مفيش مشكلت يا بني.. خلي الكروت  
كلها معاك انا مش محتاج أكثر من 500  
وغالباً مش هيجي غير نصهم عشان  
قرايبنا معترضين لحد دلوقتي إني زوجتها  
لحد غريب.

عادل: حاضر يا عمي... انا هستأذنك نبعت  
كارت دعوة لحسام وبسمت



-انا موافق علي الأقل نديهم فرصة أخيرة

للتسامح.. بس ياريت هم يقدرُوا ده كويس

-إن شاء الله ربنا يهديهم وينور طريقهم

هاشم: صحيح يا عادل خد دول كمان

-ايه ده يا حج انا معايا فلوس كتير الحمد

للله... ومفيش أي حاجة ناقصاني

-دي فلوسك يا بني.. انا مش بدياك

فلوس من جيبي... النهاردة وانا راجع من

الشغل عديت علي قاعة الأفراح ولما

عرفوا ان فرح بنتي اللي بعد 5 أيام

عملولنا خصم 50% ورجعولنا نص المبلغ

مرة تانية عشان أفراح العيلة كلها بنعملها

في نفس القاعة دي كل مرة.. اتفضل

يا بني خد فلوسك ..



عادل: حاضر ياعمي عموما انا هروحلهم  
تاني النهاردة.. عشان أقولهم علي شكل  
وترتيبات الفرح، ده بعد إذن حضرتك  
طبعاً.

-طيب يابني بس لازم تقولهم عايزين  
الفرح يكون هادي مفيهوش دوشة كتير  
ولا أي أغاني شعبية ..

-تمام أوي متفقين يا حـجـ.. ده بالضبط اللي  
انا كنت عايز اقول لحضرتك عليه..  
وبس كنت خايف ألاقى إعتراض منك أو  
من طنط كريمه

كريمه: يابني انا أهم حاجة عندي هي  
سعادة بنتي وفرحتها معاك.. وبعد كده  
الباقي كله ما يهمنيش في أي حاجه ..





كريمته: ليالي دخلت أوضتها من شوية  
عشان تأكل القطط.. بس مش عارفة  
اتأخرت ليه.. روح يا عمر اندهلها .

-حاضر ياماما

عمر: الحقيني ياماما.. الحق بنتك يابابا..  
.. الحق خطيبتك يا عادل الحقوني ياناس  
ليالي واقعة علي الأرض يابابا

هاشم: ليالي فوقي ياليلي.. شيلها معايا  
بسرعة يا عادل... هات ميتة ساقعة من  
التلابة يا عمر.. اجري هاتيلها نشادر  
يا كريمة

عادل: فوقي ياليلي عشان خاطري

عمر: الميتة اهي يابابا

كريمته: خد النشادر يا عادل







عادل: بعد إذنك يا حماتي هاتيها  
كوبايت ميت بسكر

ليلي: مالوش لازمته يا عادل انا بقيت  
كويست الحمد لله ..

(قفز عمر بجوار اخته لف يده اليمني علي  
عنقها.. سلامتك الف سلامة عليك  
يا احلي أخت في الدنيا

ليلي: الله يسلمك يا عمر

عمر: هو انتي زعلانه مني ولا ايه.. قوليلي  
ياواد يا عمر

ليلي تبتسم وتحضن اخوها الأصغر... ربنا  
يخليك ليا ياواد يا عمر

هاشم: وانا ماليش حضن كده زي مامتك  
واخوكي



ليلي: ربنا يخليك ليا يا أجمل أب في  
الدنيا.. ده حضنك هو الحب و الأمل  
والحنان كله

كريمته: ما تقعد يا عادل يا بني واقف ليه  
عادل: انا كويس كده الحمد لله..  
كفايتة اني اطمنت علي ليلي  
ليلي تبكي في حضن والدها فيقول:  
مالك يا بنتي بتعيطي ليه دلوقتي..  
قوليلي ايه اللي حصل معاكي

ليلي: سمر اتصلت بيا من شوية.. قالتلي  
نتيجة الامتحانات ظهرت.. وكل الدفعة  
نجحت ماعدا انا بسبب المعيد الجديد.. مع  
اني جاوبت كويس في المادة بتاعته  
وجاوبت كل الأسئلة، وبعد ماجيت البيت



راجعتها لقيت كل إجاباتي صح مفيش ولا  
غلطت واحدة

عادل: والله دي حاجة تجنن بجد.. يعني  
شخص واحد يتحكم في مصير الآف  
الطلاب... وممكن عادي كده يضيع  
مستقبل شاب كان طول عمره بيحلم  
باليوم اللي يتخرج فيه من الكلية...

هاشم: ودلوقتي كان ممكن يدمر كيان  
أسرة كاملة، ويتسبب في وفاة بنتي... هو  
اسمه ايه المعيد ده ياليلي

عادل: بعد إذنك ياعمي سيبلي انا  
الموضوع ده

كريمة: فداكي الف امتحان يابنتي..  
مالوش لازمة الزعل ده كله... أهم حاجه



انتي، خدنا ايه من التعليم دلوقتي غير  
الهم ووجع القلب.. حسبنا الله ونعم  
الوكيل

ليلى: حصل خير ياماما الحمد لله علي  
كل حال... انا بقيت كويست يابابا  
اتفضل حضرتك اسمع الماتش أكيد قرب  
يخلص دلوقتي.

هاشم: يتحرق الماتش باللي فيه.. انتي  
اتهبلتي يابنتي مش عارفة غلاوتك قد  
ايه عند باباكي

عادل: طيب انا هستأذن منك ياعمي عشان  
اروح أقابل مسئول تنظيم الحفلات في  
النادي واطلب منه يأجل الفرح اسبوع  
كمان



ليالي زعلت: انت ما صدقت اني تعبت ولا  
ايه..؟ ولا مستني فرصة عشان تهرب منا...

براحتك يا عادل اعمل اللي يعجبك

عادل: سامعة بنتك يا طنط كريمة، طب  
انا هروح النادي عشان أقدم الفرح واخليه  
يبقي بكرة ان شاء الله

كريمة: لا تأجل ولا تقدم يا بني.. خليه  
في نفس معاده ليالي بقت كويسة الحمد  
لله

عمر: الحق يا بابا الماتش خالص... الف  
مبروك الزمالك فاز علي الأهلي وخذ  
البطولة الأفريقية.

هاشم: بجد يا عمر...؟

تعالى يا عادل نشوف ايه اللي حصل



#معلق\_المباراة: والآن جاء دور البطل لتسلم  
الميداليات الذهبية.. وحمل الكأس  
الغالية.. كأس دوري أبطال افريقيا التي  
طال غيابها عن الفريق الأبيض... الزمالك  
هو بطل النسخة الحالية عن جدارة  
واستحقاق.. الف مبروك لنادي الزمالك،  
والجماهير الوفية.. وهارد لك لمشجعي  
الشياطين الحمر، هذه كرة القدم ولا بد  
من فائز وخاسر.. وكانت الخسارة من  
نصيبكم هذه المرة.. أتمني لكم  
التوفيق في الجولات القادمة.

هاشم: أخيرا حصلنا علي بطولة افريقيا  
بعد 15 سنة من اخر بطولة فزنا بها

عادل: تصدق ياعمي رغم فرحتي بفوز  
الزمالك.. لكن في نفس الوقت حزين





علي جمهور الاهلي اللي بات زعلان..  
خصوصا ان والدي أهلاوي، وكمان عمر  
وياسين.

هاشم: فعلا هي دي الاخلاق النبيلة يابني..  
انا هكلم باباك دلوقتي واخد بخاطره...  
واظمن عليه بالمره من فترة ما كلمتوش

عادل: اتفضل حضرتك ياعمي.. وانا هروح  
أقابل مسئول التنظيم عشان اقوله علي  
الفقرات اللي هتبقي في الفرع ان شاء الله  
هاشم: اتفضل يابني .. علي بركة الله

هاشم: تعالي بسرعة يا كريمه.. هاتيلي  
التليفون من جيب البدلة بتاعتي دلوقتي  
حالا

كريمة جابت التليفون: اتفضل يا ابو عمر



هاشم: السلام عليكم.. نادي الأفراح  
معايا.. ؟

الكل سنتر: أيوة يافندم نادي الأفراح مع  
حضرتك

هاشم: طب وصلني بمدير النادي فورا عشان  
برن عليه من امبارح تليفونه مقفول

الكل سنتر: حاضر يافندم

المدير: ازيك يا ابو عمر عامل ايه.

هاشم: ان بخير الحمد لله... اسمعني  
كويس وركز معايا يابسيوني

بسيوني: اتفضل يا هاشم انا سامعك

هاشم: بعد 10 دقائق هيجياكم شاب اسمه  
عادل توفيق.. ده عريس بنتي.. وفرحهم



بعد خمس ايام إن شاء الله.. لو سألك عن  
خصم ال 50% قوله ده حصل فعلا لأن  
العيلة بتعمل أفراحها كلها عندنا.. ده  
شاب في بدايته حياته.. وانا عايز  
أساعده... واتحمل نص تكاليف الفرح  
بدون ما اسبيله أي احراج.. ولو كنت لقيت  
سبب يخليني أشيل عنه كل تكاليف  
الفرح ماكنتش اتأخرت.. بس مش عارف  
كنت هقوله ايه.. انا متأكد انه مش  
هيرضي بحاجه زي دي لأنه بني آدم شهم  
ومش استغلالي.

بسيوني؛ خير ما عملت ياهاشم بيه ربنا  
يكثر من أمثالك.. اللي زي حضرتك  
عملة نادرة جدا في الزمن ده



هاشم: متشكر جدا ما تنساش تنبه علي  
مدير التنظيم ما يقولش لأي حد.. ياريت  
محدث يعرف بالموضوع ده غير احنا  
التلاتة.. حتي مراتي وولادي محدث يعرف  
منهم.. مش عايز بنتي تحس ان باباها له  
فضل علي جوزها.. لأن ممكن ساعتها يقل  
في نظرها بدون ما تشعر.. أو تتجنن في يوم  
وتعايره بالحاجه دي.. رغم اني متأكد  
بنتي مستحيل تعمل كده

بسيوني: ياسلام عليك ياهاشم.. كل يوم  
بتثبتي انك اجدع راجل شوفته في  
حياتي.. وکان نفسي اردلك حاجه  
بسيطة من جمالك عليا.. و توافق ان  
الفرح يبقي علي حساب النادي لكن انت



کسفتني وصممت رأيك انك تدفع زي اي  
حد غريب واكثر كمان.

هاشم: انت عارف يابسيوني عمري ما قبل  
أستغل منصبى او أصدقائى فى تحقيق  
مكاسب ماديت

-ياريت الناس كلها زيك كده يهاشم..  
كان حالنا بقى احسن من كدة بكتير

هاشم: الله أعلم ياسيدي.. أكيد فى ناس  
كتير احسن منى بس انت اللى مش واخد  
بالك.. ياريت تسمحلى اقابلك يوم الفرح  
ان شاء الله.. انت طبعاً مش محتاج عزومة  
يابسيوني البيت بيتك

بسيوني يضحك: يا خبر ده انا هخدم علي  
المعازيم بنفسي.. انا مستنى اليوم اللى



اقف جنبك فيه ياهاشم.. دي عشرة عمر  
ياراجل

هاشم: ربنا يديم المعروف.. اسيبك  
لشغلك انا.. سلام عليكم

بسيوني: اتفضل ياهاشم.. وعليكم السلام  
ورحمة الله وبركاته.

هاشم بصوت عالي: ياكريمة انتي فين..  
ياواد يا عمر

كريمة: انا اهو يا ابو عمر كنت بحضر  
طبق شوربة عشان ليلي.

هاشم: طيب ودي لها الشوربة واعمليلي  
فنجان قهوة من ايدك الحلوة دي لو  
سمحتي.

كريمة: حاضر يا ابو عمر من عينيا



عمر: نعم يا بابا.. انا جيت

هاشم: كنت فين يا عمر ..

عمر: كنت في البلكونة بتفرج علي  
احتفالات جمهور الزمالك بالبطولة  
الأفريقية

هاشم: عشان كده بتعيط دلوقتي.. امسح  
دموعك وما تزعليش الايام جايت كثير  
وهتفرح بفريقك.. بس الأجمل من كدة  
انك تفرح بنفسك وبنجاحك الشخصي  
في حياتك ومستقبلك

-حاضر يا بابا

هاشم: وحاول ما توقفش في البلكونة  
كثير.. يمكن في ست عايزه تفتح





الشباك يجيب شويته هوا تلاقيك في  
وشها تعمل ايه

عمر: تحمد ربنا يابابا انها شافت واحد قمر  
وعسل كده زي ابنك

-بطل لماضته وقولي. انتو ما اخذتوش درس  
في الدين اسمه ( غض البصر ) واحترام  
الجيران

-اخذنا فعلا الدرس ده يابابا... الأستاذ  
قالنا حديث عن الرسول -صلى الله عليه  
وسلم- قال :

(والله لا يؤمن، والله لا يؤمن، والله لا  
يؤمن)، قيل: من يا رسول الله؟ قال: (الذي  
لا يأمن جاره بوائقه) متفق عليه.

بس مش فاهم يابابا يعني ايه بوائقه



هاشم: يعني حرام ان الجار يكون طول الوقت خايف من جاره، خايف منه علي اهله ووالده وماله.. ويتوقع مصيبة من ناحيته في اي وقت.

عمر: يعني انا يابابا لو عيني شافت وحدة من الشباك بالصدفة ابقى كدة عملت حاجة غلط

هاشم: لو بالصدفة اقل الشباك وبص بعيد.. ولو تعمدت تعمل كده يبقي انت في الحالة دي ظلمت جارك وانت هكت حرمة

-حاضر يابابا انا عمري ما هظلم جاري ان شاء الله.. هستأذن اروح اطمئن علي ليلي وبعدين هدخل انا في اوضتي



-اتفضل يا بني تصبح علي خير.

-وحضرتك من اهل الخير يا بابا

-----

عمر: ليالي حبيبتي عاملة دلوقتي

ليالي: انا بخير الحمد لله.. بس زعلانه  
منك يا عمر

عمر: زعلانت مني بجد.. ده انا ارمي نفسي  
من فوق البيت لو يوم زعلتك

ليالي: انا ندهت عليك عشان تاكل معايا  
مالقيتكش كنت فين بقي

عمر: كنت قاعد في البلكونة بفكر  
هعمل ايه من بعدك يا ليالي.. اتكلم مع  
مين .. مين يذاكرلي دروسي.. مين  
يقرصني من وداني.. ألعب مع مين



كوتشينه وابقي فرحان لما يغلبني.. البيت  
هيبقي وحش اوي من غيرك ياليلي.

ليلي تاخد عمر في حضنها؛ شايف ياعمر  
الأكل موجود زي ماهو انا كمان مت  
قدرتش اكل من غيرك ومستنياك تيجي  
تاكل معايا

عمر؛ لا مش هقدر اكل دلوقتي انا هروح  
انام.. احنا لازم نساعد بعض ياليلي ونتعود  
علي الوضع الجديد من النهاردة.. ولازم  
اخليك تتعودي علي غيابي.. وانا كمان  
هحاول اتعود اني اعيش لوحدي.. تصبحي  
علي خير ياليلي

ليلي؛ تبكي.. ياعمر .. استني ياعمر ..



عمر يبصاها ويبكي وبعدين يقفل الباب..

سلام ياليلي

-----

مستورة: ياااااااه ده انا حملت حلم فظيع..  
مش عارفت ايه حكاية الكوابيس في  
البيت ده.

ليلي: اللهم طولك ياروح.. انتي مش جايت  
تسعديني انتي كدة جايت تنقطيني..  
وتطلعي روعي حرام عليك انا مش  
ناقصاكي

مستورة: هو انا عملتك حاجه يا استاذ  
عشان تقولي ده كله.. ما تشطري علي  
اللي كانت عايزة توقعك في الحفرة.. ولا  
انتى ما تعملش عنتر غير معايا انا



ليلي: انا خلاص اتجننت وزهقت منك..  
مابقيتش عارفة انتي جايت هنا عملي ايه..  
ده انا اغمي عليا وانتي نايمت ياهانه فوق  
الدولاب مش حاست بحاجة

مستورة: وaaaaaaaaاويبقى هو ده الكابوس  
اللي انا شوفته

ليلي: ايه اللي انتي شوفتيه المره دي  
كمان ان شاء الله

مستورة: شوفت كأن روحك طلعت من  
جسمك.. وطارت في السما وانا جريت  
وراها عشان اكلمها واخليها ترجعلك..  
بس ماقدرتش احصلها.. وبعد ما فقدت  
الأمل وفضلت اعيط.. لقيتها نزلت ورجعت  
جوه جسمك مرة تانيه ...



ليلي: انتي دايمما كده أحلامك متأخره..  
مفيش مره تحلمي بالحاجة قبل ماتحصل..  
ابقي حاولي تنامي بدري ياريت بعد كده

مستورة: حاضر انا هتعشي معاكي وانام

ليلي: خدي الأكل كله انا ماليش نفس  
اكل

مستورة: يعني هتسيبيني اكل ده كله  
لوحدني

ليلي: ايوة واللي يزيد منك ارميه للقطط

-قطط ايه ده انا باكل قد كده عشر  
مرات.. انا أصلا صحيت علي ريحة الأكل  
دلوقتي.... ياااه جميله اوي الشورية دي..  
تسلم ايد مامتك ..





ليالي: ابعدي عن ماما يامستورة..  
وماتجيبيش سيرتها علي لسانك.. ودي اخر  
مرة هقولها لك.

مستورة: ماتزعلش نفسك يالولا احنا  
الاتنين هنبعد عنها بعد 5 ايام وهنروح  
نسكن في بيت جديد.. وشارع ثاني غير  
الشارع انا زهقت منه.

ليالي: انا عمري ما هبعد عن ماما.. حتي لو  
بعدت عنها بجسمي هيفضل قلبي وروحي  
معاها

مستورة تمصمص شفايفها.. لما نشوف..  
بكرة نقعد في الشباك ونشوف اللي  
يحصل هناك



ليلي: واضح انك مش مؤدبتر.. انا مش  
هاخدك معايا هناك علي فكرة..

مستورة: عادي .. بس انتي اللي هتندمي..  
خليني قاعدة هنا مع الست الحجه مامتك

ليلي: ده ماما ممكن تحرقك أصلا.. روعي  
نامي احسنالك

-طب هتاخدينني معاك.. ولا اروح  
استناكي هناك في بيتك الجديد

-براحتك اعملي اللي يعجبك يامستورة

طيب هتعزميني علي فرحك.. ولا بسمتر  
اللي عزمتيها احسن مني

ليلي: انا ماعزمتش حد.. عمومالو  
هتحضري الفرح من غير مشاكل  
هعزمك.. غير كدة لأ ..



مستورة: أوعدك مش هعمل أي حاجة  
تزعلك يا احلي ليلي في الدنيا، ودي احلي  
زغرودة مني ليكي يالولا لooooووولو لoooo  
لooooولي

خرج عادل من منزل العقيد هاشم متوجها  
الي مقر النادي الذي سيشهد حفل الزفاف  
السعيد، دخل مباشرة الي مكتب مسئول  
التنظيم - شاب ثلاثيني يرتدي بدلة  
بيضاء مع ببيونته سوداء.

عادل: السلام عليكم.. اهلا أستاذ لؤي  
مسئول النادي: وعليكم السلام ورحمة  
الله وبركاته... أهلا وسهلا بكم  
حضرتك أكيد عادل توفيق



-ايوة أنا عادل توفيق.. جيت هنا من 15

يوم معقول انت فاكربي لحد دلوقتي.

لوئي: بصراحه لأ.. لكن هم باغوني

بحضورك في الريسبشن

عادل يبتسم: انا بشكركم جدا.. فعلا

المعاملة هنا فوق الممتاز.. والتنظيم أكثر

من رائع

لوئي: الشكر ليك يافندم.. انا فاكرك

كويس كمان لما شرفتنا بحضورك أول

مرة، وساعتها رفضت انك تحدد نظام

الحفل.. وصممت انك تأجل الموضوع لحد

ما تاخذ رأي العروسة.



-ايوة ده حصل فعلا.. وانا جاي دلوقتي  
عشان أبلغكم باللي اتفقنا عليه بعد  
مشاورة أهالينا

-اتفضل يا استاذ عادل.. ايه نظام الفرح  
اللي انتوا اتفقتوا عليه

-بصراحة احنا مش عايزين دوشة..  
عايزين فرح هادي و كلاسيك زي أفراح  
زمان.. علي الأقل الناس تعرف تتكلم  
وتسمع بعض طول ماهي قاعده.

تبسم لؤي ضاحكا وقال: جميل جدا  
فهمتكم يا استاذ عادل.. اتفضل العروض دي  
واختار منها اللي يعجبك.. ده نظام فرح  
مصري هندي يشبه فرح (بيان وشارو) اللي



كان في مسلسل أحلام مراهقتين... أو  
(بيال و أكاش) في مسلسل النظرة  
الثانية.. ولا انت عايز فرحك يبغي مصري  
علي تركي زي فرح ( نور مهند ).. ولا  
أقولك في نظام جديد محدش عمله قبل  
كده فرح مصري علي كوري .. زي حفل  
زفاف الممثلة الكورية (تشاي ريم) علي  
الضنان الصيني (جاو زي كي) لما العروسة  
عملت الحفلة علي فقرتين، في البداية  
لبست فستان أحمر، وفي الفقرة الثانية  
لبست فستان ابيض

ايه رأيك يااستاذ عادل...؟!

عادل: انا مش فاهم حاجة من اللي انت  
بتقوله ده... يعني انت عايزني اخلي مراتي  
تلبس فستان في أول الفرحة.. وبعدين تسبب



المعازيم وتروح تغير الفستان وتيجي مرة  
تانية..

يا استاذ لؤي مش لازم الفرح يكون فكرة  
مجنونة.. واللي ينفع في بلاد بره مش شرط  
نطبقه عندنا.. لازم نعمل حساب لطبيعة  
المجتمع اللي احنا عايشين فيه

لؤي: عموما احنا هنا في النادي بنحاول  
نرضي كل الأذواق يعني هتلاقي نظام  
الفرح اللي يعجبك سواء كان شعبي.. أو  
كلاسيكي.. ولو عايز فرح علي الطريقة  
الأوروبية تحت أمرك.

عادل: يا استاذ لؤي.. باختصار كده انا  
عايز فرح كلاسيكي علي الطريقة  
الإسلامية.. يعني هنبدأ بكتب الكتاب..





وبعدين تلاوة القرآن الكريم.. وأسماء الله  
الحسني.. وبعد كده فقرات فولكلور  
شعبي... وفي كمان مسرحية بدوية  
كوميديت.. وفي النهاية موسيقى هاديت  
لحد اخر الفرح.

لؤي: احنا ما عندناش حاليا فرقة للمسرح  
البدوي

عادل: انا عارف ده كويس... عشان كدة  
اتفقت مع الفرقة المسرحية وهتيجي في  
موعد الفرح ان شاء الله

لؤي: بصراحه فكرتك جميلة جدا.. وانا  
شخصيا بفكر أعرض البرنامج ده علي  
الإدارة عشان يبقي موجود عندنا باستمرار  
طول الوقت



عادل: تمام جدا اتفقنا.. صحيح يا استاذ

لؤي عندي استفسار بسيط

-اتفضل يافندم

-بالنسبة لخصم ال 50% علي فرحي.. إدارة

النادي هي اللي عملته إكراما لهاشم بيه..

ولا ده كان بناءا علي طلب منه شخصيا

لؤي: ده فعلا تقليد احنا عاملينه مع

العملاء الدائمين .. كمان في مفاجأة

جديدة من مدير النادي.. تورتة 7 أدوار

هدية للعروسين بمناسبة ان فرحك رقم

ألف من تاريخ إنشاء النادي

عادل: متشكر جدا هدية مقبولة ..

انا مضطر استأذن عشان تجهيزات الفرع..

سلام عليكم



لؤي: وعليكم السلام ورحمة الله  
وبركاته

---

### #ليلة الفرح

كريمة تمسح دموعها وتحتضن ليلى بشدة  
وتقول: ما تتصوريش يابنتي قد ايه انا  
فرحانة لأنني عشت لحد اليوم اللي  
شوفتك فيه عروسة زي القمر.. كنت  
كل ما اتعب او ادخل المستشفى أقول يارب  
طول في عمري لحد ما اشوف ليلى بنتي  
عروسة وبعدها مش عايزة حاجة تانية من  
الدنيا... والحمد لله رب استجاب دعائي..  
انا مبسوطة أوي يابنتي ومش خايضة انك  
هتبعدي عني لأنني مطمنة عليكى وانتى  
مع عادل اقدر من نفسى.. ومتأكدة انك



هتكوني سعيدة جدا في بيتك الجديد..  
ودي الحاجه الوحيدة اللي هتصبرني علي  
غيابك.

ليلي تبكي: ما تقوليش كده ياماما انا  
عمري ماقدر اغيب عنك.. وهتلاقيني هنا  
كل يوم عندك بس انتي ما تزهقيش  
مني

-معقولة ازهق منك ياليلي يااااه يابنتي  
ياريت ينفع تفضلي معانا طول العمر لكن  
دي سنت الحياة ودي إرادة ربنا ..

انا عايزة اغمض عيني وافتحها الاقيكي  
اتجوزتي وبقيتي في بيتك.. مش عارفة  
الساعات الجاية هتعددي عليا ازاي... انا



حاسته انههم بيسحبوا مني روعي في اليومين  
الجايين دول ..

ليالي تبكي: ماتقوليش كدة  
ياماما.. ماتخلينيش ابقى مشغولة عليكى..  
ربنا يطولنا في عمرك لحد ماتشوفي  
أحفاذك يارب ان شاء الله.

كرامة: لكل أجل كتاب يابنتي..  
ودلوقتي اسمعيني ..

من بكرة ان شاء الله هتعيشي مع شخص  
غريب عنك.. وناس تانية غيرنا.. ما  
تفتكريش انك مهما اتكلمتي مع عادل  
في فترة الخطوبة خلاص كده بقيتي  
فاهماه ..



تبقى غلطانة لأن بعد الزواج هتعرفي كل  
حاجه عن شخصيته.. يمكن في الخطوبة  
ماشوفتيش منه غير كل حاجه حلوة..  
لكن بعد ماتقربي منه هيبقي واضح  
اكتر بالنسبالك.. و هتلاقي عيوب تانية  
ظهرت في شخصيته.. حاولي تتقبليها علي  
قد ما تقدري.. لأنه مفيش انسان كامل  
غير أشرف الخلق سيدنا محمد (صلي الله  
عليه وسلم).

بشرط ان العيوب دي تكون في حدود  
المسموح بيه.. لكن إذا تجاوزها لمرحلة  
تانية من حقك تتصرفي ساعتها.. بدون  
تهور أو تسرع.

ليلي: حاضر ياماما



كريمته: خدي الورقة دي كتبتك فيها  
وصية مهمة جدا قالتها لنا الواعظة  
الدينية في الحرم المكي.. دي كانت  
لوحده اسمها أمامة بنت الحارث بتوصي  
بنتها ليلة زواجها من ملك (كندة) اسمه  
(الحارث بن عمرو) ركزي في كل كلمة  
مكتوبة لأنها وصية غالية جدا لأي  
عروسة في بداية زواجها.

ومش هتلاقى وصية جامعة للأخلاق  
والفضيلة اجمل من الوصية دي... خصوصا  
لأن صاحبها كانت مشهورة بين كل  
العرب بالحكمة والعقل والفصاحة..

اعتبريها دستور وقانون بينك وبين  
زوجك ياليلي.. ياريت تقريها قدامي





د لوقتي عشان ما تنسيهاش وسط زحمة  
الفرح.

-حاضر يا حجه كريمه.. اسمعي ياست

ماما

أي بُنية ..

إن الوصية لو تركت لفضل أدب تركت  
لذلك منك، ولكنها تذكرة للغافل،  
ومعونة للعاقل .

كريمة تقاطعها: يعني بتقولها انا  
متأكدة من أدبك وأخلاقك لكن  
الوصية لابد منها لأنها بتفكر اللي  
ناسي.. وبتساعد العاقل انه يستفيد منها  
دايما في المستقبل.. كملي يابنتي



-ولو أن امرأة استغنت عن الزوج لغنى أبويها  
وشدة حاجتهما إليها، كنت أغنى الناس  
عنه، ولكن النساء للرجال خلقن، ولهن  
خلق الرجال .

كريمة: يعني يابنتي حتي لو كنتي  
هتتجوزي ملك من ملوك الدنيا.. ف  
أبوكي في غني عنه وعن ملكه ..

ولو كان الزواج ممنوع للبنت اللي أهلها  
محتاجينها كنتي انتي أول وحده تفضل  
في بيت أهلها وما تتجوزش.. لكن دي سنت  
الحياة زي ما قولتلك.. ولو كل الرجال  
والنساء عاشوا بدون زواج كان انتهى  
الكون من زمان... كملي يابنتي



أي بنيّة..

إنك قد فارقت بيتك ..

الذي منه خرجت ..

ووكرك (بلدك) الذي فيه نشأت ..

إلى وكر لم تألفيه ..

وقرين (زوج) لم تعرفيه ..

فكوني له أمة ..

يكن لك عبدا ..

واحفظي له عشر خصال ..

يكن لك ذخرا ..

أما الأولى والثانية ..

فالصحبة بالقناعة (بالرزق) والمعاشرة  
بحسن السمع والطاعة..

أما الثالثة والرابعة ..

فالتعهد لموقع عينيه..

والتفقد لموضع أنفه ..

فلا تقع عيناه منك على قبيح

ولا يشمن منك إلا أطيب ريح

والكحل أحسن الحسن الموصوف

والماء أطيب الطيب المعروف

وأما الخامسة والسادسة ..

فالتفقد لوقت طعامه ..



والهدوء عند منامه ..

فإن حرارة الجوع ملهبت ..

وتنغيص النوم مكربت ..

وأما السابعة والثامنة ..

فالعناية ببيته وماله ..

والرعاية لنفسه وعياله ..

أما التاسعة والعاشر ..

فلا تعصين له أمرا

ولا تضشين له سرا ..



فإنك أن عصيت أمره أوغرت صدره  
وإن أفشيت سره لم تأمني غدره..

ثم بعد ذلك .. إياك والفرح حين  
اكتأبه

والاكتئاب حين فرحه ..

فإن الأولى من التقصير

والثانية من التكدير ..

وأشد ما تكونين له إعظاما ..

أشد ما يكون لك إكراما..

ولن تصلي إلى ذلك



حتى تؤثرى رضاه على رضاكي ..

وهواه على هواكي ..

فيما أحببت أو كرهت ..

-خلاص كدة خلصت ياماما

-خلي الورقة معاكي ياليلي.. واوعدينى

تقريها في كل أسبوع.. أو علي الأقل مرة

وحده كل شهر

-حاضر ياماما أوعدك ان شاء الله

كريمة: يلا يابنتي روعي جهزي باقي

حاجتك.. وحاولي تنامي بدري عشان

تصحي قبل معاد الكوافير بكره ان شاء

الله





ليالي: حاضر ياماما.. بس مش هيچيالي نوم  
دلوقتي.. انا هروح اجهز باقي حاجتي  
واجي اقعد معاكي شوية كمان لحد انتي  
ماتنامي

-لأ ما تجيش تاني.. انا هنام دلوقتي..  
تصبحي علي خير

-حاضر ياماما وانتي من أهل الخير والسعادة

---

صباح الخير يا عريس

صباح النور يا أميرة عقبالك

أميرة: ادعيالي بس الاقي عريس طيب زيک  
کده عشان يبغي زي الخاتم في صباقي

-قصدک ايه يا أميرة



-ما قصدش حاجه يا أبيه.. اصل انا شوفت

فيلم قديم من يومين.. البطل كان غلبان  
وطيب زيك كدة.. بس مراته كانت  
قوية ومفترية.. وهو كان بيسمع كلامها  
في كل حاجة ويخاف يرفضها طلب..  
وخلته ينسي اهله وناسه.. لحد ما قفل باب  
بيته في وش ابوه.. وكانت مراته دايمًا  
بتقول عليه زي الخاتم في صباعها ..

عادل: انتي قصدك علي فيلم ( بالوالدين  
إحسانا ) بتاع سمير صبري ولا فيلم  
عندما يبكي الرجال) بتاع فريد شوقي و  
نور الشريف

أميرة: مش عارفة يا أبيه اهو فيلم  
وخلاص.. النهاردة فرحك علي ليلي بقي



ما تفكرش كثير.. واستني لما هي تيجي  
ونشوف هتعمل ايه.

عادل: طيب #ياليلي روعي البسي بسرعة  
اميرة: قصدك #أميرة يا عادل يا اخويا انت  
لحقت تنسي اسمي من أولها  
-معلش يا اميرة سامحيني أوعدك مش  
هنسي اسمك تاني.. امال فين بابا وماما  
-بابا جوه بيلبس بدلتة.. وماما بتجهزلي  
الساندويتشات اللي هاخدها معايا الفرح

منيرة: انا جيت اهو يا احلي عريس في  
الدنيا.. ايه الحلاوة والشياكة دي كلها..  
يا أرض احرصي ما عليكي



عادل يبوس إيد مامته: ربنا يخليكي لينا

ياست الكل ولا يحرمني منك ابدا يارب

منيرة: ويسعدك طول العمر يا حبيبي..

يللا عشان تروح تاخد عمر معاك وتجيب

عروستك من الكوافير

-لا ياماما انا هو صالكم للنادي الأول

وبعدين اروح الكوافير

-ما ينفعش يابني.. انت روح شوف

عروستك يمكن تحتاج أي حاجة.. واحنا

هنروح النادي ماتخافش باباك عارف

الطريق كويس

والد عادل: الف مبرووووووك يا عريس...

هتصدقني يا عادل لو قولتلك ان انا



فرحان دلوقتي اكثر من فرحتي يوم  
فرحي.

-أصدقك طبعاً يا أجمل أب في الدنيا.. أنا  
عارف ده كويس من غير ما تقول يا حج  
بابا

-ربنا يسعد قلبك ويفرحك يا حبيبي...  
اسمع كلام مامتك وروح لعروستك..  
أنا عارفين طريق النادي أكثر منك  
-حاضر يا بابا.. أنا هستأذن دلوقتي.. سلام  
عليكم

وعليكم السلام ورحمة الله وبركاته.

الوالد: استني يا عادل قبل ما تمشي في  
كلمتين كنت عايز أقولهم لك من زمان



ودلوقتي جه معادهم.. وما ينفعش يتأخروا  
اكثر من كده

-اتفضل ياواليدي لسه في وقت قدامنا

الوالد: هم 3 دقائق انا مش هتأخر عليك

-من النهاردة يا عادل هتشيل أمانة كبيرة..  
وهتبقى مسئول عنها ليوم الدين.. وربنا  
مش هيسامحك لو فرطت أو تهاونت في  
حمل الأمانة.. لأن الرسول عليه أفضل  
الصلاة والسلام يقول: "كلكم راع  
وكلكم مسئول عن رعيته."

أنت مسئول عن مراتك لازم تأمرها  
بالمعروف وتنهاها عن المنكر عشان تفوز  
برضا ربنا.. وتأخذ بأيديها للجنة.. لأنك  
لو قدرت تخليها زوجة وأم صالحة.. هيبقي



عندك ذرية صالحة تفيد المجتمع  
والناس.

عادل: حاضر ياوالي

-ياريت تفهم كلامي صح ياابني.. مفيش  
إنسان كامل كلنا مذنبين وكل واحد  
فينا محتاج شخص تاني يصحي فيه ضميره  
ويساعده علي عمل الخير ..

أوعي في أي يوم تسمع الأذان وتقوم تصلي  
لوحداك.. قبل ما تخرج للمسجد لازم  
تأكد انك سبت مراتك في البيت  
بتصلي.. ولو عايز تحس براحة أكثر،  
وتخلي الحب يدوم بينكم، والبركة  
تملي بيتكم حاول تقري صفحة وحده





علي الأقل من القرآن كل يوم بعد صلاة  
الفجر..

عادل: حاضر ياواليدي

-ده يا بني حق ربنا عليك في أهل  
بيتك.. وبالنسبة لحق مراتك عليك  
إياك تتهاون فيه هو كمان... لأن ده مش  
إحسان أو صدقة منك عليها... دي حاجة  
فرضا عليك ربنا يعني مش أقل من  
الشهادة و الصلاة والحج والزكاة.. وصوم  
رمضان.

قال الله عز وجل "وعاشرهن بالمعروف فإن  
كرهتموهن فعسى أن تكرهوا شيئا  
ويجعل الله فيه خيرا كثيرا."



وَكَمَانَ الرَّسُولِ عَلَيْهِ أَفْضَلُ الصَّلَاةِ وَالسَّلَامِ  
أَمَرْنَا بِحَسَنِ مَعَامِلَتِهِمْ وَأَوْصَانَا بِالنِّسَاءِ فِي  
خُطْبَةِ الْوُدَاعِ..

وَقَالَ "لنِسَائِكُمْ عَلَيْكُمْ حَقٌّ وَلَكُمْ  
عَلَيْهِنَّ حَقٌّ. لَكُمْ أَنْ لَا يَؤْطِئَنَّ فَرْشُهُمْ  
غَيْرَكُمْ، وَلَا يَدْخُلَنَّ أَحَدًا تَكْرَهُونَهُ  
بِوَتِكُمْ إِلَّا بِإِذْنِكُمْ وَلَا يَأْتِيَنَّ بِفَاحِشَةٍ،  
فَإِنْ فَعَلْنَ فَإِنَّ اللَّهَ قَدْ أَذَنَ لَكُمْ أَنْ  
تَعْضَلُوهُنَّ وَتَهْجُرُوهُنَّ فِي الْمَضَاجِعِ  
وَتَضْرِبُوهُنَّ ضَرْبًا غَيْرَ مَبْرَحٍ، (غَيْرَ شَدِيدٍ)  
فَإِنْ انْتَهَيْنَ وَأَطَعْنَكُمْ فَعَلَيْكُمْ رِزْقُهُنَّ  
وَكَسَوَتُهُنَّ بِالْمَعْرُوفِ، وَاسْتَوْصُوا بِالنِّسَاءِ  
خَيْرًا، فَإِنَّهُنَّ عِنْدَكُمْ عَوَانٌ لَا يَمْلِكُنَّ  
لَأَنْفُسِهِنَّ شَيْئًا، وَإِنَّكُمْ إِنَّمَا أَخَذْتُمُوهُنَّ  
بِأَمَانَةٍ مِنَ اللَّهِ وَاسْتَحْلَلْتُمْ فُرُوجَهُنَّ بِكَلِمَةٍ



اللّٰه فاتقوا اللّٰه في النساء واستوصوا بهن  
خيراً - ألا هل بلغت....اللهم فاشهد.

والرسول (ص) كان دائماً في بيته بساماً  
ضحاكاً، وكان يقول: أكرموا النساء فما  
أكرمن إلا كريم، ولا أهانهن إلا لئيم))

-حاضر ياواليدي

-آخر حاجة يا بني وسامحني طولت  
عليك... عندي ليك 10 نقاط مهمين  
هيفيدوك جدا في تعاملاتك مع ليالي  
مراتك

1-الستات بكلمة وحده ممكن تحبك..  
وبكلمة وحده ممكن تكرهك طول  
العمر.. يعني ما تبخلش عليها بكلمة



حلوۃ.. يمكن انت شايفها حاجة بسيطة  
لكن بالنسبالها هي حاجة كبيرة جدا.

2- أبعد عن مراتك وقت غضبك عشان  
ما تطلعش منك كلمة تزعلها أو تدايقها..  
ولما تلاقي نفسك هديت قرب منها وحاول  
تتفاهم معاها في جو هادي

3- خالي بالك من أقل حاجة تعملها  
مراتك في البيت.. وحاول تشكرها  
عليها.. هي مش مستنيتة منك كلمة  
شكر لكن نفسها تحس بأنها عملت  
حاجة مهمة.. و ان زوجها واخد باله من  
تعبها.. ومن اهتمامها بمكانها وده حقها ..



4-الست يابني بتحب التغيير دايمًا يعني لو

لقيتها في يوم نقلت كرسي من مكانه  
وحطته في مكان ثاني ما تكسرش  
بخاطرهما وحاول تتأقلم علي المكان  
الجديد حتي لو كان مدايقك

5-لما تجيبك حاجة تشربها.. أو ربنا

يكرمها وتطبخك حاجة.. افتكر  
كويس انها تعبت أوي في الحاجة دي  
وكان نفسها تبقي جميلة لكن كل  
انسان ليه قدرات وهي دي قدراتها..  
وبأسلوبك تقدر تخليها أحسن من كده..  
يعني ممكن تقولها ( الأكل حلو جدا  
بس كان هيبقي أجمل لو خففتي الملح  
شوية).



"ما عاب النبي صلى الله عليه وسلم طعاما  
قط إن اشتهاه أكله وإن كرهه تركه"  
صحيح البخاري

6- البيوت أسرار يابني وأي حاجة تحصل  
في شقتك اوعي حد يسمع بيها سواء أنا أو  
مامتك أو أي حد من صحابك

7- ما تبقاش لين أوي مع مراتك للدرجة  
اللي تخليها تستهين بكلامك.. ولا تبقي  
شديد معاهما للدرجة اللي تخليها  
تكرهك

8- علي قد ما تقدر حاول ما تشتكيش من  
مراتك لبابها أو مامتها.. لأن كل شكوي  
جديدة هتبقي سور جديد ما بينك



وبينها.. إلا في حالات نادرة يوم ما تحس ان  
التفاهم بينكم وصل لطريق مسدود

9- مهما زادت عليك هموم الدنيا  
ومشاكلها ما تبقاش ضعيف قدام مراتك  
لأنها بتستمد قوتها منك.. وبتحس بالأمان  
طول ما هي شايفاك قوي قدامها.

10- زي انت ماتحب مراتك تظهر قدامك  
في أجمل صورة.. لازم انت كمان تحافظ  
علي مظهرك قدامها.. وحاول تبقي معاها  
بنفس الشياكة اللي بتكون عليها وانت  
مع صحابك





-آخر حاجة يابني لازم تعرف ان أكثر  
حاجة يفرح بيها الشيطان هي وقوع  
الطلاق بين الزوجين

قال رسول الله صلى الله عليه وسلم " إن  
إبليس يضع عرشه على الماء ثم يبعث  
سراياه فأدناهم منه منزلة أعظمهم فتنة  
يجيء أحدهم فيقول فعلت كذا وكذا  
فيقول ما صنعت شيئاً قال ثم يجيء  
أحدهم فيقول ما تركته حتى فرقت بينه  
وبين امرأته قال فيدنيه منه ويقول نعم  
أنت"

-أنا اسف يابني سامحني أخرتك شوية  
بس هو ده الوقت المناسب للكلام ده..  
يمكن كنت هتنساه لو قولت هولك قبل  
كدة.. ولو تأخر بعد زواجك يمكن



تظلم مراتك وتفتكر أني لاحظت عليها  
حاجة وحشة لا سامح الله ..

روح يابني علي بركة الله ..

بارك الله لكما وبارك عليكما وجمع  
بينكما في خير.

-ربنا يخليك ياواليدي ولا يحرمني منك  
ابدا يارب.. أوعدك هحاول أعمل بكل  
النصائح دي علي قد ما أقدر ان شاء الله..

-ربنا يوفقك يابني.. يللا بقي عشان تروح  
لعروستك في الكوافير

-حاضر ياواليدي... سلام عليكم

وعليكم السلام ورحمة الله وبركاته

-----



مامت عادل: حيرتيني معاكي يابنتي  
قوليلي بسرعة هتلبسي ايه عايزين نلحق  
نروح النادي قبل أي حد.

أميرة: خلاص ياماما هلبس الفستان ده

-عايزة تلبسي فستان أسود يوم فرح  
أخوكي مش عيب ياماميرة

-لأ مش عيب ياماما الأسود بقي موضت  
دلوقتي في الأفراح والمناسبات وكل  
الممثلين بيلبسوه في حفلات التلفزيون

-براحتك يابنتي بس علي الأقل البسي  
الجيبنة السوداء مع البلوزة النبيتي دي

-أوووووووف حاضر ياماما

-اسمعيني كويس يا أميرة.. في كلمتين  
لازم أقولهما لك دلوقتي وانت بيبتلبي



هدومك.. من النهاردة هتيجي وحده  
جديدة تعيش معانا.. مرات اخوكي  
الكبير .. اعلمي حسابك تتعاملي معاها  
كأنها أخوكي بالضبط.. اوعي تزعليها أو  
تزعلي منها مهما حصل.. عشان عادل  
مايزعلش منك.. ولو هي غلطت في حقك  
ما ترديش عليها.. ولا تقولي لباباكي او  
أخوكي.. تعالي قوليلي أنا وأنا هعرف  
اتصرف.. مش عايزينها تحس انها غريبة  
في البيت أو تندم انها اتجوزت عادل  
أخوكي.

أميرة: حاضر ياماما مش عايزاني كمان  
انضفلها الشقة واكنسها الأرضية واشتغل  
خدامت عندها



-ولا تشتغلي خدامت ولا تروحي عندها  
أصلا.. ربنا يهديكي ويصلح حالك  
يابنتي

-شكرا ياماما انا أصلا مش بحب اطلع  
أوضتي.. يللا بقي عشان نلحق فرح السنيورة  
-اللهم طولك ياروح.. يللا بينا يابنتي...  
اللهم إني لا أسألك رد القضاء ولكن  
أسألك اللطف فيه.

### #قاعة\_الأفراح

أقارب العروسين علي اليمين.. وبقية  
المعازيم علي اليسار.. هاشم.. وتوفيق  
والمأذون والشهود في آخر القاعة انتظارا  
لوصول العروسين ليبدأ كتب الكتاب.



\*\*\*علي صوت الطبل والدفوف ظهر  
العروسين أخيرا في أبهى وأروع صورة  
خطفت أنظار المدعوين.. عادل يرتدي  
بدلة بيضاء وقميص أبيض.. مع رابطة  
عنق ذهبية اللون تتخللها خطوط بيضاء..  
تقدم عادل في خطوات ثابتة وهو يتمتم  
بأغنيته المفضلة ( واثق الخطوة يمشي  
ملكاً ) وتذكر يوم أن تغني بها أمام بيت  
العروس.. فراحت الابتسامة تعلو شفثيه..  
ومضى قلبه يتراقص من البهجة والسرور  
علي أصوات الدفوف وقرع الطبول.

أما العروس فقد ظهرت كأنها ملكة جمال  
بنات العائلة كما قيل سابقا بل أكثر..  
حتي بدت كأن الزهور جميعها إتحدت



لتصنع أجمل وأرقى زهرة في هذا الكون  
الواسع.. أو كأن القمر تنازل عن عرشه في  
هذه الليلة ليتم تنصيب العروس بدلا منه  
أميرة للحسن والروعة والجمال..

كانت ليلى ترتدي فستانا شديد البياض..  
مرصع بالكريستال وحببات اللؤلؤ اللامعة..  
وتاجا فوق الحجاب جعلها تبدو كأنها  
أسطورة من أساطير الزمن القديم.

-توجه العروسين ناحية المأذون.. لكتب  
الكتاب وإعلان الزواج المنتظر

جلست ليلى بجوار أبيها علي يمين المأذون..  
وجلس عادل بجوار والده في الجهة  
المقابلة





المأذون: أين وكيل العروس

هاشم والدها: انا باباها والعروسة قدامك  
اهي اسألها

المأذون: موافقة يا عروسة ولا بتفكري  
تغيري رأيك

ليلى في خجل: موافقة طبعاً

(علت الابتسامه وجوه الجميع)

المأذون: هات إيدك يا هاشم بيه وقول ورايا

(إنى استخرت الله العظيم على ان أزوجك

موكلتى / ليلى هاشم سليمان.. البكر

الرشيد على كتاب الله و سنت رسول الله...

و على الصداق المسمى بيننا عاجله و اجله

و الحضور شهود على ذلك و الله خير

الشاهدين.



المأذون: قول ورايا ياعريس

إنى استخرت الله العظيم وقبالت زواج  
موكلتك الانسة/ ليلى هاشم سليمان..  
البكر الرشيد على كتاب الله وسنة  
رسول الله صلى الله عليه وسلم.. وعلى  
الصداق المسمى بيننا عاجله وآجله و  
الحضور شهود على ذلك والله خير  
الشاهدين

المأذون: أين الشهود

هاشم: الحاج بسيوني.. وكمال صديق  
العريس

(وفجأة يدخل القاعة أكثر من 50 رجلا  
أصغرهم ذو الأربعين عاما... وينطلق من  
بينهم صوت عالي يقول.. هو ينفع ياهاشم



يا اخويا الفرح يته بدون حضور أعمام  
العروسة وأهلها وقرايبها.. الف مبرووووووك  
بالأحضان يا اخويا ربنا يتملك بخير

هاشم: معقوووله حسن وحسين اخواتي هنا  
جمبي انا مش مصدق نفسي... اهلا بيكم  
شرفتوني ورفعتوا راسي ربنا ما يحرمني  
منكم أبدا يا اارب

حسين: احنا اسفين يهاشم.. غلطنا في  
حقك كثير

حسن: سامحنا يهاشم انت اخونا الكبير  
وقلبك أكبر منا ويساعنا كلنا.. احنا  
اسفين ما تزعلش منا

هاشم: عمري ما اقدر أزعل منكم.. النهاردة  
الفرح بقي فرحين.. لو اعرف كدة كنت



جوزتها من زمان... ربنا يخليكم ليا يا أحلي  
اخوات في الدنيا... بعد إذك يا بسيوني..  
أستسمحك تخلي حسين اخويا هو اللي  
يشهد علي عقد الفرح

بسيوني: معاك حق ياسيدي إذا حضر الماء  
بطل التيمم... انا كمان الفرحته مش  
سايعاني أخيرا اقله شمل العيلة من جديد..  
الحمد لله رب العالمين

-الحضور جميعا (الحمد لله رب العالمين)

توجه العروسين الي المنصة (الكوشة)

جلست العروس علي يمين العريس.. وبدأ  
الحفل بتلاوة القرآن الكريم وأسماء الله  
الحسني.. وتتابع فقرات الفولكلور



الشعبي وأخيرا تم عرض المسرحية  
البدوية.. التي نالت استحسان الحضور ما  
عدا بسمت وحسام

بسمت: ايه الهبل ده.. برضه ده نظام فرح  
يتعمل انا حاسته كأنني في حفلة تخريج  
دفعته جديدة من الطلاب

حسام: مش عارف صحيح انا كنت فاكـر  
ان الفرحة فيه رقاصه عشان كدة جيت  
بدري وحجزت مكان في أول الصفوف

بسمت: هو ده بس اللي يهمك يا حسام انا  
كنت فاكـراك جاي عشان حاجة أهم  
من كدة

حسام: اي هي الحاجة اللي أهم من الفرحة  
دلوقتي



-----



# دلوقتي مش عايزة اسمع صوتک

## عادل: بتقولي حاجة ياليلي

## بجد.. ذوقک جمیل جدا یا عادل

# البشهندس عادل يابنتي

علينا... يامصیبتی السودا انا هالحق أتصور

## ما هي تشوفني

## عايزة اسمع منك ولا كلمت تانيته





مستورة: حاضر انا خلاص اتصورت 3 صور  
كفايتة عليا كده عشان هي جات... يلا  
بقي هستناكي في بيتك سلااام.

-----

بسمت: ازيك ياعادل مبرووووووك.. الف  
مبروك ياليلي يا حبيبتي  
عادل: الله يبارك فيكي

ليلي: شكرا

حسام: مبروك يا صاحبي... ألف مبروك  
يا أستاذة ليلى

عادل: الله يبارك فيك.. شرفتنا  
بحضورك يا استاذ حسام.

ليلى: شكرا



بسمت: هي دي اختك يا عادل.. اسمك ايه  
ياأمورة

أميرة: اسمي أميرة أخت عادل الصغيرة

بسمت: اسمحلي يا عادل نبقى اصحاب انا  
وهي.

عادل: أكيد طبعاً مفيش مشكلت يا  
أستاذة بسمت

بسمت: طيب انا اتعودت لما اتعرف علي حد  
جديد لازم اعزمه علي حاجت.. اسمحلي  
أخرج انا وأميرة نشترى شوكولاتة من برة

عادل: متشكر أ. بسمت لكن في  
شوكولاتة كتير هنا.. وكم ان تورتة  
وجاتوه



بسمت: لا معلىش انا لازم اجيبها حاجة  
على حسابي... أمال ازاي انا اللي عازماها..  
ما تخافش انا مش هخطفها يا عادل

أميرة: انا عايزة اروح معاها يا ابيه.. عشان  
خاطري سيبني أروح معاها.

عادل: طيب اتفضلي يا بسمت بس ياريت ما  
تتأخروش عن 5 دقائق.. ولا تبعدوا كتير  
عن هنا

بسمت: حاضر متشكرة جدا يا عادل ..

ليلى: انت ازاي تخليها تاخد أختك وتمشي  
كده مش خايف تخطفها

عادل: انتي مش شايفت غلاستها ورخامتها



ليالي: مهما حصل ماكانش ينفع توافق علي  
حاجتي زي دي

عادل: ماتخافيش انا شاورت لياسين صاحبي  
يمشي وراهم

صعد الأصدقاء الي المنصة :

كمال: ألف مبرووووووك يا عادل...  
بالرفاء والبنين ان شاء الله

فرج: ألف مبروك يا أجدع صديق في  
الدنيا.. ربنا يسعدك ويفرح قلبك

اسماعيل: مبرووووووك يا صديقي.. بارك  
الله لكما وبارك عليكما وجمع بينكما  
في خير

-----



تم بحمد الله نصف الرواية الأولى أتمني انه

ينال اعجابكم جميعا

الي اللقاء في الجزء الثاني

خالص تحياتي

محمود زيدان

حكاوي الكتب للنشر الالكتروني

[www.hakawelkotoob.com](http://www.hakawelkotoob.com)